

宋史

冊七

新刊宋史

宋史卷四十五

元中書右丞相總裁脫脫等修

本紀第四十五

理宗五

景定元年春正月丙子詔獎賈似道功庚辰歲星熒惑合在尾壬辰詔知涪州趙域聚糧不運餉兵士遂爲北有已削一秩罰輕再削兩秩乙未潼川城仙侶山賈似道言高達守鄂州城凡三月大元師北還二月丙午詔賈似道以緡錢三十萬犒師并示賞功之典己酉以高達爲寧江軍承宣使右金吾衛上將軍賜緡錢五十萬呂文德賜緡錢百萬浙西良田百頃鄂州戰守將士賜緡錢三千萬王鑑孫虎臣蘇劉義等各官十轉高達遷湖北安撫副使知江陵府兼夔路策應使陳奕阮思聰並正任防禦使江西湖南帥司言大元兵破瑞州臨江軍城與國壽昌洪撫全永衡諸郡民皆被兵存者奔竄宅所甲寅詔臨江守臣陳元桂死節官五轉贈寶章閣待制與一子京官一子選人恩澤給緡錢十萬

治葬立廟死所謚曰正節瑞州守臣陳昌世治郡雖有善政兵至民擁之以逃以棄城失守削三秩勒停乙卯詔孫虎臣和州防禦使張世傑以下十三人各官五轉立功將士並補兩官資賜銀絹庚申兩雹辛酉大元遣偏師自大理由廣南抵衡州向士璧會合劉雄飛逆戰於道俘民獲還者甚衆詔雄飛升保康軍承宣使餘轉官賜銀錢賈似道賜金器千兩幣千匹命國子監主簿劉錫趣召赴闕向士璧遷兵部侍郎職任依舊呂文德高達陳奕等各賜金幣有差丙寅大元軍過分寧武寧二縣河湖砦都監權巡檢張興宗死之詔贈武翼郎官一子承信郎以緡錢三萬給其家湖南諸將溫和轉左武大夫帶行遙郡刺史李虎官三轉帶行閣門宣贊鄭進帶行復州團練使各賜銀絹旌其守禦之功三月戊辰朔日有食之庚午命夏貴兼黃壽策應使總舟師癸酉以橫山之戰將士效節多死行陣總管張世雄沈彥雄陳喜秦安李孝信鄭俊李安國各贈十官資賜緡錢萬恤其家甲戌賞夏貴鴻宿州白鹿磯戰功遷福州觀察使職任仍舊將士推賞乙亥詔全岳水衡柳象瑞興國南康隆興江州臨江潭州諸

縣經兵農民失業應開慶元年以前二稅盡除之癸未賈似道奏蘋草坪大戰進至黃州乙酉詔范文虎轉左武大夫環衛官黃州武定諸軍都統制張世傑環衛官職任依舊鄂州統制張勝死於漢陽戰陣贈官五轉官其子煥進武校尉丙戌賈似道言自鄂趨黃與北朝回軍相遇諸將用命捍禦詔孫虎臣范文虎張世傑以下各賜金帛夏四月戊戌朔侍御史沈炎疏吳潛過失以忠王之立人心所屬潛獨不然章汝鈞對館職策乞爲濟邸立後潛樂聞其論授汝鈞正字奸謀叵測請速詔賈似道正位鼎軸詔朱熠戴慶烜輪日判事大政則共議以聞己亥賈似道表言夏貴等戰新生州進至白鹿磯皆身自督戰有功詔赴闕庚子以王堅爲侍衛步軍司都指揮使戊申以劉整知瀘州兼潼川安撫副使己酉揚州大火吳潛以觀文殿大學士提舉臨安府洞霄宮癸丑進賈似道少師依前右丞相兼樞密使進封衛國公朱熠知樞密院事兼參知政事饒虎臣參知政事戴慶烜同知樞密院事兼參知政事皮龍榮端明殿學士簽書樞密院使己未以夏貴爲保康軍承宣使左金吾上將軍知淮安州兼淮東安

撫副使京東招撫使賜金器幣溧陽田三十頃壬戌進馬光祖資政殿大學士  
職任依舊癸亥以呂文德兼夔路策應使丙寅命馬光祖兼淮西總領財賦五  
月戊辰朔詔趙葵依舊少保兩淮宣撫使判揚州進封魯國公徐清叟觀文殿  
大學士知建寧府饒虎臣罷壬申李曾伯史岩之並落職解官曾伯坐嶺南閉  
城自守不能備禦岩之坐鄂州圍解大元兵已渡江北還然後出兵又命程芾  
任事以致敗績甲戌詔贈呂文信寧遠軍承宣使立廟賜額子師憲帶行閣職  
更與兩子承信郎輔周和州防禦使錄其白鹿磯死事乙亥詔李虎馭軍無律  
貸命追奪竄鬱林州丁丑賜賈似道玉帶庚辰戴慶炯卒贈資政殿大學士壬  
午熒惑犯斗癸未以皮龍榮兼權參知政事沈炎端明殿學士同簽書樞密院  
事馬堃鄂州都統制駐劄江陵府甲申祈雨戊子詔饒虎臣以資政殿學士提  
舉臨安府洞霄宮任便居住楊棟召赴闕壬辰以姚希得爲敷文閣待制知慶  
元府兼沿海制置使乙未詔李庭芝起復祕閣修撰主管兩淮安撫制置司公  
事兼知揚州六月丁酉朔夏貴奏淮安戰功庚子竄丁大全於南康軍壬寅詔

立皇子忠王禛爲皇太子賜字長源戊申王埜卒壬子賜李遇龍金帶陳奕帶御器械依舊鎮江駐劄御前諸軍都統制賜田三十頃詔升巢縣爲鎮巢軍甲寅楊棟葉夢鼎並太子詹事乙卯陳韓進一秩福建安撫使知福州徐清叟觀文殿學士知泉州秋七月丁卯朔皇太子入東宮行冊禮大赦壬申貴妃閻氏薨賜諡惠昭東南有星如太白丁亥命皇太子昕朝侍立戊子上謂宰執曰北朝使來事體當議買似道奏和出彼謀豈容一切輕徇儻以交鄰國之道來當令入見乙丑侍御史何夢然劾丁大全吳潛欺君無君之罪庚寅買似道兼太子少師朱熠皮龍榮沈炎並兼賓客辛卯詔丁大全削三秩謫居南安軍吳潛奪觀文殿大學士罷祠削二秩謫居建昌軍癸巳詔舉孝廉八月壬寅以程元鳳爲淮浙發運使判平江府己酉太陰犯填星詔皇太子受冊畢買似道朱熠皮龍榮沈炎各進一秩東宮官吏諸軍兵等官一轉餘皆推恩壬子與憲薨贈少師諡忠憲太白犯房壬戌李曾伯史岩之各削二秩甲子饒虎臣削二秩奪資政殿學士罷祠九月癸酉守瀘州劉整以功來上丁丑知漳州節制屯戍軍

馬洪天錫言援例剝辟幹官一員報行軍機密文字奏可辛巳祀明堂大赦丙戌熒惑犯壁戊子李松壽犯淮安冬十月乙未朔詔申嚴邊防甲辰詔黨丁大全吳潛者臺諫其嚴覺察舉劾以聞當寘於罪以爲同惡相濟者之戒時似道專政臺諫何夢然孫附鳳桂錫孫劉應龍承順風指凡爲似道所惡者無賢否皆斥帝弗悟其奸爲下是詔戊申李松壽修南城詔趣淮閩調兵毀之壬子破李松壽兵於漣水城下夷南城舊址乙卯有星自東北急流向太陰壬戌竄吳潛於潮州十一月丙寅詔內侍何時修削二秩永罷不敘洪燾知臨安府兼浙西安撫使壬午以中軍統制知簡州馬千權興州都統兼知合州戊子熒惑與填星順行太陰犯房十二月甲午朔詔華亭奉宸莊其隸外廷助軍餉包恢敘復元官職知常州辛丑建陽縣嘉禾生一本十五穗詔改建陽爲嘉禾縣甲寅呂文德上夔路戰功乙卯少師廬陵郡王思正薨謚簡惠印應雷直徽猷閣知江州主管江西安撫司公事節制蘄黃興國三郡庚申以監察御史桂錫孫言追寢全子才敘復之命

二年春正月癸亥朔詔監司率半歲具劾去賊吏之數來上視多寡爲殿最行賞罰守臣助監司所不及以一歲爲殿最定賞罰本路州無所劾而臺諫論列則監司守臣皆以殿定罰有治狀廉聲者撫實以聞乙丑城安慶詔馬光祖進二秩丁丑命皇太子謁拜孔子於太學乙卯福建安撫使陳韓累疏請老詔進一秩守觀文殿學士致仕以董槐判福州福建安撫使乙酉詔封張栻爲華陽伯呂祖謙開封伯從祀孔子廟庭二月丙申孫虎臣戰邳州全師而歸癸卯詔諸路監司申嚴僞會賞罰之令甲寅進封周國公主二月壬戌朔日有食之乙亥故寧遠軍承宣使張祥都統制閻忠進以援蜀之功祥贈節度使忠進贈復州團練除恩澤外各更官一子承信郎賜緡錢二萬戊寅賈似道等上玉牒曰曆會要經武要略及孝宗光宗寧宗實錄詔似道皮龍榮朱熠沈炎各進三秩夏四月癸巳朔余思忠追毀出身文字除名勒停竄新州乙未以皮龍榮參知政事沈炎同知樞密院事兼權參知政事何夢然簽書樞密院事俞興保康軍承宣使四川安撫制置使丙申呂文德超授太尉京湖安撫制置屯田使夔路



策應使兼知鄂州李庭芝右文殿修撰樞密都承旨兩淮安撫制置副使知楊州己亥詔申嚴江防壬寅呂文德兼湖廣總領財賦乙巳馬天驥資政殿學士知福州福建安撫使呂文福帶御器械淮西安撫副使兼知廬州官一轉戊申馬光祖進觀文殿學士職任依舊乙卯竄吳潛於循州丙辰竄丁大全於貴州追削二秩丁巳楊鎮授左領軍衛將軍駙馬都尉高達知廬州淮西安撫副使五月癸亥賈似道請祠祿詔不允庚午謝方叔敘復觀文殿大學士致仕戊寅以劉雄飛知夔州夔路安撫使乙酉王堅遷左金吾衛上將軍湖北安撫使兼知江陵府六月乙未詔霖雨爲沴避殿減膳徹樂乙巳詔近畿水災安吉爲甚亟講行荒政辛亥以范文虎爲左領軍衛大將軍主管侍衛步軍司兼馬軍司秋七月甲子蜀帥俞興奏守瀘州劉整率所部兵北降由興構隙致變也至是興移檄討整辛未制置使蒲擇之坐密通蠟書叛賊羅顯詔竄萬安軍太陰犯斗乙亥以厲文翁爲資政殿學士沿海制置使知慶元府戊寅王惟忠家訟冤詔奪謝方叔合得恩數丁大全責授新州團練使貴州安置臺臣吳燧奪職罷

祠陳大方胡大昌皆鑄官壬午陳韓卒贈少師諡忠肅丙戌吳潛責授化州團練使循州安置八月壬辰命韓宣兼常德辰沅澧靖五郡鎮撫使呂文德兼四川宣撫使范文虎以白鹿磯之功賞七官以五官轉行遙郡防禦使餘官給憑丁酉詔奪向士璧從官恩數窮竟侵盜掩匿之罪時以兵退遣官會計邊費似道忌功欲以污穢一時閭臣士璧及趙葵史岩之杜庶皆責徵償信州謝枋得以趙葵檄給錢粟募民兵守禦至是自償萬緡壬寅築周國公主館於安濟橋乙巳以江萬里爲端明殿學士同簽書樞密院事依執政恩數九月辛酉詔湖秀二郡水災守令其亟勸分監司申嚴荒政乙亥李庭芝言李松壽已遁大元使郝經久留真州帝趣與錫賚經之留謀出賈似道帝惑其言不悟蓋似道在鄂時值我世祖皇帝歸正大位撤兵似道自詭有再造之功諱言歲幣及講和之事故不使經入見冬十月癸巳呂文德言已復瀘州外堡擬卽對江壘石爲城以示持久之計從之戊戌雷電甲申詔申獎賈似道鄂州之功丙午以何夢然同知樞密院事兼參知政事癸丑程元鳳授特進觀文殿大學士醴泉觀使

兼侍讀甲寅皇太子擇配帝詔其母族全昭孫之女擇日入見寶祐中昭孫沒於王事全氏見上上曰爾父死可念對曰臣妾父固可念淮湖百姓尤可念上曰卽此語可母天下迨開慶丁大全用事以京尹顧岳女爲議大全敗故有是命丙辰沈炎資政殿學士提舉臨安府洞霄宮任便居住十一月己未朔劉雄飛和州防禦使樞密副都承旨四川安撫制置副使兼知重慶府四川總領夔路轉運使庚申周國公主館成詔董宋臣李忠輔各官一轉甲戌資政殿學士致仕汝騰卒贈官四轉諡忠清安南國貢象二丁丑馬光祖提領戶部財用兼知臨安府浙西安撫使下嫁周國公主於楊鎮己卯以鎮爲宜州觀察使賜玉帶尋升慶遠軍承宣使詔駙馬都尉楊鎮家合有賞典楊蕃孫官兩轉楊鐸楊鑑官一轉並直祕閣餘轉官進封有差癸未封全氏永嘉郡夫人十二月庚寅改竄蒲擇之於南康軍辛卯宰臣奏太子語臣等言近奉聖訓夫婦之道王化之基男女正位天地大義平日所講修身齊家之道當真履實踐勿爲口耳之學請宣付史館永爲世程法從之甲午以皮龍榮兼權知樞密院事何夢然參

知政事兼太子賓客馬光祖同知樞密院事兼太子賓客知臨安府己亥太陰犯五車壬寅江萬里依舊端明殿學士提舉臨安府洞霄宮任便居住癸卯冊永嘉郡夫人全氏爲皇太子妃

三年春正月戊子朔詔申飭百官盡言詔量移丁大全吳潛黨人並永不錄用壬戌詔陳塏等耆年奉祠宜示崇獎陳塏端明殿學士林彬之寶章閣待制史季溫直華文閣丁仁直寶謨閣仍並予祠祿甲子福建路安撫使馬天驥進資政殿大學士職任依舊乙丑詔諭西蜀郡縣等官已授遇闕毋遙受虛批月日違期不赴丁卯以善諮嗣濮王戊辰周國公主進封周漢國公主庚午賜賈似道第宅於集芳園給緡錢百萬就建家廟甲戌詔權知梁山軍李鑑守城有功帶行閣門宣贊舍人就知道梁山軍復瀘州改爲江安軍呂文德進開府儀同三司二月丁亥朔臨安安吉嘉興屬邑水民溺死者衆詔守臣給槥瘞之詔獎諭制置司其立功參贊將士進秩升職犒給有差乃裕授檢校少保以皮龍榮爲資政殿大學士知潭州湖南安撫使乙巳太陰入氐戊申詔省試中選士人覆

宋

史

卷四十五

本紀

六中華書局聚

試於御史臺爲定制庚戌李瓊以漣海三城叛大元來歸獻山東郡縣詔改漣水爲安東州授瓊保信寧武軍節度使督視京東河北等路軍馬齊郡王復其父李全官爵瓊卽松壽三月乙丑以孫附鳳爲端明殿學士簽書樞密院事兼太子賓客辛未詔升海州東海縣爲東海軍丁丑汪立信升直華文閣知江州主管江西安撫司公事節制蘄黃與國三郡軍馬庚辰呂文福依舊職差知濠州兼淮西招撫使夏四月庚寅太白晝見庚子熒惑與歲星合在危甲辰有流星大如杯五月壬戌熒惑犯壁壘陣丙寅雨雹己巳詔廣西靜江屯田小試有效其邕欽宜融柳象潯諸州守臣任責措置經略安撫以課殿最仍條具來上辛未馬光祖以病請祠詔知福州兼福建安撫使丁丑賜禮部進士方山京以下六百三十七人及第出身庚辰夏貴上蘄縣戰功六月戊子詔李瓊受圍給銀五萬兩下益都府犒師遣青陽夢炎率師援之庚寅以孫附鳳兼權參知政事楊棟端明殿學士同簽書樞密院事兼太子賓客壬辰吳潛沒於循州詔許歸葬己亥董槐乞致仕詔授特進戊申詔青陽夢炎援李瓊不俟解圍輒提援

兵南歸諭制置司劾之己酉有流星大如熒惑庚戌安南國王日昃上表乞世襲詔授檢校太師安南國王加食邑男威冕授靜海軍節度觀察處置使檢校太尉兼御史大夫上柱國安南國王効忠順化功臣仍賜金帶器幣鞍馬癸丑詔應謫臣僚終於貶所者許令歸葬秋七月丙辰詔州縣官廩祿不時給者御史臺覺察或以他物折支計贓論罪壬戌董槐薨贈少師謚文清庚午周漢國公主薨賜謚端孝壬申江州都統聶世興調遣入蜀託疾憚行詔奪二秩押往京湖制司自效戊寅侍御史范純父言前四川制置使俞興妬功啓戎罷任鑄秩罰輕乞更褫奪以紓衆怒奏可辛巳詔重修吏部七司條法癸未詔申嚴諸路郡縣苛取苗米之禁甲申夜有白氣亘天八月甲午海州石湫堰成詔知州張漢英帶行遙郡刺史馬步軍副總管帶行環衛官丁酉築蘄州城知州王益落階官正任高州刺史制置使汪立信上新城圖詔獎諭戊戌李壇兵敗爲大元所誅事聞詔沿邊諸郡嚴邊防汪立信升直敷文閣主管沿江制置司公事知江州主管江西安撫司公事癸卯太陰犯昴乙巳沿江制置使姚希得進寶

章閣學士職任依舊九月壬申召陳奕赴樞密院稟議丙子有流星大如太白  
丁丑温州布衣李元老讀書安貧不事科舉今已百四歲詔補迪功郎致仕本  
郡給奉閏九月甲申朔太白晝見丙戌流星透霞大如太白戊戌詔刑部長貳  
大理卿少卿歲終無評事可舉卽舉在京三獄官庚子有流星大如太白丙午  
詔應知縣罪罷雖經赦毋注緊望闕著爲令戊申詔紹興府火給貸居民錢今  
及二載民貧可憫悉除勿徵冬十月乙卯詔蠲四川制總州縣鹽酒權額己未  
太陰犯歲星甲子以楊棟簽書樞密院事兼權參知政事兼太子賓客葉夢鼎  
端明殿學士同簽書樞密院事兼太子賓客丁卯呂文德言遣將校禦敵多逗  
遛不進且奏功失實具姓名上聞詔呂文煥王達趙真削兩秩馬堃王甫削一  
秩餘貶降有差太陰犯五車星庚午太白入氐甲戌歸化州岑從毅納土輸賦  
獻丁壯爲王臣詔改歸化爲來安州從毅進秩修武郎知州事令世襲丙子詔  
安豐六安縣升軍使十一月壬辰丁大全竄貴州招游手立將校置弓矢舟楫  
縱僕隸淫虐軍民詔奪大全貴州團練使移置新州癸巳馬光祖乞祠祿詔提

舉臨安府洞霄宮任便居住丙申徐清叟薨贈少師諡忠簡丁酉資陽砦主萬戶小哥及其子衆家奴叛來降詔小哥賜姓王名永堅補武翼大夫夔路副總管重慶府駐劄戍戍以夏貴知廬州淮西安撫副使丁未皇孫容州觀察使封資國公焯薨贈保靜軍節度使廣國公熒惑填星合在婁十二月辛巳呂文德累疏辭兼四川宣撫詔仍兼四川策應使

四年春正月壬午朔詔侍從臺諫給舍卿監郎官以上及制總監司各舉所知不拘員限不如所舉行連坐法戊子林希逸言蒲陽布衣林亦之陳藻有道之士林公遇幼承父澤奉親不仕詔林亦之陳藻賜迪功郎林公遇元官上進贈一官詔董宋臣同提舉奉安符寶所仍奉祠祿己亥嚴州火丙午詔革詞訴改送之弊二月癸丑詔吳潛丁大全黨人遷謫已久遠者量移近者還本貫並不復用丁大全溺死滕州詔許歸葬詔俞興往歲失陷瀘城更削一秩丁巳置官田所以劉良貴爲提領陳訾爲檢閱戊午日暈周匝乙亥呂文德浚築鄂州常澧城池訖事詔獎之守臣韓宣轉遙郡承宣使蘇劉義吉州刺史三月丁亥以



呂文德爲寧武保康軍節度使職任依舊劉雄飛樞密都承旨四川安撫制置使兼知重慶府四川總領財賦夔路轉運使加授姚希得刑部尙書李庭芝兵部侍郎朱禕孫太府卿汪立信太府少卿並依舊任壬辰太陽赤黃暈丁酉以王堅知和州兼管內安撫使呂思望知濠州兼淮西招撫使庚子以何夢然兼權知樞密院事丁未詔知寧國府趙汝棣推行經界不擾而辦職事修舉升直華文閣依舊任戊申忠州防禦使貴傑授福州觀察使夏四月乙卯太陰犯權星丙寅官田所言知嘉興縣段浚知宜興縣葉哲佐買公田不遵元制詔罷之戊辰太陽赤黃暈不匝五月庚寅太陰入氏丁酉婺州布衣何基建寧府布衣徐幾皆得理學之傳詔各補迪功郎何基建婺州教授兼麗澤書院山長徐幾建寧府教授兼建安書院山長戊戌四川制司言二月甲寅大兵攻嘉定城馬塋出戰禦之詔馬塋援夔遷延削一秩令以所轉四官理作敘復流星出自角宿距星六月壬子祈雨乙卯京城火丙辰詔饒虎臣敘復元官依舊提舉太平興國宮庚申詔平江江陰安吉嘉興常州鎮江六郡已買公田三百五十餘萬畝

今秋成在邇其荆湖江西諸道仍舊和糴丙寅詔公田竣事劉良貴官兩轉陳  
豈廖邦傑洎六郡官進秩有差丁卯流星出自河鼓庚午宰執進玉牒日曆會  
要經武要略及徽宗長編寧宗實錄詔賈似道以下官兩轉秋七月壬辰敕令  
所進寧宗以來寬恤詔令戊戌以董宋臣爲入內內侍省押班八月甲寅董宋  
臣以病乞收回恩命請祠詔賜告五月乙卯流星出自天倉星九月甲申詔趙  
汝楨爲太府少卿淮東總領財賦辛卯祀明堂大赦甲午以何夢然知樞密院  
事兼參知政事楊棟同知樞密院事兼權參知政事葉夢鼎簽書樞密院事冬  
十月己未詔發緡錢百四十萬命浙西六郡置公田莊甲子命張珏興元府駐  
劄御前諸軍都統制兼知合州十一月己亥福州火十二月丁未朔詔皇太子  
宮講官詹事以下日輪一員辰入酉出專講讀備咨問以稱輔導之實己未詔  
在京置窠柵私繫囚并非法獄具臺憲其嚴禁戢違者有刑辛未太白歲星順  
行

五年春正月丁丑朔詔崇經術考德行癸巳出奉宸庫珠香象犀等貨下務場

宋

史

卷四十五

本紀

九中華書局聚

貨易助收幣楮庚子太子右諭德湯漢三乞休致授祕閣修撰知福州福建安撫使二月壬戌流星出自畢甲子太陰犯房丁卯太陰犯斗辛未雨土三月辛巳王堅卒賜諡忠壯馬光祖依舊觀文殿學士沿江制置使知建康府江東安撫使行宮留守己丑日暈周匝夏四月丙午詔管景模妻孥陷沒效忠愈堅平時所得奉入率以撫恤將士遂至空乏特賜緡錢三十萬尋賜金帶丁未以夏貴爲樞密都承旨四川安撫制置使兼知重慶府四川總領夔路轉運使辛亥詔郡邑行鄉飲酒禮癸丑太陰入太微垣乙卯信陽軍將領余元友等提兵防護春耕有功補轉兩官資戊午太白晝見乙丑何夢然馬天驥以臺臣劾罷己巳江萬里以資政殿學士知建寧府李曾伯以觀文殿學士知慶元府沿海制置使庚午太白歲星合於婁五月庚辰何夢然以資政殿大學士知建寧府辛卯以楊棟參知政事葉夢鼎同知樞密院事兼權參知政事姚希得端明殿學士同簽書樞密院事馬天驥提舉洞霄宮甲午流星出自河鼓大如太白乙未安南國奉表謝恩進方物詔却之仍賜金帛以獎恭順己亥太白經天晝見六

月甲辰朔知衢州謝暨因寇焚掠常山縣棄城遁詔削三秩褫職不敘臺臣言  
衢州詹沔之變乃謝暨任都吏徐信苛取激之暨罪重罰輕詔斬信籍其家暨  
再削兩秩勒停丁未詔饒虎臣敘復資政殿學士依前通奉大夫差遣如故甲  
寅加授李庭芝寶章閣直學士依舊任朱禕孫右文殿修撰知靜江府廣西經  
略使汪立信祕閣修撰樞密副都承旨沿江制置副使兼知江州江西安撫使  
詔呂文德職事修舉與官一轉太陰犯心戊午祈雨太白犯天關星乙丑命董  
宋臣兼主管御前馬院御前酒庫戊辰熒惑歲星並行己巳太白太陰並行入  
井庚午太陽赤黃暈秋七月甲戌彗星出柳丁丑詔避殿減膳應中外臣僚許  
直言朝政闕失己卯流星出自右攝提星彗星退於鬼辛巳彗星退於井甲戌  
京城大火癸巳謝奕昌卒贈少保追封臨海郡王諡莊憲甲午填星守畢乙未  
馬天驥以臺臣劾其貪贓奪職罷祠其子時楸削一秩罷新任丙申知嘉定府  
洪濤言新繁縣御容殿前枯木再榮殿有畫太祖像又順化人楊嗣光等奉太  
宗真宗仁宗英宗神宗像來歸令櫝藏府中天府觀詔本府選差武臣迎奉赴

行在所嗣光補武階兩資祈雨臺臣言太子賓客楊棟指彗爲蚩尤旗欺天罔君詔棟罷職予祠戊戌彗星退於參八月壬寅朔熒惑與填星合丙午以楊棟知建寧府戊午彗星消伏甲子彗星復見於參辛未彗星化爲霞氣九月己丑日生格氣癸巳內侍李忠輔以臺臣劾其貪肆欺罔兩秩放罷乙未建寧府教授謝枋得校文宣城及建康漕闡發策十餘問言權奸誤國趙氏必亡左司諫舒有開劾其怨望騰謗大不敬竄興國軍冬十月丙午太陰犯斗辛亥詔十七界會浸輕並以十八界會易之限一月止乙丑詔行關子銅錢法每百作七十七文足以一準十八界會之三帝有疾不視朝丙寅大赦丁卯帝崩遺詔皇太子禛卽皇帝位咸淳元年三月甲申葬於會稽之永穆陵二年十二月丙戌諡曰建道備德大功復興烈文仁武聖明安孝皇帝廟號理宗

贊曰理宗享國久長與仁宗同然仁宗之世賢相相繼理宗四十年之間若李宗勉崔與之吳潛之賢皆弗究於用而史彌遠丁大全賈似道竊弄威福與相始終治效之不及慶曆嘉祐宜也蔡州之役幸依大朝以定夾攻之策及函守

緒遺骨俘宰臣天綱歸獻廟社亦可以刷會稽之恥復齊襄之讐矣顧乃貪地  
棄盟入洛之師事釁隨起兵連禍結境土日蹙郝經來使似道諱言其納幣請  
和蒙蔽抑塞拘留不報自速滅亡吁可惜哉由其中年嗜慾既多怠於政事權  
移奸臣經筵性命之講徒資虛談固無益也雖然宋嘉定以來正邪貿亂國是  
靡定自帝繼統首黜王安石孔廟從祀升濂洛九儒表章朱熹四書丕變士習  
視前朝奸黨之碑僞學之禁豈不大有徑庭也哉身當季運弗獲大效後世有  
以理學復古帝王之治者考論匡直輔翼之功實自帝始焉廟號曰理其殆庶  
乎

宋史卷四十五

宋史卷一百一十五

...

...

...

...

...

...

...

...

...

...

宋史卷四十六

元中書右丞丞相總裁脫脫等修

本紀第四十六

度宗

度宗端文明武景孝皇帝諱禛太祖十一世孫父嗣榮王與芮理宗母弟也嘉熙四年四月九日生於紹興府榮邸初榮文恭王夫人全氏夢神言帝命汝孫然非汝家所有嗣榮王夫人錢氏夢日光照東室是夕齊國夫人黃氏亦夢神人采衣擁一龍納懷中已而有娠及生室有赤光資識內慧七歲始言言必合度理宗奇之及在位歲久無子乃屬意託神器焉淳祐六年十月己丑賜名孟啓以皇姪授貴州刺史入內小學七年正月乙卯授宜州觀察使就王邸訓習九年正月乙巳授慶遠軍節度使封益國公十一年正月壬戌改賜名孜進封建安郡王寶祐元年正月庚辰詔立爲皇太子改賜今名癸未授崇慶軍節度使開府儀同三司進封永嘉郡王二年七月以宗正少卿蔡抗兼翊善時資善



堂初建理宗制堂記書以賜王十月癸酉進封忠王十一月壬寅加元服賜字邦壽五年十月庚子授鎮南遂安軍節度使景定元年六月壬寅立爲皇太子賜字長源命楊棟葉夢鼎爲太子詹事七月丁卯太子入東宮癸未行冊禮時理宗家教甚嚴難初鳴問安再鳴回宮三鳴往會議所參決庶事退入講堂講官講經次講史終日手不釋卷將晡復至榻前起居率爲常理宗問今日講何經答之是則賜坐賜茶否則爲之反覆剖析又不通則繼以怒明日須更覆講二年正月丁丑謁孔子於太學請以張栻呂祖謙列從祀十二月癸卯冊永嘉郡夫人全氏爲皇太子妃五年十月丁卯理宗崩受遺詔太子卽皇帝位戊辰尊皇后謝氏曰皇太后生日爲壽崇節庚午宰執文武百官詣祥曦殿表請聽政不允辛未大赦十一月壬申宰執以下日表請視朝不允丁丑凡七表始從丙戌帝初聽政御後殿命馬廷鸞留夢炎兼侍讀李伯玉陳宗禮范東叟兼侍講何基徐幾兼崇政殿說書詔求直言又詔先朝舊臣趙葵謝方叔程元鳳馬光祖李曾伯各上言以匡不逮召江萬里王爚洪天錫湯漢等赴闕詔躬行三

年喪復濟王竑元贈少師節度使追封鎮王謚昭肅有司討論墳制增修之加封嗣榮王與芮武康寧江軍節度使依前太師判宗正事詔撫勞邊防將士監察御史劾宦官李忠輔何舜卿等贓罪並竄遠方戊戌詔儒臣日侍經筵輔臣觀講乙未命洪天錫以侍御史兼侍讀十二月辛丑詔改明年爲咸淳元年行銅錢關子率貫以七百七十文足壬寅戒賊吏絕貢羨餘甲辰詔以生日爲乾會節初開經筵講殿以熙明爲名禮部尙書馬廷鸞進讀大學衍義序陳心法之要是歲兩浙江東西湖南北廣東西福建成都京西潼川夔利路戶五百六十九萬六千九百八十九口一千三百二萬六千五百三十二大理寺奏大辟三十三人

咸淳元年春正月辛未朔日有食之丞相賈似道請爲總護山陵使不允尋下詔獎諭癸酉直學士院留夢炎疏留似道甲戌諫議大夫朱貔孫等亦請改命不報詔臨安免征商三月丙子京湖制置使呂文德辭免不允二月庚申置籍中書記諫官御史言事歲終以考成績三月癸酉似道乞解機政不允壬午京

湖制司勅招鎮邊軍甲申葬理宗於永穆陵夏四月壬寅賞四川都統咎萬壽  
雲頂山金堂峽之功及其將士丁未壽崇節免徵臨安官私房僦地錢戊申乾  
會節如上免徵再免在京征商三月自是祥慶災異寒暑皆免戊午賈似道特  
授太師己未幸景靈宮發米八萬石贍京城民夔路都統王勝以李市沙平之  
戰獲功轉官兩資將士効力者上其名推賞五月己巳追命史彌遠爲公忠翊  
運定策元勳閏月乙巳久雨京城減直糶米三萬石自是米價高卽發廩平糶  
以爲常丁未發錢二十萬贍在京小民錢二十萬賜殿步馬司軍人錢二萬三  
千賜宿衛自是行慶恤災或遇霖雨雪寒咸賜如上數以江萬里參知政事王  
燾同知樞密院事權參知政事馬廷鸞端明殿學士簽書樞密院事丁巳以錢  
三十萬命臨安府通變平物買丁卯故成都馬步軍總管張順歿於王事詔特  
贈官五轉其子與入官恩澤六月乙酉名理宗御製之閣曰顯文置學士直學  
士待制直閣等官戊子沿海制置使葉夢鼎三辭免不允己丑名理宗原廟殿  
曰章熙秋七月丁酉太白晝見初命迪功郎鄧道爲韶州相江書院山長主祀

先儒周惇頤壬寅參知政事江萬里乞歸田里不允戊申夔路安撫徐宗武城  
開達石城乞推恩從之壬戌督州縣嚴錢法禁民間用牌帖癸亥以諒陰命宰  
執類試阮登炳以下依廷試例出身禁在京置窠柵私繫囚八月庚辰命陳奕  
沿江按閱軍防賜錢二十萬給用丁亥詔有司收民田租或掙克無藝監司其  
嚴禁戢違禁者有刑甲午大元元帥阿木帥大軍至廬州及安慶諸路統制范  
勝統領張林正將高興副將孟興逆戰沒於陣詔勝等各官其一子進勇副尉  
九月己酉以洪天錫爲工部侍郎兼侍讀壬子命宰執訪司馬光蘇軾朱熹後  
人賢者能者各上其名錄用癸丑呂文德言京湖制帥策應三司官屬乞推恩  
詔各進一秩庚申吏部侍郎李常上七事曰崇廉恥嚴鄉舉擇守令黜貪污讞  
疑獄任儒師修役法冬十月壬申減四川州縣鹽酒課始自景德四年正月一  
日再免徵三年乙亥減田契稅錢什四庚辰江安州潼川安撫司以攻懷簡小  
富砦戰圖來上詔優荅以賞十一月乙未兄少保保寧軍節度使致仕乃裕薨  
贈少傅追封臨川郡王

二年春正月癸丑江萬里四請歸田乞祠祿不允以爲湖南安撫使兼知潭州  
二月乙巳侍講范東叟奏正心之要有三曰進德曰立政曰事天上嘉納焉戊  
寅詔免湖南漕司積年運上峽米耗折逋直辛卯詔左右史循舊制立侍御坐  
前三月庚子賞夔路總管張喜等防護開達軍功將士進官有差乙巳詔郡守  
兩年爲任方別授官戊申賜勅書獎諭呂文德夏四月乙丑洪天錫三請祠不  
允以顯文閣待制知潭州兼湖南安撫使甲申侍御史程元岳上言帝王致壽  
之道在修德後世怵邪說以求之往轍可鑒修德之目有三曰清心曰寡欲曰  
崇儉皆致壽之原上嘉納之丁亥授信州布衣徐直方史館編校五月癸丑詔  
諸節制將帥討軍實節浮費毋占役兵士致妨訓練六月丁丑給羅鬼國化州  
印壬午以衢州饑命守令勸分諸藩邸發廩助之秋七月壬辰祈雨詔以來年  
正月一日郊壬寅禮部侍郎李伯玉言人材貴乎善養不貴速成請罷童子科  
息奔競以保幼稚良心詔自咸淳三年爲始罷之八月甲申安南國遣使賀登  
位獻方物九月丙辰浙西安撫使李芾以臺臣黃萬石等言削兩秩免冬十一

月辛丑兩淮制置使李庭芝立城屯駐武銳一軍以工役費用及圖來上詔獎勞之乙卯少師致仕趙葵薨贈太傅賜諡忠靖丁巳利東安撫使知合州張珩調統制史炤監軍王世昌等復廣安大梁城詔推爵賞有差十二月丁丑申嚴戢貪之令甲申以請先帝諡祭告天地宗廟社稷丙戌奉冊寶請於南郊上諡曰建道備德大功復興烈文仁武聖明安孝皇帝廟號理宗大理寺奏歲終大辟三十五人

三年春正月己丑朔郊大赦丁酉奉皇太后寶上尊號曰壽和辛丑壽和太后冊寶禮成謝堂等二十七人各進一秩高平郡夫人謝氏等二十二人各進封特封有差癸卯冊命妃全氏爲皇后戊申帝詣太學謁孔子行舍菜禮以顏淵曾參孔伋孟軻配享顓孫師升十哲邵雍司馬光升列從祀雍封新安伯禮部尙書陳宗禮國子祭酒陳宜中進讀中庸己酉執經官宗禮講經官宜中各進一秩宜中賜紫章服太學武學宗學國子學宗正等官若醫官監書庫門庖等各進一秩諸齋長諭及起居學生推恩有差乙卯壽和太后親屬謝奕修郭自

中黃興在等二十八人各升補一秩二月己未克復廣安軍詔改爲寧西軍庚申馬光祖再乞致仕不允乙丑詔賈似道太師平章軍國重事一月三赴經筵三日一朝治事都堂丙子樞密院言知夔州夔路安撫徐宗武勅立臥龍山堡圍詔宗武帶行遙郡團練使以旌其勞三月癸卯知房州李鑑及將校杜汝隆夏喜以戰龍光砦有功優與旌賞夏四月庚申壽和太后兩次冊寶族兄弟謝奕實等十五人族姪謝在達等四十七人族姪孫謝鏞等十四人各錫銀十兩帛十疋詔大中大夫全清夫儒科發身懇陳換班靖退可尙特授清遠軍承宣使提舉佑神觀仍奉朝請乙酉張珏護合州春耕戰款龍溪以狀言功詔趣上立功將士姓名五月丁亥朔日有食之戊申詔曰比常命有司按月給百官奉惟官愈卑去民愈親仍聞過期弗予是吏奉吾命不虔也諸路監司其嚴糾劾六月壬戌加授呂文德少傅馬光祖參知政事李庭芝兵部尙書並職任仍舊皇后受冊推恩第全清夫以下十五人官一轉全必燾以下十七人補承信郎癸酉美人楊氏進封淑妃戊寅詔榮王族姻與萊等三十四人各轉官有差秋

七月丁亥張珏授正任團練使帶行左領軍衛大將軍賜金帶壬辰樞密院言  
右武大夫權鄂州都統汪政鄂城戰禦又焚光化城外積聚及攻真陽城皆有  
功該轉十二官詔轉橫行遙郡甲午四川都統咎萬壽調統制趙寶楊立等率  
舟師護糧達渠城以功推賞己酉權黎州張午招諭大青羌主歸義乞用兩林  
西蕃瑜林仍賜予加優從之八月辛酉遣步帥陳奕率馬軍舟師巡邏江防壬  
戌邊報警急詔論呂文德等申嚴防遏乙丑太師武康寧江軍節度使判大宗  
正事嗣榮王與芮進封福王主榮王祀事壬申久雨命在京三獄赤縣道司僉  
廳擇官審決獄訟毋滯九月乙未詔郡縣折收民田租毋厚直取贏違者論罪  
癸卯知邕州總統譚淵李旺周勝等繇特磨行大理界率兵攻建水州禽其知  
州阿孱以下三百餘人獲馬二百餘焚穀米器甲廬舍師還論功各轉官三資  
軍校補轉有差冬十月庚申復開州賜四川策應司錢百萬勞軍甲戌大雷電  
十一月丙申故左丞相吳潛追復光祿大夫壬寅賞知房州李鑑調遣路將夏  
喜統領馮興等均州武陽壩戰功十二月丙辰呂文煥依舊帶行御器械改知



襄陽府兼京西安撫副使丁卯臺臣言敘復元官觀文殿學士提舉洞霄宮皮龍榮貪私傾險嘗朋附丁大全乞寢新命詔予祠祿

四年春正月癸未賜呂師夔紫章服金帶己丑呂文德言知襄陽府兼京西安撫副使呂文煥荆鄂都統制唐永堅蠟書報白河口萬山鹿門山北師興築城堡檄知郢州翟貴兩淮都統張世傑申嚴備禦癸巳故守合州王堅賜廟額曰報忠癸卯沔州駐劄潼川安撫副使咎萬壽特升右武大夫帶行左驍衛大將軍賜金帶己酉印應雷改知慶元府兼沿海制置使庚戌詔曰邇年近臣無謂引去以爲高勉留再三弗近益遠往往相尙不知其非義也亦由一二大臣嘗勇去以爲衆望相踵至今孟子於齊王不遇故去是未嘗有君臣之情也然猶三宿出晝庶幾改之儒者家法無亦取此乎朕於諸賢允謂無負其弗高尙使人疑於負朕閏月庚午賜夏貴金帶夏四月壬午湯漢三辭免刑部侍郎福建安撫使庚寅乾會節帝御紫宸殿羣臣稱賀上曰謝方叔託名進香擅進金器諸物且以先帝手澤每繫之跋率多包藏至以先帝行事爲己功殊失大臣體

宜鑄一秩於是盧鉞等相繼論列方叔昨蜀廣敗事誤國殄民今又違制擅進  
削一秩罰輕詔削四秩奪觀文殿大學士惠國公罷宰臣恩數仍追寶奎錄并  
繫跋真本來上丙申右正言黃鏞言今守邊急務非兵農合一不可一曰屯田  
二曰民兵川蜀屯田爲先民兵次之淮襄民兵爲先屯田次之此足食足兵良  
策也不報丁酉詔故修武郎姚濟死節立廟賜額曰忠壯五月辛酉樞密都承  
旨高達再辭侍衛都虞候乞歸田里命孫虎臣代之壬申賜陳文龍以下六百  
六十四人進士及第出身丙子賈似道乞骸骨不允六月辛巳葉夢鼎再乞歸  
田里不允詔罷浙西諸州公田莊官募民自耕輸租租減什三毋私相易田違  
制以盜賣官田論秋七月戊午有星出氐宿西北急流入騎官星沒己未淑妃  
楊氏親屬楊幼節以下百三十四人推恩進秩八月壬寅奉安寧宗實錄理宗  
實錄御集日曆會要玉牒經武要略咸淳日曆玉牒賈似道葉夢鼎馬廷鸞各  
補轉兩官諸局官若吏推恩有差九月癸未太白晝見大元兵築白河城始圍  
襄樊冬十月戊寅朔日有食之子憲生參知政事常挺六乞歸田里詔予郡己

亥已減四川州縣鹽酒課詔自咸淳四年始再免徵三年十一月癸丑樞密院言南平紹慶六郡鎮撫使韓宣城渝嘉開遠常武諸州有勞繇峽州至江陵水陸措置盡瘁以死宜視沒於王事加恩詔宣守本官致仕任一子承節郎仍贈正任承宣使丁巳詔知江陵府陳奕禪將周全王德等戰西山南谷口田家山有功各以等第推賞戊午子鏗生丙寅福建安撫使湯漢再辭免乞祠祿詔別授職辛未以文武官在選困於部吏隆寒旅瑣可閔詔吏部長貳郎官日趣銓注小有未備特與放行違者有刑自是隆寒感暑申嚴誠飭常挺卒贈少保壬申行義役法十二月辛卯以夏貴爲沿江制置副使兼知黃州癸巳史館狀理宗實錄接續起修張九成孫象先力學飭行不墜家聲其免一解示表厲命建康府建南軒書院祠先儒張栻戊戌汪立信知潭州兼湖南安撫使職任依舊乙巳詔賞京湖總管張喜趙萬等石門坂堰戰功

五年春正月丁未以李庭芝爲兩淮安撫制置大使兼知揚州壬子京湖策應司參謀呼延德領諸將張喜等遇北兵戰於蠻河癸亥葉夢鼎累章請老留之

固辭依前少保判福州福建安撫使封信國公以馬廷鸞參知政事兼同知樞密院事甲戌以江萬里參知政事二月戊子江萬里辭免參知政事不允三月丙午北帥阿朮自白河以兵圍樊城甲寅葉夢鼎辭免判福州福建安撫使詔不允乙卯皇后歸寧族媼推恩保信軍節度使全清夫以下五十六人各進一秩咸安郡夫人全氏以下三十二人各特封有差大元兵城鹿門己未詔浙西六郡公田設官督租有差辛酉京湖都統張世傑率馬步舟師援襄樊戰於赤灘圍戊辰以江萬里爲左丞相馬廷鸞爲右丞相兼樞密使己巳以馬光祖知樞密院事兼參知政事吳革沿江制置使夏四月丙子賞張世傑戰功辛巳江萬里馬廷鸞辭免詔不允壬午知渠州張資上蓬州界白土神山蒲渡等處今年春戰功丙戌以安西都統張朝寶利東路安撫張珏領兵護錢粟餉寧西軍還至水磴頭戰有功詔推賞己丑劉雄飛依舊樞密都承旨知沅州兼常德澧辰沅靖五郡鎮撫使癸巳李庭芝特進一秩高郵縣夏世賢七世義居詔署其門五月己酉馬光祖依舊觀文殿學士提舉洞霄宮乙卯程元鳳薨贈少師庚

申有星自斗宿距星東北急流向牛宿至濁沒壬戌詔信陽諸將婁安邦朱興戰千石畷呂文煥呼延德戰福山楊青李忠戰石湫俱有勞效推賞有差壬申京湖制司言故夔路安撫徐宗武沒於王事乞優加贈恤詔致仕恩外特官其一子承節郎六月庚辰以呂文福爲復州團練使知濠州兼淮西安撫副使甲申皇子昀生辛卯家鉉翁辭免新命詔別授職庚子李庭芝辭免兼淮東提舉不允秋七月己酉觀文殿學士馬光祖乞守本官致仕詔允所請庚申祈雨壬戌東南有星自河鼓距星西北急流至濁沒八月戊寅詔郡縣收民田租毋巧計取贏毋厚直折納轉運司申嚴按劾詔襄樊將士戰禦宣力以錢二百萬犒師趣上其立功姓名補轉官資九月丙午祈晴辛酉祀明堂大赦丙寅明堂禮成加上壽和聖福皇太后尊號冊寶太師判大宗正事福王主榮王祀事與芮加食邑一千戶冬十月甲申子憲授檢校太尉武安軍節度使封益國公己丑呂文德進封崇國公加食邑七百戶以湯漢爲顯文閣直學士提舉玉隆萬壽宮兼象山書院山長十一月戊辰少傅文德乞致仕詔特授少師進封衛國公

依所請致仕十二月癸酉文德卒贈太傅賜諡武忠己卯以范文虎爲殿前副都指揮使壽和聖福皇太后尊號冊寶禮成姪謝堂姪孫光孫等二十八人各轉一官餘姻推恩有差甲申以錢二百萬命京湖帥臣給犒襄郢等處水陸戍士戊子詔安南國王父陳日昷國王陳威晃並加食邑一千戶大元兵築南新城

六年春正月壬寅以李庭芝爲京湖安撫制置使兼夔路策應使印應雷雨淮安撫制置使己酉以錢二百萬賜夔路策應司備禦賞給庚戌以高達爲湖北安撫使知鄂州孫虎臣起復淮東安撫副使知淮安州辛酉行成天曆丁卯上製字民牧民二訓以戒百官戊辰以江萬里爲福建安撫使二月辛未檢校少保安德軍節度使與萊加食邑五百戶丁亥陳宜中經筵進講春秋終篇賜象簡金御仙花帶鞍馬丁酉以呂文福爲淮西安撫副使兼知廬州己亥朱禔孫權兵部尙書仍四川安撫制置總領夔路轉運知重慶府三月庚子朔日有食之癸丑詔曰吏以廉稱自古有之今絕不聞豈不自章顯而壅於上聞歟其令

侍從卿監郎官各舉廉吏將顯擢焉癸亥詔贛吉南安境數被寇雖有砦卒寇出沒無時莫能相救宜卽要衝立四砦砦屯兵百使地勢聯絡禦寇爲便從三郡擇將官領之夏四月戊寅以文天祥兼崇政殿說書五月辛丑以吳革爲沿江制置宣撫使六月庚午詔太極圖說西銘易傳序春秋傳序天下士子宜肄其文戊寅賈似道託疾辭退疏十數上上留益堅禮異之曰師相而不名馬廷鸞洎省部臺諫學館諸司連章請留似道庚辰子憲薨庚寅詔以襄郢水陸屯戍將士隆暑露處出錢二百萬命京湖制司給賜秋七月復開州己亥更鑄印給之八月甲申瑞安府樂清縣嘉禾生詔薦士增四名壬辰詔郡縣行推排法虛加寡弱戶田租害民爲甚其令各路監司詢訪亟除其弊詔精擇監司守令監司察郡守郡守察縣令置籍考覈歲終第其治狀來上癸巳以夏貴能舉職事進一秩詔似道十日一朝九月庚戌以黃萬石爲沿海制置使壬子台州大水冬十月丁丑遣范文虎總統殿司兩淮諸軍往襄樊會合備禦賜錢百五十萬犒師己卯詔台州發義倉米四千石并發豐儲倉米三萬石振遭水家甲申

以陳宗禮趙順孫兼權參知政事依舊同提舉編修敕令經武要略閏十月己酉安吉州水免公田租四萬四千八十石戊午詔殿步馬諸軍貧乏陣沒孤遺者多方此隆寒其賜錢二十萬米萬石振之十一月丁丑嘉興華亭兩縣水免公田租五萬一千石民田租四千八百一十石庚辰詔襄郢屯戍將士隆寒可閔其賜錢二百萬犒師己丑都統張世傑領兵江防乙未詔陳宗禮進一秩爲資政殿學士依所請守兼參知政事致仕十二月戊戌陳宗禮卒贈七秩己亥詔唐全張興祖等齋蠟書入襄陽往復甚艱各補轉三官賜錢二千緡大元兵築萬山城

七年春正月乙丑子是授左衛上將軍進封建國公詔湯漢洪天錫赴闕詔戒貪吏辛未紹興府諸暨縣湖田水免租二千八百石有奇三月戊寅發屯田租穀十萬石振和州無爲鎮巢安慶諸州饑辛巳日暈赤黃周匝乙酉平江府饑發官倉米六萬石吉州饑發和糴米十萬石皆減直振糴丙戌詔減內外百司吏額戊子發米一萬石往建德府濟糴詔臨江軍宣聖四十七代孫延之子孫



與放國子監試夏四月辛亥免廣東提舉司鹽籴銀三萬兩甲寅禮部侍郎陳  
宜中再乞補外以顯文閣待制出知福州兼福建路安撫使五月乙酉賜禮部  
進士張鎮孫以下五百二人及第出身壬辰發米二萬石詣衢州振糶六月癸  
巳以錢百萬銀五千兩命知嘉定府咎萬壽修城浚壕繕甲兵備禦遏以韓震  
帶行御器械知江安州兼潼川東路安撫副使馬堃帶行御器械知咸淳府節  
制涪萬州臺臣劾朱善孫督綱運受贓四萬五千詔特貸死配三千里禁錮不  
赦乙未詔以蜀閬調度浩繁賜錢二百萬給用丙申諸暨縣大雨暴風雷電發  
米振遭水家瑞州民及流徙者飢乏食發義倉米一萬八千石減直振糶己亥  
詔以陸九淵孫溥補上州文學己酉鎮江府轉輸米十萬石於五河新城積貯  
癸丑以隆暑給錢二百萬賜襄郢屯戍將士丙辰撫州黃震言本州振荒勸分  
前穀城縣尉饒立積米二百萬斬不發廩雖嘗監貸宜正遏糴之罪詔饒立削  
兩秩武岡軍居住洪天錫三辭召命詔守臣勉諭赴闕戊午紹興府饑振糧萬  
石己未兩淮五河築城具完賜名安淮軍大元會兵圍襄陽秋七月辛未樞密

院言吳信周旺齋蠟書入襄城往復効勞詔各補官三轉丁丑湖南轉運司訪求先儒張栻後人義倫以聞詔補將仕郎壬午四川制置使朱禕孫言夏五以來江水凡三泛溢自嘉而渝漂蕩城壁樓櫓圯壞又嘉定地震者再被災害爲甚乞賜黜罷上答天譴詔不允癸未詔城五河淮東制置印應雷具有勞績進一秩宣勞官屬將士皆推恩八月壬辰朔日有食之甲午以錢三百萬遣京湖制置李庭芝詣郢州調遣犒師丁未命沿江制置副使夏貴會合策應以錢二百萬隨軍給用九月乙亥顯文閣直學士湯漢顯文閣直學士洪天錫各五辭召命詔並升華文閣學士仍予祠祿己丑子彞生冬十月丙申少傅嗣秀王與澤薨詔贈少師追封臨海郡王癸丑從政郎朱鑿孫進羣經要略己未詔殿步馬諸軍貧乏陣沒孤遺者方此隆寒其賜錢二十萬米萬石振之十一月癸亥詔民有以孝弟聞於鄉者守令其具名上聞將旌異勞賜焉己巳詔湯漢官一轉端明殿學士依所請致仕十二月甲午詔諸路監司循按刑獄廉從擾民御史臺申嚴覺察丙午以錢三十萬命四川制司下渠洋開州寧西鎮撫使張朝

寶劄司犒帥己亥淮東統領兼知鎮江府趙潛乞祠祿不允謝方叔特敘復元官職惠國公致仕辛亥初置士籍戊午詔舉廉能材堪縣令者侍從臺諫給舍各舉十人卿監郎官各舉五人制帥監司各舉六人知州軍監各舉二人

八年春正月庚申詔朕惟崇儉必自宮禁始自今宮禁敢以珠翠銷金爲首飾服用必罰無貸臣庶之家咸宜體悉工匠犯者亦如景祐制必從重典又詔有虞之世三載考績三考黜陟幽明漢之爲吏者長子孫則其遺意也比年吏習媮薄人懷一切計日待遷事未克究又望而之他吏胥狎玩竊弄官政吾民奚賴焉繼自今內之郎曹外之牧守以上更不數易其有治狀昭著自宜獎異辛未子昺生己丑湯漢卒賜諡文清二月癸巳謝方叔卒贈少師前知台州趙子寅歿無所歸特贈直祕閣給沒官宅一區田三百畝養其孤遺以旌廉吏丙午以錢二百萬給犒襄郢水陸戰戍將士三月丙子同知樞密院事兼權參知政事趙順孫授中大夫夏四月戊子知合州利路安撫張珏劄築宜勝山城五月己巳王燭除觀文殿學士提舉萬壽觀兼侍讀大元兵久圍襄樊援兵阨關險

不克進詔荆襄將帥移駐新郢遣部轄張順張貴將死士三千人自上流夜半輕舟轉戰比明達襄城收軍閱視失張順六月丙申皮龍榮徙衡州丁酉以章鑑爲端明殿學士同簽書樞密院事同提舉經武要略以錢千萬命京湖制司糴米百萬石轉輸襄陽府積貯乙巳以家鉉翁兼權知紹興府浙東安撫提舉司事以唐震爲浙西提點刑獄王燾乞寢新命不允勉諭赴闕辛亥臺臣言江西推排由結局已久舊設都官團長等虛名尙在占悞常役爲害無窮又言廣東運司銀場病民詔俱罷之癸丑以錢五百萬緡命四川制司詣湖北糴運上峽入夔米五十萬石秋七月辛未知靜江府廣西經略安撫使兼計度轉運使胡穎乞祠祿詔勳一轉依所乞宮觀八月丙戌朔日有食之辛丑詔家鉉翁赴闕丁未紹興府六邑水發米振遭水家壬子王燾辭免明堂大禮陪祠乙卯詔福建安撫陳宜中克舉厥職升寶謨閣待制九月丁卯詔洪天錫轉端明殿學士允所請致仕辛未明堂禮成祀景靈宮還遇大雨改乘逍遙輦入和寧門肆赦庚辰詔以朱禔孫兼四川屯田使乙酉洪天錫卒贈五官諡文毅冬十月己

亥紹興府言八月一日會稽餘姚上虞諸暨蕭山五縣大水詔減田租有差丁未以章鑑兼權參知政事右丞相馬廷鸞十疏乞骸骨詔不允庚戌以秋雨水溢詔減錢塘仁和兩縣民田租什二會稽湖田租什三諸暨湖田租盡除之辛亥陳宜中兼給事中十一月乙卯右丞相馬廷鸞累疏乞骸骨授觀文殿學士知饒州詔以隆寒殿步馬司諸軍貧窶并陣沒孤遺者振以錢粟丙辰陳弈以殿前都指揮使攝侍衛步軍司馬軍司己未馬廷鸞辭免知饒州乞祠祿詔允所請以觀文殿大學士鄱陽郡公提舉洞霄宮壬戌命阮思聰赴樞密院稟議己巳詔明堂禮成安南國王陳日煚陳威晃各加食邑一千戶賜鞭鞍馬等物十二月甲寅以葉夢鼎爲少傅右丞相兼樞密使

九年春正月乙丑樊城破范天順牛富死之癸未詔定安豐統制金文彪朱文廣王文顯盛全滅河古河泉河珉河等處戰功行賞二月甲申詔鄂州左水軍統制張順沒身戰陣贈寧遠軍承宣使官其二子承信郎立廟京湖賜額曰忠顯甲午朱禊孫撫綏備禦義不辭難敕書獎諭丁未以夏貴檢校少保庚戌呂

文煥以襄陽府歸大元癸丑以朱澗寺戰功推賞來歸人馬宣沿江都統王喜等將士千五百七十餘人三月庚申賈似道言邊遽日聞請身督師以勵將帥詔不允四川制司言近出師成都劉整故吏羅鑑自北復還上整書稿一帙有取江南二策其一曰先取全蜀蜀平江南可定其二曰清口桃源河淮要衝宜先城其地屯山東軍以圖進取帝覽奏亟詔淮東制司往清口擇利城築以備之葉夢鼎辭免右丞相詔不允庚午遣金吾衛上將軍阮思聰由平江鎮江及黃州行視城池凡合繕修增易者亟條奏丙子來歸人方德秀補成忠郎栗勇楊林胡巨川補保義郎劉全補承信郎戊寅賈似道始奏李庭芝表言襄帥呂文煥以城降大元己卯加咎萬壽寧遠軍承宣使職任仍舊庚辰夏貴辭免檢校少保不允壬午詔建機速房以革樞密院漏泄兵事稽違邊報之弊賈似道累疏請身督師詔勉留夏四月詔襄襄城死節右領衛將軍范天順贈靜江軍承宣使右武大夫馬司統制牛富贈金州觀察使各官其二子承信郎賜土田金幣恤其家甲申汪立信權兵部尚書京湖安撫制置使知江陵府夔路策應

使湖廣總領不許辭免以錢二百萬給立信開閩犒師葉夢鼎乞致仕遣官勉諭赴都堂治事辛卯以趙潛爲淮西總領兼沿江制置建康留守詔黃萬石赴闕壬辰詔襄陽六年之守一旦而失軍民離散痛切朕心今年乾會節其免集英殿宴以錢六十萬給沿江制置趙潛江防捍禦癸巳知招信軍陳巖乞祠祿詔曰迺者邊吏弗戒致有襄難將士頻歲暴露邊方蕩析離居盡傷朕心爾聞臣專征方面宜身率諸將宣揚國威以賞戮用命不用命爾守臣有土有民宜申儆國人保固封守爾諸將尙迪果毅一乃心力各以其兵敵王所愾今朕多誥爾其悉聽明訓毋懈毋慳習於故常功多有厚賞爾不克用勸罰固不得私也又如中外小大臣僚有材識超卓明控御之宜懷攻守之略者密具以聞一如端拱二年制書朕當虛心以聽李庭芝乞解罷詔赴闕壬寅詔復置樞密院都統制副都統制各一員丁未以高達爲寧江軍節度使湖北安撫使知峽州詔忠州潛藩已升咸淳府刺史王達改授高州刺史李庭芝辭召赴闕詔與祠己酉詔南歸人復有戰功者予優賞楊春薛聚成陳君謨周海周與各補成忠

郎蕭成侯喜丁甫劉鑄鄭歸各補承信郎以夏貴兼侍衛馬軍都指揮使庚戌詔汪立信賞罰調用悉聽便宜行事辛亥呂師夔言比賈似道得李庭芝書報臣叔父文煥以襄城降臣聞之隕越無地不能頃刻自安請以經略安撫轉運靜江府印委次官護之席藁俟命容臣歸省偏親誓當趨事赴功毀家紓難以贖門戶之愆以報君父之造詔不允五月乙卯以黃萬石權戶部尙書兼知臨安府浙西安撫使四川制司朱禔孫言所部諸縣除正辟文臣外諸郡屬邑許今本司不拘外縣一體選辟文臣以幸蜀之士民奏可丙辰知廬州呂文福言從兄文煥以襄陽降爲其玷辱何顏以任邊寄乞放罷歸田里詔不允呂師夔五疏乞罷任詔赴闕丁卯申禁奸民妄立經會私剗菴舍以避征徭保伍容芘不覺察坐之辛未劉雄飛乞致仕戊寅孝感縣丞關應庚上書言邊防二十事詔授武當軍節度推官兼司法京湖制司量材任使庚辰馬軍司統制王仙昔在襄樊緣戰陷陣今復來歸特與官五轉充殿前司正額統制賜錢一萬布衣林椿年等上書言邊防十數事詔諸人上書凡言請以丞相似道督視者不允



餘付機速房六月刑部尙書兼給事中陳宜中言樊城之潰牛富死節尤著以職卑贈恤下范天順一階未愜輿情詔加贈富寧遠軍承宣使仍賜土田金幣恤其家前四川宣撫司參議官張夢發詣賈似道上書陳危急三策曰鎮漢江口岸曰城荆門軍當陽界之玉泉山曰岷州宜都而下聯置堡砦以保聚流民且守且耕并圖上城築形勢賈似道不以上聞下京湖制司審度可否事竟不行成都安撫使咎萬壽去冬調將士攻毀成都大城今春戰礮門五月遣統制楊國寶領兵至雅州統領趙忠領兵至眉州兩路捍禦有勞詔具將士宣力等第姓名以聞呂文福言文煥爲人扶擁以襄陽降非由己心詔與李庭芝元陳異同其審覈以聞庭芝表向在京湖來歸人吳旺等備言文煥父子降狀先納筦鑰旋獻襄城且陳策攻郢州請自爲先鋒言人人同制司案辭可徵非敢加誣人罪詔文福勉力捍禦毋墜家聲京湖制司言去年冬間探司總管劉儀盛聰總制趙鐸領精銳至均州文龍崖立砦呂文煥既降均城受敵知郡劉懋偕劉儀等扞禦宣勞詔懋升右武大夫帶行左衛大將軍仍舊職儀添差荆湖北

路兵馬鈐轄聰添差鄂州兵馬鈐轄各官三轉將士官兩轉左藏東庫蹇材望上書言邊事大可憂者七急當爲者五不報丙戌劉雄飛卒特贈一官戊子京湖制司請給器械詔內軍器庫選犀利者賜之仍贈錢百萬備修繕四川制置朱禊孫言月奉銀計萬兩願以犒師向後月免請詔常祿勿辭己丑給事中陳宜中言乞正文虎不力援襄之罰詔文虎降一官依舊知安慶府安南國進方物特賜金五百兩帛百疋癸卯汪立信言臣奉命分閩延見吏民皆痛哭流涕而言襄樊之禍皆由范文虎及俞興父子文虎以三衙長門難怯戰僅從薄罰猶子天順守節不屈猶或可以少贖其愆與奴僕庸材器量褊淺務復私讎激成劉整之禍流毒至今其子大忠挾多資爲父行賄且自希榮進今雖寸斬未足以快天下之忿乞寘重典則人心興起事功可圖詔俞大忠追毀出身文字除名循州拘管又言守關進義副尉童明襄陽破拔身來歸且嘗立功開州乞補轉四官詔特與官兩轉閏月辛亥命殿前指揮使陳奔總統舟師備鄂州黃州江防癸丑來歸人郭珍補成忠郎張進張春張德林向德成王全婁德王

興各補承信郎丙辰朝散郎師顯行進注皇朝文鑑前臨安府司法梁炎午陳  
攻守之要五事不報命大理寺丞鍾蜚英點視沿江堡隘兵船戊辰知敘州郭  
漢傑言馬湖蠻王汝作鹿巫蠻王沐丘帥蠻兵五百餘助官軍民義阻險馬湖  
捍禦有功詔賞汝作沐丘金帛及其部兵有差敘州總管曹順一軍凡在戰陣  
者趣具立功等第來上秋七月丁亥權紹興府節制紫城軍義文榮鼎及將校  
趙居敬丁福孟青蒲祥白貴史用羅宜王繁等九人成都之役沒於兵各追贈  
官秩仍官其子癸巳知達州趙章知開州鮮汝忠知渠州張資等復洋州戊戌  
張珏等復馬驤山八月癸丑權知均州徐鼎總管威聰戰房州胡師峪板倉乙  
卯知房州李鑑調權竹山縣王國材統制熊權總轄馬宗明戰落馬坪白羊山  
詔有司各以勞效論賞九月辛巳以章鑑簽書樞密院事兼參知政事陳宜中  
同簽書樞密院事成都安撫使咎萬壽城嘉定烏尤山乙未以洪燾爲浙東安  
撫使丙申以黃萬石爲湖南安撫使冬十月己酉來歸人汪福許文政各官五  
轉癸丑鎮巢軍和州太平州諸將查文李文用孟浩等十一人以射湖岡萬歲

嶺後港及焦湖北岸戰功咸賜爵賞癸亥雷四川制司言何炎向失洋州調知  
達州趙章等率諸部軍義復之七月又復洋州吳勝堡兩城權檄統轄謝益知  
洋州總制趙桂楫知巴州俾任責吳勝堡戰守之事至是以功來上且以二州  
攝事守臣請命於朝詔與正授丁丑兩淮制置使印應雷告老進二秩致仕李  
庭芝兩淮安撫制置使賜錢二百萬激犒備禦十一月壬午子焘授左衛上將  
軍封嘉國公戊子知秦州龔灤遣其將王大顯等捍禦水砦有功又獲俘民以  
還詔水步兩軍將校凡用命者賞激有差甲午以夏貴爲淮西制置使兼知廬  
州陳奕沿江制置使兼知黃州呂文福知閣門事詔從李庭芝請分淮東西制  
置爲兩司就命庭芝交割淮東仍兼淮西策應使乙未以夏貴爲淮西安撫制  
置使賜錢百萬激犒備禦李庭芝辭免淮西策應使不允知安豐軍陳萬以舟  
師自城西大澗口抵正陽城遇北兵力戰詔旌其勞十二月甲子以馬廷鸞爲  
浙東安撫使知紹興府丙寅權參知政事章鑑再乞解機政不允丁丑沿江制  
置使所轄四郡夏秋旱澇免屯田租二十五萬石

十年春正月壬午城鄂州漢口堡權總制施忠部將熊伯明知泰州龔灤以天長縣東橫山秦潼湖青蒲口等處戰功推賞戊子江萬里以疾辭職任詔依舊觀文殿大學士提舉洞霄宮乙丑以留夢炎知潭州兼湖南安撫使庚寅城鄂州沌口西岸堡京湖制司言襄陽勇信中軍鈐轄吳信隨呂文煥北往今并妻子冒險來歸詔吳信赴闕制司仍存恤其家丙申江東沙圩租米以咸淳九年水災詔減什四乙巳兩土二月己酉以趙順孫爲福建安撫使辛酉詔諸制閫就任升除恩數其告命衣帶鞍馬閣門勿差人給賜往要厚賂以失優寵制臣之意違者有刑三月己卯免郡縣侵負義倉米七十四萬八千餘石夏四月乙卯子曷授左衛上將軍進封永國公詔賞沿江都統王達黃侯戰黃連寺之功戊午以呂文福爲常德辰沅澧靖五郡鎮撫使知沅州辛酉詔賞光州守陳岩路分李全許彥德總管何成路鈐仰子虎等牛市販丁家莊戰功烏蘇蠻王詰雲南軍前納款大元五月丁亥以高世傑爲湖北安撫副使兼知岳州總統出戍軍馬辛丑馬廷鸞辭免觀文殿大學士知紹興府浙東安撫使詔不允壬寅

張珏表請城馬駿虎頭兩山或先築其一以據險要六月戊午以銀二萬兩命壽春府措置邊防秋七月壬午汪立信乞致仕不允癸未帝崩於福寧殿遺詔太子熈卽皇帝位甲申臺臣劾內醫蔡幼習詔奪五秩送五百里州軍居住二子並罷閣門職八月己酉上大行皇帝諡曰端文明武景孝皇帝廟號度宗德祐元年正月壬午葬於永紹陵

贊曰宋至理宗疆宇日蹙賈似道執國命度宗繼統雖無大失德而拱手權奸衰敝寢甚考其當時事勢非有雄才睿略之主豈能振起其墜緒哉曆數有歸宋祚尋訖亡國不於其身幸矣

宋史卷四十六

...

...

...

...

...

...

...

...

...

...

...

宋史卷四十七

元 中 書 右 丞 丞 相 總 裁 脫 脫 等 修

本紀第四十七

瀛國公 二王附

瀛國公名焘度宗皇帝子也母曰全皇后咸淳六年九月己丑生於臨安府之  
大內九年十一月授左衛上將軍封嘉國公十年七月癸未度宗崩奉遺詔即  
皇帝位於柩前年四歲謝太后臨朝稱詔甲申兄昞保康軍節度使開府儀同  
三司進封吉王加食邑一千戶弟昺保寧軍節度使開府儀同三司進封信王  
加食邑一千戶命平章賈似道依文彥博故事獨班起居丙戌上皇太后尊號  
曰壽和聖福太皇太后皇后曰皇太后又詔以生日為天瑞節戊子命臨安府  
振贍細民辛卯以朱禩孫為京湖四川宣撫使兼知江陵府壬寅詔撫三邊將  
士命州郡舉遺逸除浙西安撫司兩浙轉運司臨安府見進贓賞錢詔求言八  
月甲辰詔乞言於老臣江萬里葉夢鼎馬廷鸞留夢炎趙順孫王爚李庭芝築



清河城以圖來上詔庭芝進一秩宣勞將士具名推賞加知鄂州李雷應守軍器監知太平州孟之縉尙書兵部員外郎知江州錢真孫直寶章閣知鎮江軍洪起畏直敷文閣癸丑大霖雨天目山崩水涌流安吉臨安餘杭民溺死者亡筭甲寅太皇太后以老不能御正衙命暫以慈元殿爲後殿辛酉作度宗廟戊辰以全清夫爲昭信軍節度使謝堂檢校少保謝垕保康軍節度使馬廷鸞乞骸骨歸田里詔趣之任九月丁丑資政殿大學士光祿大夫王燦乞致仕詔不允戊寅發米振餘杭臨安兩縣水災餘杭災甚再給米二千石己卯似道乞免答拜從之辛巳覆試文武舉士人壬午覆試文武舉士人癸未大元兵大會於襄陽丙戌丞相伯顏將一軍趣郢州元帥唆都將一軍入淮翟招討將一軍徇荆南丁亥大元軍薄郢州戊子免被水州縣今年田租甲午初開經筵丁酉天瑞節免徵臨安府公私房賃錢十日以金符十三銀符百給夏貴激賞奇功己亥試正奏名進士賜王龍澤以下出身有差壬寅有星見西方委曲如蚓復州副將翟國榮遇大元兵戰爛泥湖死之閩中旱冬十月丙午知達州趙章復洋

州加右驍騎尉中郎將大元兵破渠州禮義城知州張資自殺丁未饒州布衣董聲應進諸史纂約兵鑑刑鑑詔聲應充史館編校文字癸丑上度宗諡廣西經略司權參議官邢友龍擊潮州漳州寇破之乙卯令州縣行義田義役丁巳友龍以下諸將各轉官有差大元兵及郢州都統制張世傑力戰禦之遂去由藤湖入漢戊午郢州副都統趙文義追戰全子湖死恤其家庚申贈翟國榮復州團練使官其二子立廟復州壬戌以錢百萬給郢城屯戍將士甲子詔以明年爲德祐元年乙丑以章鑑同知樞密院事兼權參知政事陳宜中簽書樞密院事兼權參知政事大元兵徇沙洋城京湖宣撫司遣總管王虎臣援之丙寅城破虎臣與守隘官王大用皆被執熒惑犯鎮星大元兵至新城戊辰總制黃順出降己巳副總制仁寧出降都統制邊居義力戰城破赴火死知復州翟貴以城降閩中地震十一月癸酉以朱禔孫爲京湖四川宣撫使丁丑命沿江制置使趙潛巡江策應賜錢百萬激賞戰功戊寅馬廷鸞力辭浙東安撫使知紹興府詔依舊觀文殿大學士提舉洞霄宮贈趙文義清遠軍節度使與其兄威

武軍節度使文亮共立廟揚州賜名傳忠庚辰以陸秀夫爲淮東安撫制置司  
參議官壬午削諸班直溢額人癸未至乙酉覆試特奏名士人丙戌以王燾爲  
左丞相章鑑爲右丞相並兼樞密使似道自九月乞命左右丞相至是從之以  
張晏然兼京湖四川宣撫司參議官乙丑至庚寅覆試特奏名士人壬辰至癸  
巳如上覆試甲午括邸第戚畹及御前寺觀田令輸租丁酉加安南國王陳日  
煚寧遠功臣其子威冕奉正功臣十二月癸卯朔命建康府太平州池州振避  
兵淮民以隆寒勞賜京湖及沿江戍守將士甲辰詔淮西四郡水旱去年屯田  
未輸之租其勿徵丁未提舉興國宮呂師夔請募兵江州詔知州錢真孫同募  
尚書省以錢米給之癸丑大元兵攻陽邏堡夏貴以兵力守武定軍都統制王  
達戰死乙卯大元兵夜以偏師乘雪渡青山磯丙辰都統程鵬飛鏖戰被重創  
歸鄂州都統高邦憲屯馬家渡棄舟走被執大元兵復攻夏貴於陽邏堡都統  
制劉成以定海水軍戰死貴敗沿江縱兵大掠歸廬州朱禊孫將兵至鄂州聞  
鄂兵敗夜奔江陵府己未權知漢陽軍王儀以城降呂文煥以北兵攻鄂州庚

申程鵬飛及權守張晏然以城降幕僚張山翁不屈諸將欲殺之丞相伯顏曰  
義士也釋之詔錢塘仁和兩縣民年七十至九十已上者賜帛及酒米癸亥詔  
似道都督諸路軍馬以步軍指揮使孫虎臣總統諸軍所辟官屬皆先命後奏  
詔天下勤王甲子起李芾爲湖南提刑乙丑以高達爲湖北制置使兼安撫知  
江陵府詔邊費浩繁吾民重困貴戚釋道田連阡陌安居暇食有司覈其租稅  
收之贈王達清遠軍承宣使庚午度宗梓宮發引至浙江上埃潮漲絕江潮失  
期日晡不至程鵬飛以北兵徇黃州知州陳奕遣人請降於壽昌軍李庭芝以  
兵勤王辛未命州郡節制駐戍經從兵

德祐元年春正月癸酉朔大元兵入黃州甲戌陳奕遣人下蘄州并招其子嚴  
於安東州丁丑知蘄州管景模遣人請降於黃州戊寅詔浙東邸第出米減價  
糶民壬午葬度宗於永紹陵大元兵入蘄州癸未似道以呂師夔權刑部尙書  
都督府參贊軍事任中流調遣乙酉以陳宜中同知樞密院事兼參知政事呂  
師夔錢真孫遣人請降於蘄州丙戌大元兵徇江州知安東州陳巖夜遁邳州

降知壽昌軍胡夢麟寓治於江州丁亥自殺戊子知南康軍葉闡遣人請降於江州似道出師知德安府來與國以城降夔路安撫張起巖與其將代德攻開州復取之己丑知安慶府范文虎遣人以酒饌如江州迎師乙未祔度宗神主於新宮以孫虎臣爲寧武軍節度使戊戌赦京畿罪池州都統張林遣人請降於江州大元兵入安慶范文虎降通判夏椅仰藥死是月知達州鮮汝忠以城降二月癸卯似道以宋京爲都督府計議官使大元軍中甲辰以黃萬石爲江南西路制置使加湖北制置副使高達檢校少保庚戌大元兵入池州權守趙卯發自經死宋京如軍中請稱臣奉歲幣不得請而還辛亥贈劉成清遠軍承宣使乙卯五郡鎮撫呂文福遣所部淮兵入衛降詔褻之丙辰詔勞賈似道命都督府歲舉改官如史嵩之故事己未加張起巖福州觀察使弋德以下各轉五官庚申虎臣與大元兵戰於丁家洲敗績奔魯港夏貴不戰而去似道虎臣以單舸奔揚州諸軍盡潰翁應龍以都督府印奔臨安壬戌大元兵徇饒州知州唐震死之故相江萬里赴水死通判萬道同以城降沿江制置大使趙潛知

鎮江府洪起畏知寧國府趙與可知隆興府吳益皆棄城遁知和州王喜以城降建康都統翁福出迎大元兵甲子大元兵至臨江軍民盡去知軍鮑廉死之似道上書請遷都乙丑下公卿雜議王燾言己不能與大計遂去張世傑將兵入衛臨安道饒州復取之其將謝元王海李旺袁恩呂再興皆戰死江西提刑文天祥起兵勤王丙寅以天祥爲江西安撫副使知贛州趣入衛詔募兵以謝堂爲兩浙鎮撫使謝至保寧軍節度使全永堅謝屋並檢校少保戊辰徵兩浙福建諸郡廂禁兵之半入衛湖南提刑李芾以兵勤王知江陰軍鄭端棄城遁知無爲軍劉權知太平州孟之縉皆以城降己巳大元兵攻嘉定九頂山都統侯興戰死以陳宜中知樞密院事兼參知政事曾淵子同知樞密院事兩浙安撫制置大使兼知臨安府文及翁簽書樞密院事倪普同簽書樞密院事召王燾爲浙西江東宣撫招撫大使使居京師以備咨訪遣大元國信使郝經等歸庚午加夏貴開府儀同三司令以所部兵入衛令長吏給經過兵民錢米一切勿征稅應編配拘鎖人除僞造關會彊劫盜放火者餘悉縱之放免浙西公田

通米及諸處見監賊諸文武官在謫籍者並放自便與敘復改正放參親民加張珏寧遠軍節度使咎萬壽保康軍節度使張世傑和州防禦使令將兵入衛陳宜中乞誅似道詔罷似道平章都督予祠趙與可除名令臨安府捕案之招似道潰兵辛未右丞相章鑑遁三月壬申朔詔復茶鹽市舶法似道諸不恤民之政次第除之以公田給佃主令率其租戶爲兵殿前指揮使韓震請遷都陳宜中殺之震所部兵叛攻嘉會門射火箭至大內急發兵捕之皆散走癸酉都統徐旺榮迎大元兵入建康府鎮江統制石祖忠請降於建康命浙西提刑司準備差遣劉經戍吳江兩浙轉運司準備差遣羅林浙西安撫司參議官張濡戍獨松關山陰縣丞徐垓正將郁天興戍四安鎮起趙淮爲大府寺丞戍銀樹東壩湖北安撫司計議官吳繼明攻通城縣復取之執縣令以歸遣使召章鑑還朝甲戌以似道爲醴泉觀使大元兵至無錫縣知縣阮應得出戰一軍皆沒應得赴水死詔發兵戍吳江乙亥發兵戍獨松嶺銅嶺詔諭呂文煥陳奕范文虎使通和議息兵以王爚爲左丞相兼樞密使閩中地復大震丙子下詔罪己

以陳宜中爲特進右丞相兼樞密使罷章鑑官予祠侍御史陳過請竄賈似道併治其黨人翁應龍等不俟報而去監察御史潘文卿季可乞從過所請乃命捕應龍下臨安府獄罷廖瑩中王庭劉良貴游汶朱浚陳伯大董樸貴洪起畏鎮江自效丁丑知滁州王應龍以城降己卯杖翁應龍刺配吉陽軍命王燦陳宜中並都督諸路軍馬加呂文福福州觀察使庚申贈唐震華文閣待制削萬道同三官罷之壬午復吳潛向士璧官知常州趙與鑿聞兵至遁常民錢嘗以城降甲申大元兵至西海州安撫丁順降乙酉知東海州施居文乞降於西海州知平江府潛說友通判胡玉林鏜以城降加張世傑保康軍承宣使總都督府諸軍丙戌知廣德軍令狐概以城降徙浙西提點刑獄司於平江府張世傑遣其將閻順李存進軍廣德謝洪永進軍平江李山進軍常州丁亥張德以下各轉官有差謝元等贈十官有星二鬪於中天頃之一星隕己丑滁人執王應龍歸於揚州殺之加呂文福保康軍承宣使趣入衛文福至饒州殺使者入江州降大元庚寅左司諫潘文卿右正言季可同知樞密院曾淵子兩浙轉運副



使許自浙東安撫王霖龍相繼皆遁簽書樞密院文及翁同簽書樞密院倪普  
諷臺臣劾己章未上亟出關遁知安東州孫嗣武以城降雨土辛卯命在京文  
武官並轉兩官其畔官而遁者令御史臺覺察以聞閩順戰安吉縣復取鳳平  
張濡部曲害大元行人嚴忠範於獨松關執廉希賢至臨安重創死壬辰岳州  
安撫高世傑軍洞庭中大元兵攻之世傑降癸巳攻岳州總制孟之紹以城降  
甲午詔褒諭張世傑閩順諸將各轉官有差乙未免安吉縣今年夏田租有戰  
沒者縣令丞恤之丙申顧順攻廣德軍復取之以陳合同簽書樞密院事丁酉  
贈邊居義利州觀察使戊戌赦邊城降將罪能自拔而歸者錄之復一州者予  
知州復一縣者予知縣所部僚吏將卒及土豪立功者同賞罷章鑑祠官并奪  
宰輔恩數曾淵子削兩官奪執政恩數陳堅徐卿孫各削兩官奪侍從恩  
數趙與鑒追兩官罷之遇赦永不收敘罷許自王霖龍令淮東制置司用標由  
庚子徙淮東總領所於江陰軍加吳繼明閩門宣贊舍人四月壬寅朔贈趙卯  
發華文閣待制貶陳過平江府雄江軍統制洪福率衆復鎮巢軍甲辰贈江萬

里太師諡文忠輟視朝二日乙巳大元兵入廣德縣知縣王汝翼與寓居官趙時晦率義兵戰鬥山路分孟唐老與其二子皆死汝翼被執至建康死之王大用贈三官王虎臣贈兩官官其二子丙午大元兵破沙市城都統孟紀死之監鎮司馬夢求自經死戊申京湖宣撫朱禕孫湖北制置副使高達以江陵降京湖北路相繼皆下張起巖提兵保飛山己酉命劉師勇戍平江府辛亥顧順諸將各轉三官孟唐老贈三官壬子以高斯得簽書樞密院事兼權參知政事總統張敏與大元兵戰豐城死之癸丑贈五官官其一子阮應得贈十官乙卯以福王與芮爲武康寧江軍節度使判紹興府丙辰王燦來令如文彥博故事自朝參起居外並免拜以樞密副使召夏貴提兵入衛丁巳總制霍祖勝攻溧陽縣復取之戊午贈張資眉州防禦使侯興復州團練使乙未文及翁倪普並削一官奪執政恩數潛說友削三官奪侍從恩數庚申令狐概除名配鬱林州牢城籍其家知金壇縣李成大率義局官含山縣尉胡傳心陽春主簿潘大同濠梁主簿潘大壽進士潘文孫潘應奎攻金壇縣取之鎮江統制侯岩縣尉趙嗣

濱復助大元兵來戰成大二子及大同等皆死執成大以歸壬戌大元兵攻真州知州苗再成宗子趙孟錦率兵大戰於老鸛觜癸亥加知思州田謹賢知播州楊邦憲並復州團練使趣兵入衛有大星自心東北流入濁沒乙丑熒惑犯天江提舉太平興國宮常楙請立濟王後丁卯加李庭芝參知政事戊辰詔宜興溧陽民兵助戰有功特免今年田租江陰民被兵其租亦勿收責庚午大元兵至楊子橋揚州都撥發官雷大震出戰死是月常德鼎澧皆降五月辛未朔命宰執日赴朝堂治事旌德縣城守有功免其民今年田租癸酉大元兵至寧國縣知縣趙與穡出戰死甲戌淮安總制李宗榮知慶遠府仇子真將兵來勤王乙亥加苗再成濠州團練使趙孟錦揚州都統司計議官以洪福知鎮巢軍丁丑詔趙潛統軍民船屯江陰劉師勇攻常州復取之執安撫戴之泰司戶趙必佖總管陸春戰死戊寅淮東兵馬鈐轄阮克己將兵來勤王加左驍騎中郎將己卯加婺州處士何基謚文定王柏承事郎加張珏檢校少保四川制置副使知重慶府庚辰贈雷大震保康軍節度使辛巳加劉師勇濠州團練使其將

劉圭以下各轉官有差戊子贈潘大同等官餘有功人並轉兩官辛卯貶潛說友南安軍吳益汀州並籍其家罷李珣送婺州籍呂文煥孟之縉陳奕范文虎家甲午饒信州饑令民入粟補官罷市舶分司令通判任舶事淮東西官民兵各轉一官丙申詔張世傑張彥阮克己仇子真四道出兵遣使告天地宗廟社稷諸陵宮觀己亥勞軍吳繼明復蒲圻通城崇陽三縣加帶行帶御器械權知鄂州令擇險爲寓詔贈鮑廉直華文閣官其一子趙與糖直華文閣六月庚子朔日有食之既晝晦如夜咎萬壽以嘉定及三龜九頂紫雲城降知敘州李演將兵援嘉定府遂解歸戰羊雅江兵敗被執辛丑太皇太后詔削尊號聖福字以應天戒復魏克愚官太學生蕭規唐棣並補承信郎知嘉興府余安裕坐聞兵求去貽書朝中語涉不道削一官送徽州徐卿孫削一官貶吉州命侍從官已上各舉才堪文武者五人餘廷臣各舉三人雖在謫籍亦聽舉之丙午王應麟言開慶之禍始於丁大全請凡大全之黨在謫籍者皆勿宥從之己酉免廣德軍今年田租及諸郡縣未納綱解王應麟繳還章鑑曾淵子錄黃言韓震爲

逆二人實庇之且淵子芘翁應龍致有逸罰又嘗竊府庫金以遁庚戌命削鑑  
一官放歸田里淵子再削一官徙吉州誅翁應龍籍其家辛亥銓試甲寅留夢  
炎入朝王燦請相夢炎乞以經筵備顧問陳宜中請相夢炎乞祠詔二相毋藉  
此求閒以燦爲平章軍國重事一月兩赴經筵五日一朝宜中左丞相兼樞密  
使都督諸路兵夢炎左丞相兼樞密使都督諸路兵乙卯詔求言知敘州郭漢  
傑以城降丙辰疏決在京罪人免引見戊午知瀘州梅應春以城降己未以李  
庭芝知樞密院事兼參知政事庚申知富順監王宗義以城降王應麟復繳還  
曾淵子貶吉州錄黃癸亥貶韶州丙寅吳繼明諸將各轉官有差丁卯朱禔孫  
除名籍其家秋七月庚午朔江西制置黃萬石移治撫州詔還隆興府辛未張  
世傑諸軍戰焦山下敗績甲戌徙似道居婺州廖瑩中除名貶昭州王庭除名  
貶梅州徙曾淵子雷州寧國吏楊義忠率義兵出戰死乙亥贈武功大夫丁丑  
徙似道建寧府太白入東井庚申加知高郵軍楮一正閣門宣贊舍人知懷遠  
軍金之才帶御器械知安淮軍高福閣門祗候知泗州譚興閣門宣贊舍人知

濠州孫立右衛大將軍賞守邊功壬午太白晝見詔饒州被兵令免今年田租  
路鈐劉用調兵入靖州知州康玉劫之通判張起岩入殺玉復靖州癸未拘內  
司局錢餉兵丙戌令權糴公田今年租每石以錢十貫給佃主十貫給種戶其  
鎮江常州江陰被兵者勿糴庚寅謫似道爲高州團練使貶循州籍其家糴浙  
西邸第寺觀田米十之三追復皮龍榮官監司郡守避事不卽到官者令御史  
臺覺察以聞辛卯王燦子啖京學生劉九臯等伏闕上書言宜中擅權黨似道  
芘趙潛潛說友使門客子弟交通關節其誤國將甚於似道宜中去遣使四輩  
召之皆不至謝堂乞罷兩浙鎮撫司不從張世傑乞濟師不報壬辰下劉九臯  
等臨安獄罷王燦爲醴泉觀使癸巳以夏貴知揚州朱煥知廬州甲午遣使召  
宜中還朝乙未以陳文龍同簽書樞密院事兼權參知政事通判婺州張鎮孫  
聞兵遁罷其官貶胡玉連州林鏗韶州並除名沿江招討大使汪立信卒丙申  
削李珣兩官貶潮州以開慶兵禍追罪史嵩之奪其諡戊戌遣使召宜中還朝  
八月己亥朔總制毛獻忠將衢州兵入衛辛丑疏決臨安府罪人壬寅右正言

徐直方遁加夏貴樞密副使兩淮宣撫大使李芾湖南鎮撫大使總制戴虎破  
大南砦轉三官加張起巖太府寺丞知靖州劉用以下立功人各轉官有差大  
元兵駐巴陵縣黃沙乙巳吳繼明復平江縣戊申試太學上舍生己酉拘閩貴  
妃集慶寺賈貴妃演福寺田還安邊所庚戌劉師勇攻呂城破之癸丑復嘉定  
七司法丁巳遣使召宜中還朝加張世傑神龍衛四廂都指揮使總都督府諸  
兵戊午加劉師勇和州防禦使熒惑犯南斗趙淇除大理少卿王應麟封還錄  
黃言昔內外以寶玉獻似道淇兄弟爲甚己未遂罷之甲子以文天祥爲浙西  
江東制置使兼知平江府乙丑揚州文武官轉兩官加吳繼明湖北招討使朱  
旺諸將各轉三官九月己巳陳宜中授觀文殿大學士醴泉觀使兼侍讀左司  
諫陳景行請令講官坐講陪宿直從之辛未加田謹賢福州觀察使楊邦憲利  
州觀察使趣入衛己卯陳宜中乞任海防不允辛巳有事於明堂赦李成大被  
執不屈死壬午贈五官丙戌命文天祥爲都督府參贊官總三路兵會稽縣尉  
鄭虎臣部送似道之貶所至漳州殺之大元兵至泰州和州孫虎臣自殺庚寅

贈太尉免靖州今年田租辛卯徙李珣梧州乙未劉良貴再削兩官貶信州張彥與大兵戰敗被執以城降冬十月己亥加張世傑沿江招討使劉師勇福州觀察使總統出戍兵壬寅宜中來癸卯玉牒殿災丁未以夢炎爲左丞相宜中爲右丞相並兼樞密使都督城臨安辛亥以張世傑爲沿江制置副使兼知江陰軍兼浙西策應使丁巳太白會填星戊午領戶部材用常楙中書舍人王應麟請立濟王後贈夏椅直祕閣徵紹興府處士陸應月爲史館編校文字壬戌大元兵發建康參政阿剌罕四萬戶總管奧魯赤將右軍出四安鎮趣獨松關參政董文炳范文虎將左軍出江入江陰軍丞相伯顏將中軍入常州熒惑犯壘壁陣癸亥張全尹玉麻士龍援常州士龍戰虞橋死全奔五牧朱煥至廬州貴不內煥歸復以爲淮東制置副使陳合坐匿廖瑩中家資奪執政恩數甲子尹玉戰五牧死之張全不戰遁丙寅趣趙潛趙與可鄭孀所募兵詔中外官有習兵略者各以書來上是月李世修以江陰降十一月丁卯朔銅關將貝寶胡岩起攻溧水死贈寶武翼郎岩起朝奉郎庚午以陳文龍同知樞密院事兼權



參知政事黃鏞同簽書樞密院命諸制司各舉才堪將帥者十人不限偏裨士卒如不隸軍中者許投匱自薦辛未起居舍人曾唯辭官不允去癸酉贈尹玉濠州團練使麻士龍高州刺史免張全朱華臨陳退師罪丁丑詔被俘將士能率衆來歸者以人數補官能立功者予節鉞諸閫以下官以所招人多寡行賞戊寅大元兵破廣德軍己卯破四安鎮正將胡明等死之召文天祥入衛辛巳曾唯削一官免太白犯房壬午大元兵至隆興府黃萬石棄撫州遁轉運判官劉槃以隆興降癸未大元兵破興化縣知縣胡拱辰自殺甲申中書舍人王應麟辭免兼給事中不允大元兵至常州招降不聽攻二日破之屠其城知州姚峇通判陳炤都統王安節皆死劉師勇潰圍奔平江乙酉改宜興縣爲南興軍禮部侍郎陳景行辭官不允去丙戌贈濟王太師尙書令進封鎮王諡昭肅令福王與芮擇後奉祀賜田萬畝丁亥獨松關告急趣文天祥入衛戊子調民兵出守餘杭錢塘己丑獨松關破馮驥死之張濡遁鄰邑望風皆遁通判平江府鄭疇遁庚寅通判王矩之都統制王邦傑遣人迎降於常州辛卯大元兵趨撫

州都統密佑逆戰於璧邪兵敗死之癸巳以張世傑爲浙西制置副使兼知平江府甲午權禮部尙書王應麟遁黃萬石提兵走建昌軍乙未左丞相夢炎遁丙申遣使召夢炎還朝賜餘杭武康長興縣民錢并免今年田租鄭疇降一官罷通判撫州施至道以城降十二月丁酉朔詔許似道歸葬以其祖田廬還之戊戌復趙與可爲都督府參議官放李珣自便己亥贈王汝翼朝奉郎庚子以吳堅簽書樞密院事黃鏞兼權參知政事遣柳岳奉書詣大元軍中稱盜殺廉尙書乞班師修好癸卯以陳文龍爲參知政事兼權知樞密院事賜謝堂同進士出身同知樞密院事甲辰贈姚訔龍圖閣待制其父希得贈太師陳炤直寶章閣馮驥集英殿修撰嘉興府告急給封樁庫錢爲兵備命趙與偃戍縉雲縣復季可官令如龍泉縣募兵乙巳以陳景行爲浙東安撫副使戍處州起方逢辰戍淳安縣丙午追封呂文德和義郡王丁未出安邊封樁庫金付浙東諸郡爲兵備大元兵入平江府起吳君權爲太府少卿提點臨平民兵遣使召夢炎應麟皆不至戊申張世傑入衛加檢校少保降詔獎諭王爚薨輟視朝二日乙

西括臨安府州縣馬庚戌柳岳還癸丑遣宗正少卿陸秀夫刑部尙書夏士林  
兵部侍郎呂師孟使軍前詔呂文煥趙孟桂通好己未方輿丁廣趙文禮兵皆  
敗歸庚申以柳岳爲工部侍郎洪儒震爲右正言使燕祈請大元兵破大洪山  
知隨州朱端履降權吏部尙書丁應奎左侍郎徐宗仁遁癸亥遣使召夢炎不  
至

德祐二年春正月丁丑朔大元兵自元年十月圍潭州湖南安撫兼知州李芾  
拒守三月大小戰數十合力盡將破芾闔門死郡人知衡州尹穀亦舉家自焚  
帥司參議楊霆及幕屬陳億孫顏應焱等皆從芾死守將吳繼明劉孝忠以城  
降寶慶降通判曾如驥死之陸秀夫等至大元軍中求稱姪納幣不從稱姪孫  
不從戊辰還太皇太后命用臣禮己巳嘉興守劉漢傑以城降庚午同簽書樞  
密院事黃鏞參知政事陳文龍遁以謝堂爲兩浙鎮撫大使文天祥知臨安府  
金永堅浙東撫諭使辛未命吳堅爲左丞相兼樞密使常楙參知政事日午宣  
麻慈元殿文班止六人諸關兵盡潰遣監察御史劉岳奉表稱臣上大元皇帝

尊號曰仁明神武皇帝歲奉銀絹二十五萬乞存境土以奉蒸嘗癸酉左司諫  
陳孟虎監察御史孔應得遁熒惑犯木星甲戌大元兵至瑞州知州姚岩棄城  
去乙亥以賈餘慶知臨安府丙子命吉王昞信王昺出鎮丁丑以夏士林簽書  
樞密院事己卯加全永堅太尉參知政事常楙遁三學生誓死不去特與放釋  
褐出身以楊亮節爲福州觀察使提舉吉王府行事俞如珪爲環衛官提舉信  
王府行事大元兵入安吉州知州趙良淳自經死月暈東井庚辰簽書樞密院  
夏士林遁辛巳祀太乙宮癸未升封吉王昞爲益王判福州福建安撫大使信  
王昺爲廣王判泉州兼判南外宗正事以留夢炎爲江東西湖南北宣撫大使  
甲申大元兵至臯亭山遣監察御史楊應奎上傳國璽降其表曰宋國主臣暴  
謹百拜奉表言臣眇然幼沖遭家多難權奸似道背盟誤國至勤與師問罪臣  
非不能遷避以求苟全今天命有歸臣將焉往謹奉太皇太后命削去帝號以  
兩浙福建江東西湖南二廣兩淮四川見存州郡悉上聖朝爲宗社生靈祈哀  
請命伏望聖慈垂念不忍臣三百餘年宗社遽至隕絕曲賜存全則趙氏子孫

世世有賴不敢弭忘是夜丞相陳宜中遁張世傑蘇劉義劉師勇各以所部兵去乙酉以文天祥爲右丞相兼樞密使都督丙戌命天祥同吳堅使大元軍賜家鉉翁進士出身簽書樞密院事賈餘慶同簽書樞密院事知臨安府戊子知建德軍方回知婺州劉怡知處州梁椅知台州楊必大皆降是月知臨江軍滕岩瞻遁二月丁酉朔日中有黑子相盪如鵝卵辛丑率百官拜表祥曦殿詔諭郡縣使降大元使者入臨安府封府庫收史館禮寺圖書及百司符印告敕罷官府及侍衛軍壬寅猶遣賈餘慶吳堅謝堂劉岳家鉉翁充祈請使是日大元軍軍錢塘江沙上潮三日不至三月丁丑入朝五月丙申朝於上都降封開府儀同三司瀛國公是月陳宜中等立昞於福州後二年四月昞殂於礪洲陸秀夫等復立衛王昺後三年始平之

贊曰司馬遷論秦趙世系同出伯益夫稷契伯益其子孫皆有天下至於運祚短長亦係其功德之厚薄焉趙宋雖起於用武功成治定之後以仁傳家視秦宜有間矣然仁之敝失於弱卽文之敝失於僂也中世有欲自強以革其敝用

乖其方馴致焚擾建炎而後土宇分裂猶能六主百五十年而後亡豈非禮義足以維持君子之志恩惠足以固結黎庶之心歟瀛國四歲卽位而天兵渡江六歲而羣臣奉之入朝漢劉向言孔子論詩至殷士膚敏裸將於京喟然嘆曰大哉天命善不可不傳於後嗣是以富貴無常至哉言乎我皇元之平宋也吳越之民市不易肆世祖皇帝命征南之帥輒以宋祖戒曹彬勿殺之言訓之書曰大哉王言一哉王心我元一天下之本其在於茲

二王者度宗庶子也長建國公昞母淑妃楊氏季永國公昺母修容俞氏度宗崩謝太后召賈似道等入宮議所立衆以爲昞長當立似道主立嫡乃立昀而封昞爲吉王昺信王德祐二年正月文天祥尹臨安請以二王鎮閩廣不從始命二王出閣大元兵迫臨安宗親復以請乃徙封昞爲益王判福州福建安撫大使昺爲廣王判泉州兼判南外宗正以駙馬都尉楊鎮及楊亮節俞如珪爲提舉大元兵至臯亭山鎮等奉之走婺州丞相伯顏入臨安遣范文虎將兵趣婺召鎮以王還鎮得報卽去曰我將就死於彼以緩追兵亮節等遂負王徒步

匿山中七日其將張全以兵數十人始追及之遂同走温州陸秀夫蘇劉義繼追及於道遣人召陳宜中於清澳宜中來謁復召張世傑於定海世傑亦以所部兵來温之江心寺高宗南奔時嘗至是有御座在寺中衆相率哭座下奉是爲天下兵馬都元帥曷副之乃發兵除吏以秀王與畢爲福建察訪使兼安撫知西外宗正趙吉甫知南外宗正兼福建同提刑先入閩中撫吏民諭同姓太皇太后尋遣二宦者以兵八人召王於温宜中等沉其兵江中遂入閩時汀建諸州方欲從黃萬石降聞是將至卽閉城却使者萬石將劉俊宋彰周文英輩亦多來歸五月乙未朔宜中等乃立是於福州以爲宋主改元景炎冊楊淑妃爲太后同聽政封信王昺爲衛王宜中爲左丞相兼都督李庭芝爲右丞相陳文龍劉黻爲參知政事張世傑爲樞密副使陸秀夫爲簽書樞密院事命吳淩趙潛傅卓李班翟國秀等分道出兵改福州爲安福府温州爲瑞安府郊赦是日黎明有大聲出府中衆皆驚仆文天祥自鎮江亡歸庚辰以爲右丞相兼知樞密院事遣其將呂武入江淮招豪傑杜澣如温州募兵廣東經略使徐直諒

遣梁雄飛請降於隆興帥府乃假雄飛招討使使徇廣州既而直諒聞是立命  
權通判李性道摧鋒軍將黃俊等拒雄飛於石門性道不戰俊戰敗奔廣州直  
諒棄城遁六月丙子雄飛入廣州諸降將皆授以官俊獨不受遂爲衆所殺吳  
浚聚兵于廣昌取南豐宜黃寧都三縣翟國秀取秀山傳卓至衢信諸縣民多  
應之者命文天祥爲同都督七月丁酉進兵南劍州欲取江西是月吳浚兵敗  
於南豐翟國秀聞兵至遂引還傳卓兵敗詣江西元帥府降平章阿里海牙破  
嚴關馬暨退保靜江府八月漳州亂命陳文龍爲閩廣宣撫使以討之甲戌秀  
王與畢圍婺州丙子聞大兵至遂解歸以王積翁爲福建提刑招捕使知南劍  
州備禦上三郡黃恮爲同提刑招捕使知漳州備禦下三郡張世傑遣兵助吳  
浚與元帥李恆戰兜零兵敗奔寧都興化石手軍亂九月復以陳文龍知興化  
軍東莞人熊飛爲黃世傑守潮惠二州聞趙潛至卽以兵應之攻雄飛於廣州  
壬寅雄飛遁熊飛遂復韶州新會令曾逢龍亦帥兵至廣州李性道出迎謁飛  
與逢龍執而殺之衢州守將魏福興出戰福星橋死壬子趙潛入廣州是月招



討也的迷失會東省兵於福州元帥呂師夔張榮實將兵入梅嶺十月壬戌朔  
文天祥入江州趙潛遣曾逢龍就熊飛禦大軍於南雄逢龍戰死熊飛奔韶州  
大軍圍韶州守將劉自立以城降飛率兵巷戰兵敗赴水死十有一月參政阿  
剌罕董文炳將兵至處州李珣以城降甲辰秀王與罕逆戰於瑞安觀察使李  
世達死之與罕及其弟與慮子孟備監軍趙由鵬察訪使林温被執皆死阿剌  
罕兵至建寧府執守臣趙崇鑑知邵武軍趙時賞知南劍州王積翁皆棄城去  
乙巳是入海癸丑大軍至福安州知州王剛中以城降是欲入泉州招撫蒲壽  
庚有異志初壽庚提舉泉州舶司擅蕃舶利者三十年是舟至泉壽庚來謁請  
駐蹕張世傑不可或勸世傑留壽庚則凡海舶不令自隨世傑不從縱之歸繼  
而舟不足乃掠其舟并沒其貲壽庚乃怒殺諸宗室及士大夫與淮兵之在泉  
者是移潮州是月福興化皆降英德守臣凌彌堅徐夢得等亦降十二月辛酉  
朔趙潛棄廣州遁乙丑制置方興亦遁吳浚退走入瑞金戊辰蒲壽庚及知泉  
州田真子以城降知興化軍陳文龍嬰城不下乙酉通判曹澄孫以城降文龍

被執不屈死是次甲子門至元十四年正月大軍破汀關癸巳知循州劉興降  
壬寅吳浚棄瑞金遁鎮撫孔遵入瑞金文天祥走漳州浚尋還汀州降戊申知  
潮州馬發及其通判戚繼祖降癸丑復來歸丁巳權知梅州錢榮之以城降二  
月大軍至廣州縣人趙若岡以城降廣東諸郡皆降三月文天祥取梅州陳文  
龍從子瓚舉兵殺守將林華據興化軍四月文天祥取興國縣廣東制置使張  
鎮孫襲廣州取之梁雄飛等棄城走韶州五月張世傑將兵取潮州文天祥提  
兵自梅州出江西入會昌縣淮民張德興亦起兵殺太湖縣丞王德顥據司空  
山攻下黃州壽昌軍丁巳遇宣慰鄭鼎戰樊口鼎墜水死六月辛酉文天祥取  
雩都已卯入興國縣七月遣兵取吉贛諸縣圍贛州衡山人趙璠撫州人何時  
皆起兵應之乙巳張世傑圍泉州遣將高日新復邵武淮兵在福州者欲殺王  
積翁以應世傑皆爲積翁所戮江西宣慰李恆遣兵援贛州而自將兵入興國  
八月文天祥諸將兵皆敗乃引兵卽鄒瀾於永豐瀾兵亦潰己巳熒惑掩月天  
色赤壬申文天祥兵敗於興國己卯大軍破司空山張德興敗亡走甲申天祥

至空坑兵盡潰遂挺身走循州諸將皆被執九月元帥峻都援泉州戊申張世傑歸淺灣左丞塔出將兵入大庾嶺參政也的迷失將兵復取邵武入福州十月甲辰峻都破興化軍陳瓚死之進攻潮州馬發拒之乃去攻惠州十月塔出圍廣州庚寅張鎮孫以城降元帥劉深以舟師攻是於淺灣是走秀山陳宜中入占城遂不反十二月丙子是至井澳颶風壞舟幾溺死遂成疾旬餘諸兵士始稍稍來集死者十四五丁丑劉深追是至七州洋執俞如珪以歸十五年正月大軍夷廣州城張世傑遣兵攻雷州不克己酉大軍克涪州執守將王明二月大軍破潮州馬發死之三月文天祥取惠州廣州都統凌震轉運判官王道夫取廣州是欲往居占城不果遂駐碭州遣兵取雷州曾淵子自雷州來以爲參知政事廣西宣諭使四月戊辰是殂於碭洲其臣號之曰端宗庚午衆又立衛王昺爲主以陸秀夫爲左丞相是月有黃龍見海中五月癸未朔改元祥興乙酉升碭洲爲翔龍縣遣張應科王用取雷州應科三戰皆不利用因降六月丁巳應科再戰雷州遂死之知高州李象祖降己未昺徙居匡山升廣州爲翔

龍府己已有大星東南流墜海中小星千餘隨之聲如雷數刻乃己卯都元帥張弘範李恆征厓山七月趙與珞與謝明謝富守瓊州阿里海牙遣馬成旺招之與珞率兵拒於白沙口十一月癸巳州民執與珞以降閏月庚戌王道夫棄廣州遁壬戌凌震遁癸亥大軍入廣州十二月壬午王道夫攻廣州兵敗被執凌震兵繼至亦敗文天祥走海豐壬寅被執於五坡嶺震兵又敗於芟塘大軍破南安縣守將李梓發死之十六年正月壬戌張弘範兵至厓山庚午李恆兵亦來會世傑以舟師碇海中棊結巨艦千餘艘中艦外舳貫以大索四周起樓棚如城堞居曷其中大軍攻之艦堅不動又以舟載茅沃以膏脂乘風縱火焚之艦皆塗泥縛長木以拒火舟火不能蒸二月戊寅朔世傑部將陳寶降己卯都統張達以夜襲大軍營亡失甚衆癸未有黑氣出山西李恆乘早潮退攻其北世傑以淮兵殊死戰至午潮上張弘範攻其南南北受敵兵士皆疲不能戰俄有一舟檣旗仆諸舟之檣旗遂皆仆世傑知事去乃抽精兵入中軍諸軍潰翟國秀及團練使劉俊等解甲降大軍至中軍會暮且風雨昏霧四塞咫尺

不相辨世傑乃與蘇劉義斷維以十餘舟奪港而去陸秀夫走衛王舟王舟大  
且諸舟環結度不得出走乃負昺投海中後宮及諸臣多從死者七日浮尸出  
於海十餘萬人楊太后聞昺死撫膺大慟曰我忍死艱關至此者正爲趙氏一  
塊肉爾今無望矣遂赴海死世傑葬之海濱已而世傑亦自溺死宋遂亡  
贊曰宋之亡徵已非一日曆數有歸真主御世而宋之遺臣區區奉二王爲海  
上之謀可謂不知天命也已然人臣忠於所事而至於斯其亦可悲也夫

宋史卷四十七

宋史卷四十七考證

瀛國公紀○宋史新編陳宜中等立益王昞於福州遙上帝尊號曰孝恭懿聖  
皇帝

宋史卷四十七考證

宋史卷四十七

宋史卷四十七

宋史卷四十七

宋史卷四十七

宋史卷四十七

宋史卷四十七

宋史卷四十七

宋史卷四十七

宋史卷四十七

宋史卷四十七

宋史卷四十七

宋史卷四十七

宋史卷四十七

宋史卷四十七

宋史卷四十八

元中書右丞相總裁脫脫等修

天文志第一

天文一

儀象  
中星

極度  
土圭

黃赤道

夫不言而信天之道也天於人君有告戒之道焉示之以象而已故自上古以來天文有世掌之官唐虞羲和夏昆吾商巫咸周史佚甘德石申之流居是官者專察天象之常變而述天心告戒之意進言於其君以致交脩之儆焉易曰天垂象見吉凶聖人則之又曰觀乎天文以察時變是也然考堯典中星不過正人時以興民事夏仲康之世胤征之篇乃季秋月朔辰弗集于房然後日食之變昉見於書觀其數羲和以俛擾天紀昏迷天象之罪而討之則知先王克謹天戒所以責成於司天之官者豈輕任哉箕子洪範論休咎之徵曰王省惟歲卿士惟月師尹惟日庶民惟星星有好風星有好雨禮記言體信達順之效則以天降膏露先之至於周詩屢言天變所謂旻天疾威敷于下土又所謂兩

宋

史

卷四十八

天文志

中華書局聚



無其極傷我稼穡正月繁霜我心憂傷以及彼月而微此日而微燂燂震電不寧不令孔子刪詩而存之以示戒也他日約魯史而作春秋則日食星變屢書而不爲煩聖人以天道戒謹後世之旨昭然可觀矣於是司馬遷史記而下歷代皆志天文第以羲和旣遠官乏世掌賴世以有專門之學焉然其說三家曰周髀曰宣夜曰渾天宣夜先絕周髀多差渾天之學遭秦而滅洛下閎耿壽昌晚出始物色得之故自魏晉以至隋唐精天文之學者犖犖名世豈非難得其人歟宋之初興近臣如楚昭輔文臣如竇儀號知天文太宗之世召天下伎術有能明天文者試隸司天臺匿不以聞者罪論死旣而張思訓韓顯符輩以推步進其後學士大夫如沈括之議蘇頌之作亦皆底於幻眇靖康之變測驗之器盡歸金人高宗南渡至紹興十三年始因祕書丞嚴抑之請命太中局重創渾儀自是厥後窺測占候蓋不廢焉爾寧宗慶元四年九月太史言月食於晝草澤上書言食于夜及驗視如草澤言乃更造統天曆命祕書正字馮履參定以是推之民間天文之學蓋有精於太史者則太宗召試之法亦豈徒哉今東

都舊史所書天文禎祥日月薄蝕五緯凌犯彗孛飛流暈珥虹霓精祲雲氣等事其言時日災祥之應分野休咎之別視南渡後史有詳略焉蓋東都之日海內爲一人君遇變脩德無或他諉南渡土宇分裂太史所上必謹星野之書且君臣恐懼脩省之餘故於天文休咎之應有不容不縷述而申言之者是亦時勢使然未可以言星翁日官之術有精舛敬怠之不同也今合累朝史臣所錄爲一志而取歐陽脩新唐書五代史記爲法凡徵驗之說有涉於傳會咸削而不書歸於傳信而已矣

### 儀象

曆象以授四時璣衡以齊七政二者本相因而成故璣衡之設史謂起於帝嚳或謂作於宓犧又云璿璣玉衡乃羲和舊器非舜創爲也漢馬融有云上天之體不可得知測天之事見於經者惟有璣衡一事璣衡者卽今之渾儀也宋王蕃之論亦云渾儀之制置天梁地平以定天體爲四游儀以綴赤道者此謂璣也置望筩橫簫於游儀中以窺七曜之行而知其躔離之次者此謂衡也若六

合儀三辰儀與四游儀並列爲三重者唐李淳風所作而黃道儀者一行所增也如張衡祖洛下閎耿壽昌之法別爲渾象實諸密室以漏水轉之以合璿璣所加星度則渾象本別爲一器唐李淳風梁令瓚祖之始與渾儀並用太平興國四年正月巴中人張思訓創作以獻太宗召工造於禁中踰年而成詔置於文明殿東鼓樓下其制起樓高丈餘機隱於內規天矩地下設地輪地足又爲橫輪側輪斜輪定身關中關小關天柱七直神左搖鈴右扣鐘中擊鼓以定刻數每一晝夜周而復始又以木爲十二神各直一時至其時則自執辰牌循環而出隨刻數以定晝夜短長上有天頂天牙天關天指天抱天束天條布三百六十五度爲日月五星紫微宮別宿斗建黃赤道以日行度定寒暑進退開元遺法運轉以水至冬中凝凍遲澁遂爲疎略寒暑無準今以水銀代之則無差失冬至之日日在黃道表去北極最遠爲小寒晝短夜長夏至之日日在赤道表去北極最近爲小暑晝長夜短春秋二分日在兩交春和秋涼晝夜平分寒暑進退皆由於此并著日月象皆取仰視按舊法日月晝夜行度皆人所運行

新制成於自然尤爲精妙以思訓爲司天渾儀丞銅候儀司天冬官正韓顯符所造其要本淳風及僧一行之遺法顯符自著經十卷上之書府銅儀之制有九一曰雙規皆徑六尺一寸三分圍一丈八尺三寸九分廣四寸五分上刻周天三百六十五度南北並立置水臬以爲準得出地三十五度乃北極出地之度也以釭貫之四面皆七十二度屬紫微宮星凡三十七坐一百七十有五星四時常見謂之上規中一百一十度四面二百二十度屬黃赤道內外官星二百四十六坐一千二百八十九星近日而隱遠而見謂之中規置臬之下繞南極七十二度除老人星外四時常隱謂之下規二曰游規徑五尺二寸圍一丈五尺六寸廣一寸二分厚四分上亦刻周天以釭貫於雙規巔軸之上令得左右運轉凡置管測驗之法衆星遠近隨天周徧三曰直規二各長四尺八寸闊一寸二分厚四分於兩極之用夾窺管中置關軸令其游規運四曰窺管一長四尺八寸廣一寸二分關軸在直規中五曰平準輪在水臬之上徑六尺一寸三分圍一丈八尺三寸九分上刻八卦十干十二辰二十四氣七十二候於其

中定四維日辰正晝夜百刻六曰黃道南北各去赤道二十四度東西交於卯西以爲日行盈縮月行九道之限凡冬至日行南極去北極一百一十五度故景長而寒夏至日在赤道北二十四度去北極六十七度故景短而暑月有九道之行歲匝十二辰正交出入黃道遠不過六度五星順留伏逆行度之常數也七曰赤道與黃道等帶天之絃以隔黃道去兩極各九十一度強黃道之交也按經東交闕角宿五度少西交奎宿一十四度強日出於赤道外遠不過二十四度冬至之日行斗宿日入於黃道內亦不過二十四度夏至之日行井宿及晝夜分炎涼等日月五星陰陽進退盈縮之常數也八曰龍柱四各高五尺五寸立於平準輪下九曰水臬十字爲之其水平滿北辰正以置四隅各長七尺五寸高三寸半深一寸四隅水平則天地準唐貞觀初李淳風於浚儀縣古岳臺測北極出地高三十四度八分差陽城九今測定北極高三十五度以爲常準熙寧七年七月沈括上渾儀浮漏景表三議渾儀議曰五星之行有疾舒日月之交有見匿求其次舍經闕之會其法一寓於日冬至之日日之端南者

也日行周天而復集於表銳凡三百六十有五，日四分日之幾一而謂之歲周天之體，日別之謂之度，度之離其數有二，日行則舒則疾，會而均，別之曰赤道之度，日行自南而北，升降四十有八，度而迤，別之曰黃道之度，度不可見，其可見者星也，日月五星之所由有星焉，當度之晝者凡二十有八，而謂之舍，舍所以繫度，度所以生數也，度在天者也，爲之璣衡，則度在器，度在器則日月五星可搏乎器中，而天無所豫也，天無所豫則在天者不爲難知也，自漢以前爲曆者必有璣衡以自驗跡，其後雖有璣衡而不爲曆作爲曆者，亦不復以器自考，氣朔星緯皆莫能知其必當之數，至唐僧一行改大衍曆法，始復用渾儀參實，故其術所得比諸家爲多，臣嘗歷考古今儀象之法，虞書所謂璿璣玉衡，唯鄭康成粗記其法，至洛下閎製圓儀，賈逵又加黃道，其詳皆不存于書，其後張衡爲銅儀於密室中，以水轉之，蓋所謂渾象，非古之璣衡也，吳孫氏時王蕃陸績皆嘗爲儀及象，其說以謂舊以二分爲一度，而患星辰稠穢，張衡改用四分而復堆重難運，故蕃以三分爲度，周文有九寸五分寸之三，而具黃赤道焉，績之

說以天形如鳥卵小橢而黃赤道短長相害不能應法至劉曜時南陽孔定製銅儀有雙規規正距子午以象天有橫規判儀之中以象地有特規斜絡天腹以候赤道南北植幹以法二極其中乃爲游規窺管劉曜太史令晁崇斛蘭皆嘗爲鐵儀其規有六四常定以象地一象赤道其二象二極乃是定所謂雙規者也其制與定法大同唯南北柱曲抱雙規下有縱衡水平以銀錯星度小變舊法而皆不言有黃道疑其失傳也唐李淳風爲圓儀三重其外曰六合有天經雙規金渾緯規金常規次曰三辰轉於六合之內圓徑八尺有璿璣規月游規所謂璿璣者黃赤道屬焉又次曰四游南北爲天樞中爲游筩可以升降游轉別爲月道傍列二百四十九交以攜月游一行以爲難用而其法亦亡其後率府兵曹梁令瓚更以木爲游儀因淳風之法而稍附新意詔與一行雜校得失改鑄銅儀古今稱其詳確至道中初鑄渾天儀于承天監多因斛蘭晁崇之法皇祐中改鑄銅儀于天文院姑用令瓚一行之論而去取交有失得臣今輯古今之說以求數象有不合者十有三事其一舊說以謂今中國於地爲東南

當令西北望極星置天極不當中北又曰天常傾西北極星不得居中臣謂以中國規觀之天常北倚可也謂極星偏西則不然所謂東西南北者何從而得之豈不以日之所出者爲東日之所入者爲西乎臣觀古之候天者自安南都護府至浚儀太岳臺纔六千里而北極之差凡十五度稍北不已庸詎知極星之不直人也臣嘗讀黃帝素書立於午而面子立於子而面午至於自卯而望酉自酉而望卯皆曰北面立於卯而負酉立於酉而負卯至於自午而望南自子而望北則皆曰南面臣始不論其理逮今思之乃常以天中爲北也常以天中爲北則蓋以極星常居中天也素問尤爲善言天者今南北纔五百里則北極輒差一度以上而東西南北數千里間日分之時候之日未嘗不出於卯半而入於酉半則又知天樞既中則日之所出者定爲東日之所入者定爲西天樞則常爲北無疑矣以衡窺之日分之時以渾儀抵極星以候日之出沒則常在卯酉之半少北此殆放乎四海而同者何從而知中國之爲東南也彼徒見中國東南皆際海而爲是說也臣以謂極星之果中果非中皆無足論者彼



北極之出地六千里之間所差者已如是又安知其茫昧幾千萬里之外邪今直當據建邦之地人目之所及者裁以爲法不足爲法者宜置而勿議可也其二曰絃平設以象地體今渾儀置于崇臺之上下瞰日月之所出則絃不與地際相當者臣詳此說雖粗有理然天地之廣大不爲一臺之高下有所推遷蓋渾儀考天地之體有實數有準數所謂實者此數卽彼數也此移亦彼移赤之謂也所謂準者以此準彼此之一分則準彼之幾千里之謂也今臺之高下乃所謂實數一臺之高不過數丈彼之所差者亦不過此天地之大豈數丈足累其高下若衡之低昂則所謂準數者也衡移一分則彼不知其幾千里則衡之低昂當審而臺之高下非所當卹也其三曰月行之道過交則入黃道六度而稍却復交則出於黃道之南亦如之月行周於黃道如繩之繞木故月交而行日之陰則日爲之虧入蝕法而不虧者行日之陽也每月退交二百四十九周有奇然後復會今月道旣不能環繞黃道又退交之漸當每日差池今必候月終而頓移亦終不能符會天度當省去月環其候月之出入專以曆法步之

其四衡上下二端皆徑一度有半用日之徑也若衡端不能全容日月之體則無由審日月定次欲日月正滿上衡之端不可動移此其所以用一度有半爲法也下端亦一度有半則不然若人目迫下端之東以窺上端之西則差幾三度凡求星之法必令所求之星正當穿之中心今兩端既等則人目游動無因知其正中今以鈎股法求之下徑三分上徑一度有半則兩竅相覆大小略等人目不搖則所察自正其五前世皆以極星爲天中自祖暉以璣衡窺考天極不動處乃在極星之末猶一度有餘今銅儀天樞內徑一度有半乃謬以衡端之度爲率若璣衡端平則極星常游天樞之外璣衡小偏則極星乍出乍入令攢舊法天樞乃徑二度有半蓋欲使極星游於樞中也臣考驗極星更三月而後知天中不動處遠極星乃三度有餘則祖暉窺考猶爲未審今當爲天樞徑七度使人目切南樞望之星正循北極樞裏周常見不隱天體方正其六令攢以辰刻十干八卦皆刻於紘然紘平正而黃道斜運當子午之間則日徑度而道促卯酉之際則日迤行而道舒如此辰刻不能無謬新銅儀則移刻於緯四

游均平辰刻不失然令瓚天中單環直中國人頂之上而新銅儀緯斜絡南北極之中與赤道相直舊法設之無用新儀移之爲是然當側窺如車輪之牙而不當衡規如鼓陶其旁迫狹難賦辰刻而又蔽映星度其七司天銅儀黃赤道與紘合鑄不可轉移雖與天運不符至於窺測之時先以距度星考定三辰所舍復運游儀抵本宿度乃求出入黃道與去極度所得無以異於令瓚之術其法本於晁崇斛蘭之舊制雖不甚精縟而頗爲簡易李淳風嘗謂斛蘭所作鐵儀赤道不動乃如膠柱以考月行差或至十七度少不減十度此正謂直以赤道候月行其差如此今黃赤道度再運游儀抵所舍宿度求之而月行則以月曆每日去極度算率之不可謂之膠也新法定宿而變黃道此定黃道而變宿但可賦三百六十五度而不能具餘分此其爲略也其入令瓚舊法黃道設於月道之上赤道又次月道而璣最處其下每月移一交則黃赤道輒變今當省去月道徙璣於赤道之上而黃道居赤道之下則二道與衡端相迫而星度易審其九舊法規環一面刻周天度一面加銀丁所以施銀丁者夜候天晦不可

目察則以手切之也古之人以璿爲之璿者珠之屬也今司天監三辰儀設齒于環皆不與橫簫會當移列兩旁以便參察其十舊法重機皆廣四寸厚四分其他規軸椎重撲拙不可旋運今小損其制使之輕利其十一古之人知黃道歲易不知赤道之因變也黃道之度與赤道之度相偶者也黃道徙而西則赤道不得獨膠今當變赤道與黃道同法其十二舊法黃赤道平設正當天度掩蔽人目不可占察其後乃別加鑽孔尤爲拙謬今當側置少偏使天度出北際之外自不凌蔽其十三舊法地絃正絡天經之半凡候三辰出入則地際正爲地絃所伏今當徙絃稍下使地際與絃之上際相直候三辰伏見專以絃際爲率自當默與天合又言渾儀製器渾儀之爲器其屬有二相因爲用其在外者曰體以立四方上下之定位其次曰象以法天之運行常與天隨其在內璣衡璣以察緯衡以察經求天地端極三明匿見者體爲之用察黃道降陟辰刻運徙者象爲之用四方上下無所不屬者璣衡爲之用體之爲器爲圓規者四其規之別一曰經經之規二並峙正抵子午若車輪之植二規相距四寸夾規爲

齒以別去極之度北極出紘之上三十有四度十分度之八強南極下紘亦如之對銜二釭聯二規以爲一釭中容樞二曰緯緯之規一與經交於二極之中若車輪之倚南北距極皆九十一度強夾規爲齒以別周天之度三曰紘紘之規一上際當經之半若車輪之仆以考地際周賦十二辰以定八方紘之下有跌從一衡一刻溝受水以爲平中溝爲地以受注水四末建跌爲升龍四以負紘凡渾儀之屬皆屬焉龍吭爲綱維之四捷以爲固象之爲器爲圓規者四其規之別一曰璣璣之規二並峙相距如經之度夾規爲齒對銜二釭釭中容樞皆如經之率設之亦如經其異者經膠而璣可旋二曰赤道赤道之規一刻璣十分寸之三以銜赤道赤道設之如緯其異者緯膠於經而赤道銜於璣有時而移度穿一竅以移歲差三曰黃道黃道之規一刻赤道十分寸之二以銜黃道其南出赤道之北際二十有四度其北入赤道亦如之交於奎角度穿一竅以銅編屬於赤道歲差盈度則并赤道徙而西黃赤道夾規爲齒以別均逸之度璣衡之爲器爲圓規二曰璣對峙相距如象璣之度夾規爲齒皆如象璣其

異者象璣對銜二釭而璣對銜二樞貫于象璣天經之釭中三物相重而不相膠爲間十分寸之三無使相切所以利旋也爲橫簫二兩端夾樞屬于璣其中挾衡爲橫一棲於橫簫之間中衡爲轄以貫橫簫兩末入于璣之罅而可旋璣可以左右以察四方之祥衡可以低昂以察上下之祥浮漏議曰播水之壺三而受水之壺一曰求壺廢壺方中皆圓尺有八寸尺有四寸五分以深其食二斛爲積分四百六十六萬六千四百六十曰復壺如求壺之度中離以爲二元一斛介八斗而中有達曰建壺方尺植三尺有五寸其食斛有半求壺之水復壺之所求也壺盈則水馳壺虛則水凝復壺之脅爲枝渠以爲水節求壺進水暴則流怒以搖復以壺又折以爲介復爲枝渠達其濫溢枝渠之委所謂廢壺也以受廢水三壺皆所以播水爲水制也自復壺之介以玉權醜于建壺建壺所以受水爲刻者也建壺一易箭則發上室以瀉之求復建壺之泄皆欲迫下水所趣也玉權下水之概寸矯而上之然後發則水撓而不躁也復壺之達半求壺之注玉權半復壺之達枝渠博皆分高如其博平方如砥以爲水概壺皆

爲之罍無使穢遊則水道不慧求壺之罍龍紐以其出水不窮也復壺士紐士所以生法者復壺制法之器也廢壺鯨紐止水之濬鯨所伏也銅史令刻執漏政也冬設煇燎以澤凝也注水以龍囑直頸附于壺體直則易浚附于壺體則難敗復壺玉爲之喙銜于龍囑謂之權所以權其盈虛也建壺之執窒旃塗而彌之以重帛窒則不吐也管之善利者水所洩也非玉則不能堅良以久權之所出高則源輕源輕則其委不悍而洩物不利箭不效於璣衡則易權洗箭而改畫覆以璣衡謂之常不弊之術今之下漏者始嘗甚密久復先大者管泐也管泐而器皆弊者無權也弊而不可復壽者術固也察日之晷以璣衡而制箭以日之晷跡一刻之度以賦餘刻刻有不均者建壺有眚也贅者磨之創者補之百刻一度其壺乃善晝夜已復而箭有餘才者權鄙也晝夜未復而壺吐者權沃也如是則調其權此制器之法也下漏必用甘泉惡其泄之爲壺眚也必用一源泉之冽者權之而重重則敏於行而爲箭之情慄泉之鹵者權之而輕輕則椎於行而爲箭之情駑一井不可他汲數汲則泉濁陳水不可再注再注

則行利此下漏之法也箭一如建壺之長廣寸有五分三分去二以爲之厚其陽爲百刻爲十二辰博牘二十有一如箭之長廣五分去半以爲之後陽爲五更爲二十有五籌陰刻消長之衰三分箭之廣其中刻契以容牘夜算差一刻則因箭而易牘鏐匏箭舟也其虛五升重一鎰有半鍛而赤柔者金之美者也然後漬而不墨墨者其久必蝕銀之有銅則墨銅之有錫則屑特銅久灑則腹敗而欽皆工之所不材也景表儀曰步景之法惟定南北爲難古法置槩爲規識日出之景與日入之景晝參諸日中之景夜考之極星極星不當天中而候景之法取晨夕景之最長者規之兩表相去中折以參驗最短之景爲日中然測景之地百里之間地之高下東西不能無偏其間又有邑屋山林之蔽倘在人目之外則與濁氛相雜莫能知其所蔽而濁氛又繫其日之明晦風雨人間烟氣塵坭變作不常臣在本局候景入濁出濁之節日日不同此又不足以考見出沒之實則晨夕景之短長未能得其極數參考舊聞別立新術候景之表三其崇八尺博三寸三分殺一以爲厚者圭首刻其南使偏銳其趺方厚各二



尺環趺刻渠受水以爲準以銅爲之表四方志墨以爲中刻之綴四繩垂以銅丸各當一方之墨先約定四方以三表南北相重令趺相切表別相去二尺各使端直四繩皆附墨三表相去左右上下以度量之令相重如一自日初出則量西景三表相去之度又量三表之端景之所至各別記之至日欲明入候東景亦如之長短同相去之疎密又同則以東西景端隨表景規之半所以求最短之景三者皆合則半折最短之景爲北表南墨之下爲南東西景端爲東西三候一有不合未足以爲正旣得四方則惟設一表方首表下爲石席以水平之植表于席之南端席廣三尺長如九服冬至之景自表趺刻以爲分分積爲寸寸積爲尺爲密室以棲表當極爲晷以下午景使當表端副表并趺崇四寸跌博二寸厚五分方首剡其南以銅爲之凡景表景薄不可辨卽以小表副之則景墨而易度元祐間蘇頌更作者上真渾儀中設渾象旁設昏曉更籌激水以運之三器一機脗合躔度最爲奇巧宣和間又嘗更作之而此五儀者悉歸于金中興更謀制作紹興三年正月工部員外郎袁正功獻渾儀木樣太史局

令丁師仁始請募工鑄造且言東京舊儀用銅二萬餘請折半用八千斤有奇已而不就蓋在廷諸臣罕通其制度者乃召蘇頌子攜取頌遺書考質舊法而攜亦不能通也至十四年闕乃命宰臣秦檜提舉鑄渾儀而以內侍邵諤專領其事久而儀成三十二年始出其二實太史局而高宗先自爲一儀實諸宮中以測天象其制差小而邵諤所鑄蓋祖是焉後在鐘鼓院者是也清臺之儀後其一在祕書省按儀制度表裏凡三重其第一重曰六合儀陽經徑四尺九寸六分闊三寸二分厚五分南北正位兩面各列周天度數南北極出入地皆三十一度少度闊三分陰緯單環大小如陽經闊三寸二分厚一寸八分上置水平池闊九分深四分沿環通流亦如舊制內外八幹十二枝畫良巽坤乾卦於四維第二重曰三辰儀徑四尺三寸闊二寸二分厚五分釭釧刻畫如陽經赤道單環徑四尺一寸四分闊一寸徑二分厚五分上列二十八宿均天度數闊二分七釐黃道單環徑四尺一寸四分闊一寸二分厚五分上列七十二候均分卦策與赤道相出入各二十四度弱百刻單環徑四尺五寸六分闊一寸

二分厚五分上列晝夜刻數第三重曰四游儀徑三尺九寸闊一寸九分厚五分釭釧刻畫如璿璣度闊二分半望筩長三尺六寸五分內圓外方中通孔竅四面闊一吋四分七釐窺眼闊三分夾窺徑五尺三分釐雲以負龍柱龍柱各高五尺二吋十字平水臺高一尺一寸七分長五尺七寸闊五寸二分水槽闊七分深一寸二分若水運之法與夫渾象則不復設其後朱熹家有渾儀頗考水運制度卒不可得蘇頌之書雖在大抵於渾象以爲詳而其尺寸多不載是以難遽復云舊制有白道儀以考月行在望筩之旁自熙寧沈括以爲無益而去之南渡更造亦不復設焉

極度

極度極星之在紫垣爲七曜三垣二十八宿衆星所拱是謂北極爲天之正中而自唐以來曆家以儀象考測則中國南北極之正實去極星之北一度有半此蓋中原地勢之度數也中興更造渾儀而太史令丁師仁乃言臨安府地勢向南於北極高下當量行移易局官呂璨言渾天無量行更易之制若用於臨

安與天參合移之他往必有差忒遂罷議後十餘年邵諤鑄儀則果用臨安北極高下爲之以清臺儀校之實去極星四度有奇也

### 黃赤道

黃赤道占天之法以二十八宿爲綱維分列四方南北去極各九十有一度有奇南低而北昂去地各三十有六度一定不易者名之曰赤道以日躔半在赤道內半在赤道外出入內外極遠者皆二十有四度以其行赤道之中者名之曰黃道凡五緯皆隨日由黃道行惟月之行有九道四時交會歸於黃道而轉變焉故有青黑白赤四者之異名夫赤道終古不移則星舍宜無盈縮矣然自唐一行作大衍曆以儀揆測之得畢觜參鬼四宿分度與古不同皇祐初日官周琮以新儀測候與唐一行尤異紹聖二年清臺以赤道度數有差復命考正惟牛尾室柳四宿與舊法合其他二十四宿躔度或多或少蓋天度之不齊古人特紀其大綱後世漸極於精密也若夫黃道橫絡天體列宿躔度自隨歲差而增減中興以來用統元紀元及乾道淳熙開禧統天會元每一曆更一黃道

其多寡之異有不可勝載者而步占家亦隨各曆之躔度焉

中星

中星四時中星見於堯典蓋聖人南面而治天下卽日行而定四時虛鳥火昴之度在天夷隩析因之候在人故書首載之以見授時爲政之大也而後世考驗冬至之日堯時躔虛至於三代則躔于女春秋時在牛至後漢永元已在斗矣大略六十餘年輒差一度開禧占測已在箕宿校之堯時幾退四十餘度蓋自漢太初至今已差一氣有餘而太陽之躔十二次大約中氣前後乃得本月宮次蓋太陽日行一度近歲紀元曆定歲差約退一分四十餘秒蓋太陽日行一度而微遲緩一年周天而微差積累分秒而躔度見焉曆家考之萬五千年之後所差半周天寒暑將易位世未有知其說者焉

土圭

土圭周官大司徒以土圭之法正日景以求地中而馮相氏春夏致日秋冬致月以辨四時之敘漢之造曆必先定東西立晷儀唐詔太史測天下之晷蓋校

定日景推驗氣節必先乎此也宋朝測景在浚儀之岳臺崇寧間姚舜輔造紀元曆求岳臺晷景冬至後初限六十二日二十二分蓋立八尺之表俟圭尺上正八尺之景去冬至多寡日辰立爲初限用減二至得一百二十日四十二分爲夏至後初限以爲後法蓋冬至之景長短實與歲差相應而地里遠近古今亦不同焉中興後清臺亦立晷圭如汴京之制冬至必測驗焉統天曆開禧曆亦皆以六十二日數分爲冬至初限而議者謂臨安之晷景當與岳臺異或謂當立八尺之表俟圭景上八尺之景在四十九日有奇當用四十九日五分爲臨安冬至後初限用減二至限得一百三十三日有奇爲夏至後初限參合天道其法爲密焉然土圭之法本以致日景求地中而表景不應災祥繫焉占家知之而亦不能知其所以然也

宋史卷四十八

宋

史

卷四十八

天文志

十一 中華書局聚

宋史卷四十八

...

...

...

...

...

...

...

...

...

...

...

...

宋史卷四十八考證

天文志一宋王蕃之論亦云○臣召南按宋字係吳字之訛王蕃是孫吳中常

侍其言渾天儀即羲和之舊謂之璣衡屢見前史志中

七曰赤道與黃道等帶天之絃○絃當作紘

東交角宿五度少○文字下旁注闕字臣召南按文義此句正對下句西交奎

宿一十四強無闕文也舊本每於無闕文處作闕文何也

當度之畫者凡二十有八○臣召南按畫字係畫字之訛每宿有距度之星即

畫也刊本相沿脫一筆耳

然當側窺如車輪之牙○側窺當作側規玩下文可見

宋史卷四十八考證



宋史卷四十八

○附錄書中備錄宋下五百

書中本附錄一書耳

書史之書卷八二十言八○曰各節 附書中附錄宋下五百

附一十四國書文出書本卷錄無漏文卷附錄文

宋史卷四十八○文字不絕此類字曰各節 附書中附錄宋下五百

十日未書錄卷附錄宋下五百○附錄書中

附錄書中附錄宋下五百○附錄書中

宋史卷一宋王書之附錄云○附錄書中附錄宋下五百

宋史卷四十八

宋史卷四十九

元中書右丞相總裁脫脫等修

天文志第二

天文二

紫微垣  
天市垣

太微垣

紫微垣

紫微垣東蕃八星西蕃七星在北斗北左右環列翊衛之象也一曰大帝之坐

天子之常居也主命主度也東蕃近閭闔門第一星為左樞第二星為上帝三

星曰少宰四星曰上弼

一曰上輔

五星為少弼

一曰少輔

六星為上衛七星為少衛八星

為少丞

或曰上丞

其西蕃近閭闔門第一星為右樞第二星為少尉第三星為上輔

第四星為少輔第五星為上衛第六星為少衛第七星為上丞其占欲均明大

小有常則內輔盛垣直天子自將出征門開兵起宮垣兩蕃正南開如門曰閭

闔有流星自門出四野者當有中使銜命視其所往分野論之不依門出入者

外蕃國使也太陰歲星犯紫微垣有喪太白辰星犯之改世熒惑守宮君失位

宋

史

卷四十九

天文志

中華書局聚

客星守有不臣國易政國皇星兵彗星犯有異王立流星犯之為兵喪水旱不

調使星入北方兵起石氏云東西兩蕃總十六星西蕃亦八星一右樞二上尉三少尉四上輔五少輔六上衛七少衛八少丞上宰一星

上輔二星三公也少宰一星少輔二星三孤也此三公三孤在朝者也左右  
樞上少丞疑丞輔弼四隣之謂也尉二星衛四星六軍大副尉四衛將軍也

北極五星在紫微宮中北辰最尊者也其紐星為天樞天運無窮三光迭耀而

極星不移故曰居其所而眾星共之樞心在天心四方去極各九十一度賈逵

張衡蔡邕王蕃陸績皆以北極紐星之樞是不動處在紐星末猶一度有餘今

清臺則去極四度半第一星主月太子也二星主日帝王也亦太一之坐謂最

赤明者也第三星主五行庶子也乾永新星書曰第三星主五行第四星主諸王第五星為後宮閔云北極五星初一日帝

次二曰后次三曰妃次四曰太子次五曰庶子四曰太子者最赤明者也後四  
星勾曲以抱之者帝星也太公望以為北辰以為耀魄寶以為帝極者是也或

以勾陳口中一星北極中星不明主不用事右星不明太子憂左星不明庶子

為耀魄寶者非是憂明大動搖主好出游色青微者凶客星入為兵喪彗星入為易位流星入兵

起地動

北斗七星在太微北杓攜龍角衡殷南斗魁枕參首是為帝車運於中央臨制

四海以建四時均五行移節度定諸紀乃七政之樞機陰陽之元本也魁第一星曰天樞正星主天又曰樞爲天主陽德天子象其分爲秦漢志主徐州天象占曰天子不恭宗廟不敬鬼神則不明變色二曰璇法星主地又曰璇爲地主陰刑女主象其分爲楚漢志主益州天象占曰若廣營宮室妄鑿山陵則不明變色三曰璣爲人主火爲令星主中禍其分爲梁漢志主冀州若王者不恤民驟征役則不明變色四曰權爲時主水爲伐星主天理伐無道其分爲吳漢志主荊州若號令不順四時則不明變色五曰玉衡爲音主土爲殺星主中央助四方殺有罪其分爲燕漢志主兗州若廢正樂務淫聲則不明變色六曰闔陽爲律主木爲危星主天倉五穀其分爲趙漢志主揚州若不勸農桑峻刑法退賢能則不明變色七曰搖光爲星主金爲部星爲應星主兵其分爲齊漢志主豫州王者聚金寶不脩德則不明變色又曰一至四爲魁魁爲璇璣五至七爲杓杓爲玉衡是爲七政星明其國昌第八曰弼星在第七星右不見漢志主幽州第九曰輔星在第六星左常見漢志主并州晉志輔星傳乎闔陽所以佐斗

成功丞相之象也其色在春青黃在夏赤黃秋為白黃冬為黑黃變常則國有兵殃明則臣強斗旁欲多星則安斗中星少則人恐太陰犯之為兵喪大赦白暈貫三星王者惡之星孛于北斗主危彗星犯為易主流星犯主客兵客星犯為兵五星犯之國亂易主

按北斗與輔星為八而漢志云九星武密及楊維德皆采用之史記索隱云北斗星間相去各九千里其二陰星不見者相去八千里而丹元子步天歌亦云九星漢書必有所本矣

勾陳六星在紫宮中五帝之後宮也太帝之正妃也大帝之帝居也樂緯曰主後宮巫咸曰主天子護軍荊州占主大司馬或曰主六軍將軍或曰主三公三師為萬物之母六星比陳象六宮之化其端大星曰元始餘星乘之曰庶妾在北極配六輔甘氏曰勾陳在辰極左是為鉤陳衛六軍將軍或以為後宮非是勾陳口中一星為陽德天皇大帝內坐或即以為天皇大帝非是其占色不欲甚明明即女主惡之星盛則輔強主不用諫佞人在側則不見客星入之色蒼白將有憂白為立將赤黑將死客星出而色赤戰有功守之後宮

有使女欲謀彗星犯之后宮有謀近臣憂流星入爲迫主青氣入大將憂  
天皇大帝一星在勾陳口中其神曰耀魄寶主御羣靈軌萬神圖大人之象也  
客星犯之爲除舊布新彗孛犯大臣叛流星犯國有憂雲氣入之潤澤吉黃白  
氣入連大帝坐臣獻美女出天皇上者改立王

四輔四星又名四弼在極星側是曰帝之四鄰所以輔佐北極而出度授政也  
去極星各四度闕云四輔一名中斗或以爲後宮非是武密曰光浮而動凶明小吉暗則不理客

星犯之大臣憂彗孛犯權臣死流星犯大臣黜黃白氣入四輔有喜白氣入相  
失位

五帝內坐五星在華蓋下設敘順帝所居也色正吉變色爲災客星犯紫宮中  
坐占爲大臣犯主彗孛犯之民饑大臣憂三年有兵起流星犯爲兵起臣叛出  
爲有誅戮雲氣入色黃太子卽位期六十日赤黃人君有異

六甲六星在華蓋杠旁主分陰陽配節候故在帝旁所以布政教授農時也明  
則陰陽和不明則寒暑易節星亡水旱不時客星犯之色赤爲旱黑爲水白則

人多疫彗孛犯女主出政令流星犯爲水旱術士誅雲氣犯色黃術士興蒼白  
史官受爵

柱史一星在北極東主記過左右史之象一云在天柱前司上帝之言動星明  
爲史官得人不明反是客星犯之史官有黜者彗孛犯太子憂或百官黜流星  
犯君有咎雲氣犯色黃史有爵祿蒼白氣入左右史死  
女史一星在柱史北婦人之微者主傳漏

天柱五星在東垣下一云在五帝左稍前主建政教一曰法五行主晦朔晝夜  
之職明正則吉人安陰陽調不然則司歷過客星犯之國中有賊彗孛犯宗廟  
不安君憂一曰三公當之雲氣赤黃君喜黑三公死

女御四星在大帝北一云在勾陳腹一云在帝坐東北御妻之象也星明多內  
寵客星犯之後宮有誅一云自戮孛彗犯後宮有誅流星犯後宮有出者一云  
外國進美女雲氣化黃爲後宮有子喜蒼白多病

尙書五星在紫微東蕃內大理東北晉志在東南維一云在天柱右稍前主納

言夙夜咨謀龍作納言之象彗孛犯之官有叛或太子憂流星若出則尙書出使犯之諫官黜入坐憂雲氣入黃爲喜黃而赤尙書出鎮黑尙書有坐罪者

大理二星在宮門左一云在尙書前主平刑斷獄明則刑憲平不明則獄有冤酷客星犯之責臣下獄色黃赦白受戮赤黃無罪守之則刑獄冤滯或刑官有黜彗犯獄官憂流星占同雲氣入黃白爲赦黑法官黜

陰德二星巫咸圖有之在尙書西廿氏云陰德外坐在尙書右陽德外坐在陰德右太陰太陽入垣翊衛也天官書則以前列直斗口三星隨北端銳若見若不見曰陰德謂施德不欲人知也主周急振撫明則立太子或女主治天下客星犯之爲旱饑守之發粟振給彗孛犯後宮有逆謀流星犯君令不行雲氣入黃爲喜青黑爲憂

天牀六星在紫微垣南門外主寢舍解息燕休一曰在二樞之間備幸之所也陶隱居云傾則天王失位客星入宮中有刺客或內侍憂彗孛犯之主憂大臣失位流星犯后妃叛女主立或人君易位雲氣入色黃天子得美女後宮喜有



子蒼白主不安青黑憂白凶

華蓋七星杠九星如蓋有柄下垂以覆大帝之坐也在紫微宮臨勾陳之上正吉傾則凶客星犯之王室有憂兵起彗孛犯兵起國易政流星犯兵起宮內以赦解之貫華蓋三公災雲氣入黃白主喜赤黃侯王喜

傳舍九星在華蓋上近河賓客之館主北使入中國客星犯邦有憂一曰客星守之備姦使亦曰北地兵起彗孛犯守之亦為北兵黑雲氣入北兵侵中國

八穀八星在華蓋西五車北一曰在諸王西武密曰主候歲豐儉一稻二黍三大麥四小麥五大豆六小豆七粟八麻甘氏曰八穀在宮北門之右司親耕司

候歲司尚食星明吉一星亡一穀不登八星不見大饑客星入穀貴彗星入為水黑雲氣犯之八穀不收

內階六星在文昌東北天皇之階也一曰上帝幸文館之內階也明吉傾動憂彗孛客流星犯之人君遜避之象

文昌六星在北斗魁前紫微垣西天之六府也主集計天道一曰上將大將軍

建威武二曰次將尙書正左右三曰貴相太常理文緒四曰司祿司中司隸賞  
功進五曰司命司怪太史主滅咎六曰司寇大理佐理寶所謂一者起北斗魁  
前近內階者也明潤色黃大小齊天瑞臻四海安青黑微細則多所殘害動搖  
三公黜月暈其宿大赦歲星守之兵起熒惑守之將凶太白守入兵興填星守  
國安客星守大臣叛彗孛犯大亂流星犯宮內亂

三公三星在北斗杓南及魁第一星西一云在斗柄東爲太尉司徒司空之象  
在魁西者各三師占與三公同皆主宣德化調七政和陰陽之官也移徙不吉  
居常則安一星亡天下危二星亡天下亂三星不見天下不治客星犯三公憂  
彗孛及流星犯之三公死

天牢六星在北斗魁下貴人之牢也主繩愆禁暴甘氏云賤人之牢也月暈入  
多盜熒惑犯之民相食國有敗兵太白歲星守國多犯法客星彗星犯之三公  
下獄或將相憂流星犯之有赦宥之令

勢四星在太陽守西北一曰在璣星北勢腐刑人也主助宣王命內常侍官也

以不明爲吉明則闇人擅權

天理四星在北斗魁中貴人之牢也星不欲明其中有星則貴人下獄客星犯多獄彗孛犯之國危赤雲氣犯之兵大起將相行兵相一星在北斗第四星南總百司集衆事掌邦典以佐帝王一曰在中斗文昌之南在朝少師行太宰者明吉暗凶亡則相黜

太陽守一星在相星西北斗第三星西南大將大臣之象主設武備以戒不虞一曰在下臺北太尉官也在朝少傅行大司馬者明吉暗凶客彗孛犯之爲易政將相憂兵亂雲氣入黃爲喜蒼將死赤大臣憂

內廚二星在紫微垣西南外主六宮之內飲食及后妃夫人與太子燕飲彗孛或流星犯之飲食有毒

天廚六星在扶筐北一曰在東北維外主盛饌今光祿廚也星亡則饑不見爲凶客星流星犯之亦爲饑

天一星在紫微宮門右星南天帝之神也主戰鬪知吉凶明則陰陽和萬物

威人君吉亡則天下亂客星犯五穀貴彗孛犯之臣叛流星犯兵起民流雲氣犯黃君臣和黑宰相黜

太一一星在天一南相近一度亦天帝神也主使十六神知風雨水旱兵革饑饉疾疫災害所在之國也明吉暗凶離位有水旱客星犯兵起民流火災水旱饑饉彗孛犯兵喪流星犯宰相史官黜雲氣犯黃白百官受賜赤爲兵旱蒼白民多疫

天槍三星在北斗杓東一曰天鉞天之武備也故在紫微宮左右所以禦難也明吉暗小兵敗芒角動兵起客星彗星流星犯皆爲兵饑

天棓五星在女牀北天子先驅也主分爭與刑罰藏兵亦所以禦難備非常也一星不具其國兵起明有憂細微吉客星入兵喪彗星守兵起流星犯諸侯多爭雲氣犯蒼白黑爲凶

天戈一星又名玄戈在招搖北主北方芒角動搖則北兵起客星守之北兵敗彗孛流星犯之占同雲氣犯黑爲北兵退蒼白北人病

太尊一星在中臺北貴戚也不見爲憂客彗流星犯之並爲貴戚將敗之徵

天按步天歌載中宮紫微垣經星常宿可名者三十五坐積數一百六十有四而晉志所載太尊天戈天槍天棓皆屬太微垣八穀八星在天市垣與步天歌不同

太微垣

太微垣十星漢志曰南宮朱鳥權衡晉志曰天子庭也五帝之坐也十二諸侯之府也其外蕃九卿也一曰太微爲衡衡主平也又爲天庭理法平辭監升授德列宿受符諸神考節舒情稽疑也南蕃中二星間曰端門東曰左執法廷尉之象西曰右執法御史大夫之象執法所以舉刺凶邪左執法東左掖門也右執法西右掖門也東蕃四星南第一曰上相其北東太陽門也第二曰次相其北中華東門也第三曰次將其北東太陽門也第四曰上將所謂四輔也西蕃四星南第一曰上將其北西太陽門也第二曰次將其北中華西門也第三曰次相其北西太陽門也第四曰上相亦曰四輔也漢志環衛十二星蕃臣西將

東相南四星執法中端門左右掖門乾象新書十星東西各五在翼軫北其西  
蕃北星爲上相南門右星爲右執法東西蕃有芒及動搖者諸侯謀上執法移  
刑罰尤急月五星入太微軌道吉其所犯中坐成刑月犯太微垣輔臣惡之又  
君弱臣強四方兵不制犯執法海中占云將相有免者期三年月入東西門左  
右掖門而南出端門有叛臣君憂入西門出東門君憂大臣假主威月中犯乘  
守四輔爲臣失禮輔臣有誅月暈天子以兵自衛一月三暈太微有赦月食太  
微大臣憂王者惡之歲星入有赦犯之執法臣有憂入東門天下有急兵守之  
將相執法憲臣死入端門守天庭大禍至入南門出東門旱入南門逆出西門  
國有喪逆行入東門出西門國破亡填星熒惑犯之逆行入爲兵喪犯上將上  
將憂守端門國破亡或三公謀上有戮臣犯西上將天子戰于野上相死入太  
微色白無芒天下饑退行不正有大獄犯太微門左右將死入天庭在屏星南  
出左掖門左將死右掖門右將死直出端門無咎入太微凌犯留止爲兵入二  
十日廷尉當之留天庭十日有赦犯太微東南陬歲饑執法大臣憂犯上相大

臣死填星犯入太微有德令女主執政若逆行執法守之有憂守太微國破守西蕃王者憂太白犯入太微爲兵大臣相殺留守有兵喪與填星犯太微中王者惡之入右掖門從端門出貴人奪勢晝見太微國有兵喪月掩太白于端門外國受兵辰星犯太微天子當之有內亂入天庭後宮憂大水守左右執法入兵起有赦入西門後宮災大水入西門出東門爲兵喪水災客星犯入太微色黃白天子喜出入端門國有憂左掖門旱右掖門國亂出天庭有苛令兵起入太微三十日有赦犯四輔輔臣凶彗星犯太微天下易出太微宮中憂火災犯執法執法者黜犯天庭王者有立孛于翼近太微上將爲兵喪孛于西蕃主革命孛五帝亡國殺君流星出太微大臣有外事出南門甚衆貴人有死者縱橫太微宮主弱臣強由端門入翼光照地有聲有立主雲氣出入色微青君失位青白黑雲氣入左右掖爲喪出無咎赤氣入東掖門內起兵黃白雲氣入太微垣人主喜年壽長入左右掖門天子有德令黑及蒼白氣入天子憂出則無咎黑氣如蛇入垣門有喪

內五帝坐五星內一星在太微中黃帝坐含樞紐之神也天子動得天度止得  
地意從容中道則明以光不明則人主當求賢以輔法不則奪勢四帝星夾黃  
帝坐四方各去二度東方蒼帝靈威仰之神也南方赤帝赤熒怒之神也西方  
白帝白招拒之神也北方黑帝叶光紀之神也黃帝坐明天子壽威令行小則  
反是勢在臣下若亡大人當之月出坐北禍大出坐南禍小出近之大臣誅或  
饑犯黃帝坐有亂臣抵帝坐有土功事月暈帝坐有赦海中占月犯帝坐人主  
惡之五星守黃帝坐大人憂熒惑太白入有強臣歲星犯有非其主立熒惑犯  
兵亂入天庭至帝坐有赦太白入之兵在宮中填逆行守黃帝坐亡君之戒五  
星入色白爲亂客星色黃白抵帝坐臣獻美女彗星入宮亂抵帝坐或如粉絮  
兵喪並起流星犯之大臣憂抵四帝坐輔臣憂人多死蒼白氣抵帝坐天子有  
喪青赤近臣欲謀其主黃白天子有子孫喜月犯四帝天下有喪諸侯有憂五  
星犯四帝爲憂

太子一星在帝坐北帝儲也儲有德則星明潤雲氣入黃爲喜黑爲憂太白熒



感客星流星守犯皆爲憂一云金火守之或入太子不廢則爲篡逆之事

內五諸侯五星在九卿西內侍天子不之國也乾象新書在郎位南辟雍禮得則星明亡則諸侯黜

從官一星在太子北侍臣也以不見爲安一曰不見則帝不安如常則吉

幸臣一星在帝坐東北常侍太子以暗爲吉新書在太子東青赤氣入之近臣謀君不成

內屏四星在端門內近右執法屏者所以擁蔽帝庭也

左右執法各一星在端門兩旁左爲廷尉之象右爲御史大夫之象主舉刺凶姦君臣有禮則光明潤澤乾象新書在中台南明則法令平月五星及客星犯守則君臣失禮輔臣黜熒惑太白入爲兵流星犯之尙書憂

郎位十五星在帝坐東北一曰依烏郎府也周之元士漢之光祿中散諫議議郎郎中是其職主衛守也其星不具后妃災幸臣誅星明大或客星入之大臣爲亂元士憂彗孛犯郎官失勢彗星枉矢出其次郎佐謀叛熒惑守之兵喪赤

氣入兵起黃白吉黑凶

郎將一星在郎位北主閱具以爲武備也若今之左右中郎將新書曰在太微

垣東北明大臣叛客星犯守郎將誅黃白氣入則受賜流星犯將軍憂

常陳七星如畢狀在帝坐北天子宿衛虎賁之士以設強禦也星搖動天子自

出將明則武兵用微則弱客星犯王者行誅

九卿三星在三公北主治萬事今九卿之象也乾象新書在內五諸侯南占與

天紀同

三公三星在謁者東北內坐朝會之所居也乾象新書在九卿南其占與紫微

垣三公同

謁者一星在左執法東北主贊賓客辨疑惑乾象新書在太微垣門內左執法

北明盛則四夷朝貢

三台六星兩兩而居起文昌列抵太微一曰天柱三公之位也在人曰三公在

天曰三台主開德宣符西近文昌二星曰上台爲司命主壽次二星曰中台爲

司中主宗室東二星曰下台爲司祿主兵所以昭德塞違也又曰三台爲天階  
太一躡以上下一曰泰階上階上星爲天子下星爲女主中階上星爲諸侯三  
公下星爲卿大夫下階上星爲士下星爲庶人所以和陰陽而理萬物也又曰  
上台上星主兗豫下星主荆揚中台上星主梁雍下星主冀下台上星主青下  
星主徐人主好兵則上階上星疏而色赤修宮廣囿肆聲色則上階合而橫君  
弱則上階迫而色暗公侯皆叛率部動兵則中階上星赤外夷來侵邊國騷動  
則中階下星疏而橫色白卿大夫廢正向邪則中階下星疏而色赤民不從令  
犯刑爲盜則下階下星色黑去本就末奢侈相尙則下階上星闊而橫色白君  
臣有道賦省刑清則上階爲之戚諸侯貢聘公卿盡忠則中階爲之比庶人奉  
化徭役有敘則下階爲之密若主奢欲數奪民時則上階爲之奪諸侯僭強公  
卿專貪則中階爲之疏士庶逐末豪傑相凌則下階爲之闊三階平則陰陽和  
風雨時穀豐世泰不平則反是三台不具天下失計色明齊等君臣和而政令  
行微細反是一曰天柱不見王者惡之司命星亡春不得耕司中不具夏不得

耨司祿不具秋不得穫一曰三台色青天疾赤爲兵黃潤爲德白爲喪黑爲憂月入君憂臣亂公族叛月入而暈三公下獄客星入之貴臣賜爵邑出而色蒼臣奪爵守之大臣黜或貴臣多病彗星犯三公黜流星入天下兵將憂抵中台將相憂人主惡之雲氣入蒼白民多傷黃白潤澤民安君喜黃將相喜赤爲憂青黑憂在三公蒼白三公黜

按上台二星在柳北其北星入柳六度中台二星其北入張二度下台二星在太微垣西蕃北其北星入翼二度武密書三台屬鬼又屬柳屬張乾象新書上台屬柳中台屬張下台屬翼

長垣四星在少微星南主界域及北方熒惑入之北人入中國太白入九卿謀邊將叛彗孛犯之北地不安流星入北方兵起將入中國

少微四星在太微西士大夫之位也一名處士亦天子副主或曰博士官一曰主衛掖門南第一星處士第二星議士第三星博士第四星大夫明大而黃則賢士舉月五星犯守之處士女主憂宰相易歲犯小人用忠臣危火犯賢德退

士犯宰相易女主憂金犯大臣誅又曰以所居主占之客星孛星犯之王者憂  
姦臣衆彗星犯功臣有罪一曰法令臣誅流星出賢良進道術用雲氣入色蒼  
白賢士憂大臣黜

靈臺三星在明堂西神之精明曰靈四方而高曰臺主觀雲物察符瑞候災變  
也武密曰與司怪占同

虎賁一星在下台星南一曰在太微西蕃北下台南靜室旄頭之騎官也明則  
臣順與車騎星同占

明堂三星在太微西南角外天子布政之宮明吉暗凶五星客星及彗犯之主  
不安其宮

右上元太微宮常星一十九坐積數七十有八而晉志所載少微長垣各四  
星屬天市垣與步天歌不同

天市垣

天市垣二十二星在氏房心尾箕斗內宮之內東蕃十一星南一曰宋二曰南

海三曰燕四曰東海五曰徐六曰吳越七曰齊八曰中山九曰九河十曰趙十一曰魏西蕃十一星南一曰韓二曰楚三曰梁四曰巴五曰蜀六曰秦七曰周八曰鄭九曰晉十曰河間十一曰河中象天王在上諸侯朝天王出皋門大朝會西方諸侯在應門左東方諸侯在應門右其率諸侯幸都市也亦然一曰在房心東北主權衡主聚衆又曰天旗庭主斬戮事乾象新書曰市中星衆潤澤則歲實熒惑守之戮不忠之臣彗星掃之爲徙市易都客星入爲兵起出爲貴喪天文錄曰天子之市天下所會也星明大則市吏急商人無利小則反是忽然不明糴貴中多小星則民富月入天市易政更弊近臣有抵罪兵起月守其中女主憂大臣災五星入將相憂五官災守之主市驚更弊又曰五星入兵起熒惑守大饑火災或芒角色赤如血市臣叛填星守糴貴太白入起兵糴貴辰星守蠻夷君死客星守度量不平星色白市亂出天市有喪彗星守穀貴出天市豪傑起徙易市都掃帝坐出天市除舊布新流星入色蒼白物貴赤火災民疫一曰出天市爲外兵雲氣入色蒼白民多疾蒼黑物貴出物賤黃白物賤黑

為嗇夫死

帝坐一星在天市中天皇大帝外坐也光而潤澤主吉威令行微小大人憂月犯之人主憂五星犯臣謀主下有叛熒惑尤甚客星入色赤有兵守之大臣為亂彗孛犯人民亂宮廟徙流星犯諸侯兵起臣謀主貴人更令  
候一星在帝坐東北  
作后主伺陰陽也明大輔臣強細微國安亡則主失位移則不安居太陰犯之輔臣憂客彗守之輔臣黜字犯臣謀叛

宦者四星在帝坐西南侍主刑餘之臣也星微吉失常宦者有憂

斗五星在宦者南主平量乾象新書在帝坐西覆則歲熟仰則荒客彗犯為饑  
斛四星在斗南主度量分銖算數其星不明凶亡則年饑一曰在市樓北各天

斛

列肆二星在斛西北主貨金玉珠璣

屠肆二星在帛度東北主屠宰烹殺乾象新書在天市垣內十五度

車肆二星在天市門中主百貨星不明則車蓋盡行明則吉客星彗星守之天

下兵車盡發乾象新書在天市垣南門偏東  
宗正二星在帝坐東南宗大夫也武密曰主司宗得失之官乾象新書在宗人  
西彗星守之若失色宗正有事客星守之更號令也犯之主不親宗廟星守其  
分宗正黜

宗人四星在宗正東主錄親疏享祀宗族有序則星如綺文而明正動則天子  
親屬有變客星守之貴人死

宗星二星在候星東宗室之象帝輔血脈之臣乾象新書在宗人北客星守之  
宗支不和暗則宗支弱

帛度二星在宗星東北主度量買賣平貨易者乾象新書在屠肆南星明大尺  
量平商人不欺客星彗星守之絲綿大貴

市樓六星在天市中臨箕星之上市府也主市賈律度其陽爲金錢陰爲珠玉  
變見各以其所占之乾象新書主闡闡度律制令在天市中星明吉暗則市吏  
不理彗星客星守之市門多閉



七公七星在招搖東爲天相三公之象也主七政明則輔佐強大而動爲兵齊正則國法平戾則獄多囚連貫索則世亂入河中糴貴民饑太白守之天下亂兵起客星守歲饑主危流星出其分主將黜

貫索九星在七公星前賤人之牢也一曰連索一曰連營一曰天牢主法律禁強暴牢口一星爲門欲其開也星在天市垣北星皆明天下獄繁七星見小赦五星六星大赦動則斧鑕用中空改元石申曰一星亡則有賜爵三星亡大赦遠期八十日入河中爲饑中星衆則囚多辰星犯之主水米貴彗星出其分中外豪傑起客星入有枉死者色黃諸侯獻地青爲憂赤爲兵白乃爲吉流星入女主憂或赦出則貴女死雲氣入色蒼白天子亡地青兵起黑獄多枉死白天

子喜

五嶠

天紀九星在貫索東九卿之象萬事綱紀主獄訟星明則天下多訟亡則政理壞國紀亂散絕則地震山崩與女牀合則君失禮女謁行客星守之主危民饑客星犯諸侯舉兵彗孛犯之地震客星彗星合守天下獄訟不理

女牀三星在天紀北後宮御女侍從官也主女事明則宮人恣舒則妾代女主不動則吉不見女子多疾客星彗星守之宮人謀上客星入女子憂後宮恣動女謁行雲氣出色黃後宮有福白爲喪黑凶青女多疾

右天市垣常星可名者一十七坐積數八十有八而市樓天斛列肆車肆斗帛度屠肆等星晉志皆不載隋志有之屬天市垣與步天歌合又貫索七公女牀天紀晉志屬太微垣按乾象新書天紀在天市垣北女牀屬箕宿貫索屬房宿七公屬氏宿武密以七公屬房又屬尾貫索屬房又屬氏屬心女牀屬於尾箕說皆不同

宋史卷四十九

宋史卷四十八

...

...

...

...

...

...

...

...

...

...

宋史卷四十九考證

天文志二賈逵張衡蔡邕王蕃陸續皆以北極紐星之樞是不動處在紐星末猶一度有餘○臣召南按在紐星末上有脫文猶一度有餘下有脫文隋志

曰賈逵張衡蔡邕王蕃陸續皆以北極紐星爲樞是不動處也祖暉以儀準候不動處在紐星之末猶一度有餘又按本志前文引沈括渾儀議云前世皆以極星爲天中自祖暉以璣衡窺考天極不動處乃在極星之末猶一度有餘臣考驗極星更三月而後知天中不動處乃三度有餘則祖暉猶爲未審据此則本文在紐星末之上脫祖暉以儀準候不動處九字猶一度有餘之下又脫熙寧中沈括測去極三度有餘十二字也若如本文是賈逵諸人已測知極星之去天中尙遠矣豈事實乎南北二本並同存說於此

衡殷南斗○南字下空一格臣召南按此用天官書語無闕文也

主御羣靈軌萬神圖○按隋志作執萬神圖此軌字誤

華蓋七星○晉隋二志並作九星

宋

史

卷四十九考證

一

中華書局聚

太微垣十星志曰南宮朱鳥權衡○按志上當有漢字

左右執法各一星云云○臣召南按左右執法即太微垣十星中之二星也已

尚序於前此又復出一書曰召南按此用天官書語無關文也

曰漢書太微垣十星志曰南宮朱鳥權衡○按志上當有漢字

志不又漢書太微垣十星志曰南宮朱鳥權衡○按志上當有漢字

宋史卷四十九考證

言漢書太微垣十星志曰南宮朱鳥權衡○按志上當有漢字

嘗又漢書太微垣十星志曰南宮朱鳥權衡○按志上當有漢字

對不漢書太微垣十星志曰南宮朱鳥權衡○按志上當有漢字

曰漢書太微垣十星志曰南宮朱鳥權衡○按志上當有漢字

雖一漢書太微垣十星志曰南宮朱鳥權衡○按志上當有漢字

天文志二漢書太微垣十星志曰南宮朱鳥權衡○按志上當有漢字

宋史卷五十

元中書右丞相總裁星脫日脫等修

天文志第三

天文三 二十八舍上

二十八舍

東方角宿二星為天關其間天門也其內天庭也故黃道經其中七曜之所行也左角為天田為理主刑其南為太陽道右角為將主兵其北為太陰道蓋天之三門猶房之四表星明大吉王道太平賢者在朝動搖移徙王者行左角赤明獄平暗而微小王道失陶隱居曰左角天津右角天門中為天關日食角宿王者惡之暈于角內有陰謀陰國用兵得地又主大赦月犯角大臣憂獄事法官憂黜又占憂在宮中月暈其分兵起右角右將災左亦然或曰主水色黃有大赦月暈三重入天門及兩角兵起將失利歲星犯為饑熒惑犯之國衰兵敗犯左角有赦右角兵起守之讒臣進政事急居陽有喜填星犯角為喪一曰兵

起太白犯角羣臣有異謀辰星犯爲小兵守之大水客星犯兵起五穀傷守左  
角色赤爲旱守右角大水彗星犯之色白爲兵赤所指破軍出角天下兵亂星  
孛于角白爲兵赤軍敗入天市兵喪流星犯之外國使來入犯左角兵起雲氣  
黃白入右角得地赤入左有兵入右戰勝黑白氣入于右兵將敗  
按漢永元銅儀以角爲十二度而唐開元游儀角二星十二度舊經去極九  
十一度今測九十三度半距星正當赤道其黃道在赤道南不經角中今測  
角在赤道南二度半黃道復經角中卽與天象合景祐測驗角二星十二度  
距南星去極九十七度在赤道外六度與乾象新書合今從新書爲正  
南門二星在庫樓南天之外門也主守兵禁星明則遠方來貢暗則夷叛中有  
小星兵動客彗守之兵起

庫樓十星六大星庫也南四星樓也在角宿南一曰天庫兵車之府也旁十五  
星三三而聚者柱也中央四小星衡也芒角兵起星亡臣下逆動則將行實爲  
吉虛乃凶歲星犯之主兵熒惑犯之爲兵旱月入庫樓爲兵彗孛入兵饑客星

入夷兵起流星入兵盡出赤雲氣入內外不安天庫生角有兵

平星二星在庫樓北角南主平天下法獄廷尉之象正則獄訟平月暈獄官憂

熒惑犯之兵起有赦彗星犯政不行執法者黜

平道二星在角 宿間主平道之官武密曰天子八達之衢主轍軾明正吉動

搖法駕有虞歲星守之天下治熒惑太白守為亂客星守車駕出行流星守去

賢用姦

天田二星在角北主畿內封域武密曰天子籍田也歲星守之穀稔熒惑守之

為旱太白守穀傷辰星守為水災客星守旱蝗

天門二星在平星北武密云在左角南朝聘待客之所星明萬方歸化暗則外

兵至月暈其外兵起熒惑入關梁不通守之失禮太白守有伏兵客星犯有謀

上者

進賢一星在平道西主卿相舉逸材明則賢人用暗則邪臣進太陰歲星犯之

大臣死熒惑犯為喪賢人隱太白犯之賢者退歲星太白填星辰星合守之其



占為天子求賢黃白紫氣貫之草澤賢人出

周鼎三星在角宿上主流亡星明國安不見則運不昌動搖國將移乾象新書引郊鄔定鼎事以周衰奏無道鼎淪泗水其精上為星李太異曰商巫咸星圖已有周鼎蓋在秦前數百年矣

按步天歌庫樓十星柱十五星衡四星平星平道天田天門各二星進賢一星周鼎三星俱屬角宿而晉志以左角為天田別不載天田二星隋志有二平道進賢周鼎晉志皆屬太微垣庫樓并衡星柱星南門天門平星皆在二十八宿之外唐武密及景祐書乃與步天歌合

亢宿四星為天子內朝總攝天下奏事聽訟理獄錄功一曰疏廟主疾疫星明大輔忠民安動則多疾為天子正坐為天符秋分不見則穀傷糴貴太陽犯之諸侯謀國君憂日暈其分大臣凶多雨民饑疫月犯之君憂或大臣當之左為水右為兵月暈其分先起兵者勝在冬大人憂歲星犯之有赦穀有成守之有兵人多病留三十日以上有赦又曰犯則逆臣為亂熒惑犯居陽為喜陰為憂

有芒角大人惡之守之久民憂多雨水又爲兵填星犯穀傷民亡逆行女專政  
逆臣爲謀守之有兵太白犯之國亡民災逆行爲兵亂有芒角貴臣戮守之有  
水旱災或爲喪辰星犯之爲水又爲大兵守之米貴民疾歲旱盜起民相惡客  
星犯國不安色赤爲兵旱黃爲土功青黑使者憂守之穀傷一云有赦令黑民  
流彗犯國災出則有水兵疫臣叛白爲喪孛星犯國危爲水爲兵入則民流出  
則其國饑流星入外國使來穀熟出爲天子遣使赦令出李淳風曰流星入亢  
幸臣死雲氣犯之色蒼民疫白爲土功黑水赤兵一云白民虐疾黃土功

右亢宿四星漢永元銅儀十度唐開元游儀九度舊去極八十九度今九十  
一度半景祐測驗亢九度距南第二星去極九十五度

大角一星在攝提間天王坐也又爲天棟正經紀也光明潤澤爲吉青爲憂赤  
爲兵白爲喪黑爲疾色黃而靜民安動則人主好游月犯之大臣憂王者惡之  
月暈其分人主有服五星犯之臣謀主有兵太白守之爲兵彗星出其分主更  
改或爲兵天子失仁則守之孛星犯爲兵守之主憂客星犯守臣謀上出則人

主受制流星入王者惡之犯之邊兵起雲氣青主憂白爲喪黃氣出有喜

折威七星在亢南主斬殺斷軍獄月犯之天子憂五星犯將軍叛彗孛犯邊將死雲氣犯蒼白兵亂赤臣叛主黃白爲和親出則有赦黑氣入人主惡之

攝提六星左右各三直斗杓南主建時節伺機祥其星爲楯以夾擁帝坐主九卿星明大三公恣主弱色温不明天下安近大角近威有謀太陰入主受制月食其分主惡之熒惑太白守起兵天下更主彗孛入主自將兵出主受制流星入有兵出有使者出犯之公卿不安雲氣入赤爲兵九卿憂色黃喜黑大臣戮陽門二星在庫樓東北主守隘塞禦外寇五星入五兵藏彗星守之外夷犯塞兵起赤雲氣入主用兵

頓頑二星在折威東南主考囚情狀察詐僞也星明無咎暗則刑濫彗星犯之貴人下獄

按步天歌大角一星折威七星左右攝提總六星頓頑陽門各二星俱屬角宿而晉志以大角攝提屬太微垣折威頓頑在二十八宿之外陽門則見於

隋志而晉史不載武密書以攝提折威陽門皆屬角亢乾象新書以右攝提屬角左攝提屬亢餘與武密書同景祐測驗乃以大角攝提頓頌陽門皆屬於亢其說不同

氐宿四星爲天子舍室后妃之府休解之房前二星適也後二星妾也又爲天根主疫後二星大則臣奉度主安小則臣失勢動則徭役起日食其分卿相有讒諛一曰王者后妃惡之大臣憂曰暈女主恣一曰國有憂日下與師月食其宿大臣凶后妃惡之一曰糴貴月暈大將凶人疫在冬爲水主危以赦解之月犯左右郎將有誅一曰有兵盜犯右星主水掩之有陰謀將軍當之歲星犯有赦或立后守之地動年豐逆行爲兵熒惑犯之臣僭上一云將軍憂守有赦填星犯左右郎將有誅守之有赦色黃后喜或冊太子留舍天下有兵齊明赦太白犯之郎將誅入其分疾疫或云犯之拜將乘右星水災辰星犯貴臣暴憂守之爲水爲旱爲兵入守貴人有獄乘左星天子自將客星犯牛馬貴色黃白爲喜有赦或曰邊兵起後宮亂五十日不去有刺客彗星犯有大赦糴貴滅之大

疫入有小兵一云主不安孛星犯糴貴出則有赦入爲小兵或云犯之臣干主  
流星犯祕閣官有事在冬夏爲水旱乙巳占後宮有喜色赤黑後宮不安雲氣  
入黃爲上功黑主水赤爲兵蒼白爲疾疫白後宮憂

按漢永元銅儀唐開元游儀氏宿十六度去極九十四度景祐測驗與乾象  
新書皆九十八度

天乳一星在氏東北當赤道中明則甘露降彗客入天兩

將軍一星騎將也在騎官東南總領車騎軍將部陣行列色動搖兵外行太白  
熒惑客星犯之大兵出天下亂招搖一星在梗河北主北兵芒角變動則兵大  
行明則兵起若與棟星梗河北斗相直則北方當來受命中國又占動則近臣  
恣離次則庫兵發色青爲憂白爲君怒赤爲兵黑爲軍破黃則天下安彗星犯  
北邊兵動出其分夷兵大起孛犯蠻夷亂客星出蠻夷來貢一云北地有兵喪  
流星出有兵雲氣犯色黃白相死赤爲內兵亂色黃兵罷白大人憂

帝席三星在大角北主宴獻酬酢星明王公災暗天下安星亡大人失位動搖

主危彗犯主憂有亂兵客星犯主危

亢池六星在亢宿北亢舟也池水也主渡水往來送迎微細凶散則天下不通  
移徙不居其度中則宗廟有怪五星犯之川溢客星犯水蟲多死武密云主斷  
軍獄掌棄市殺戮與舊史異說

騎官二十七星在氐南天子虎賁也主宿衛星衆天下安稀則騎士叛不見兵  
起五星犯爲兵客星守之將出有憂士卒發流星入兵起色蒼白將死

梗河三星在帝席北天矛也一曰天鋒主北邊兵又主喪故其變動應以兵喪  
星亡國有兵謀彗星犯之北兵敗客星入兵出陰陽不和一云北兵侵中國流  
星出爲兵赤雲氣犯兵敗蒼白將死

車騎三星在騎官南總車騎將主部陣行列變色動搖則兵行太白熒惑客星  
犯之大兵出天下亂

陣軍三星在氐南一云在騎官東北革車也太白熒惑守之主車騎滿野內兵  
無禁

天輻二星在房西斜列主乘輿若周官巾車官也近尾天下有福五星客彗犯之則輦轂有變一作天福

按步天歌已上諸星俱屬氐宿乾象新書以帝席屬角亢池屬亢武密與步天歌合皆屬氐而以梗河屬亢占天錄又以陣車屬於亢乾象新書屬氐餘皆與步天歌合

房宿四星爲明堂天子布政之官也亦四輔也下第一星上將也次次將也次次相也上星上相也南二星君位北二星夫人位又爲四表中爲天衢爲天關黃道之所經也南間曰陽環其南曰太陽北間曰陰環其北曰太陰七曜由乎天衢則天下和平由陽道則旱喪由陰道則水兵亦曰天駟爲天馬主車駕南星曰左驂次左服次右服次右驂亦曰天廐又主開閉爲畜藏之所由星明則王者明驂星大則兵起離則民流左驂服亡則東南方不可舉兵右亡則西北不可舉兵日食其分爲兵大臣專權日暈亦爲兵君臣失政女主憂月食其宿大臣憂又爲王者昏大臣專政月暈爲兵三宿主赦及五舍不出百日赦太陰

犯陽道爲旱陰道爲雨中道歲稔又占上將誅當天門天駟穀熟歲星犯之更政令又爲兵爲饑民流守之大赦天下和平一云良馬出熒惑犯馬貴人主憂色青爲喪赤爲兵黑將相災白芒火災守之有赦令十日勾己者臣叛填星犯之女主憂勾己相有誅守之土功興一曰旱兵一曰有赦令太白犯四邊合從守之爲土功出入霜雨不時辰星犯有殃守之水災一云北兵起將軍爲亂客星犯曆陽道爲旱陰道爲水國空民饑色白有攻戰入爲糴貴彗星犯國危人亂其分惡之孛星犯有兵民饑國災流星犯之在春夏爲土功秋冬相憂入有喪乙巳占出其分天子恤民下德令雲氣入赤黃吉如人形后有子色赤宮亂蒼白氣出將相憂

按漢永元銅儀唐開元游儀房宿五度舊去極百八度今百十度半景祐測驗房距南第二星去極百十五度在赤道外二十三度乾象新書在赤道外二十四度

鍵閉一星在房東北主關籥明吉暗則宮門不禁月犯之大臣憂火災歲星守



之王不宜出填星占同太白犯將相憂熒惑犯主憂彗星客星守之道路阻兵起一云兵滿野

鉤鈐二星在房北房之鈐鍵天之管籥王者至孝則明又曰明而近房天下同心房鉤鈐間有星及疎折則地動河清月犯之大人憂車駕行日食其分將軍死歲星守之爲饑去其宿三寸王失政近臣起亂熒惑守之有德令太白守喉舌憂填星守王失土彗星犯宮庭失業客星流星犯王有奔馬之敗

東咸西咸各四星東咸在心北西咸在房西北日月五星之道也爲房之戶以防淫泆也明則信吉東咸近鉤鈐有讒臣入西咸近上及動有知星者入月五星犯之有陰謀又爲女主失禮民饑熒惑犯之臣謀上與太白同犯兵起歲星填星犯之有陰謀流星犯后妃恣王有憂客星犯主失禮后妃恣

罰三星在東西咸正南主受金罰贖曲而斜列則刑罰不中彗星客星犯之國無政令憂多枉法

日一星在房宿南太陽之精主昭明令德明大則君有德令月犯之下謀上歲星守

王得忠臣陰陽和四夷賓五穀豐太白熒惑犯之主有憂客星彗星犯之主失位  
從官二星在房宿西南主疾病巫醫明大則巫者擅權彗孛犯之巫臣作亂雲  
氣犯黑爲巫臣戮黃則受爵

按步天歌以上諸星俱屬在房日一星晉隋志皆不載以他書考之雖在房  
宿南實入氐十二度半武密書及乾象新書惟以東咸屬心西咸屬房與步  
天歌不同餘皆脗合

心宿三星天王正位也中星曰明堂天子位爲大辰主天下之賞罰前星爲太  
子後星爲庶子星直則王失勢明大天下同心天下變動心星見祥搖動則兵  
離民流日食其分刑罰不中將相疑民饑兵喪日暈王者憂之月食其宿王者  
惡之三公憂下有喪月暈爲旱穀貴蟲生將凶與五星合大凶大陰犯之大臣  
憂犯中央及前後星主惡之出心大星北國旱出南君憂兵起歲星犯之有慶  
賀事穀豐華夷奉化色不明有喪旱熒惑犯之大臣憂貫心爲饑與太白俱守  
爲喪又曰熒惑居其陽爲喜陰爲憂又曰守之主易政犯爲民流大臣惡之守

星南爲水守北爲旱逆行大臣亂填星犯之大臣喜穀豐守之有土功留舍三十日有赦居久人主賢中犯明堂火災逆行女主干政太白犯糴貴將軍憂有水災不出一年有大兵舍之色不明爲喪逆行環繞大人惡之辰星犯明堂則大臣當之在陽爲燕在陰爲塞北不則地動大雨守之爲水爲盜客星犯之爲旱守之爲火災舍之則糴貴民饑彗星犯之大臣相疑守之而出爲蝗饑又曰爲兵星孛其分有兵喪民流星犯臣叛入之外國使來色青爲兵爲憂黃有土功黑爲凶雲氣入色黃子孫喜白亂臣在側黑太子有罪

按漢永元銅儀唐開元游儀心三星皆五度去極百八度景祐測驗心三星五度距西第一星去極百十四度

積卒十二星在房西南五營軍士之象主衛士掃除不祥星小爲吉明則有兵一星亡兵少出二星亡兵半出三星亡兵盡出五星守之兵起不則近臣誅彗星客星守之禁兵大出天子自將雲氣犯之青赤爲大臣持政欲論兵事

按步天歌積卒十二星屬心晉志在二十八宿之外唐武密書與步天歌合

乾象新書乃以積卒屬房宿爲不同今兩存其說

尾宿九星爲天子後宮亦主后妃之位上第一星后也次三星夫人次星嬪妾也亦爲九子均明大小相承則後宮有序子孫蕃昌明則后有喜穀熟不明則后有憂穀荒日食其分將有疾在燕風沙兵喪後宮有憂人君戒出日暈女主喪將相憂日食其分貴臣犯刑後宮有憂月暈有疫大赦將相憂其分有水災后妃憂太陰犯之臣不和將有憂歲星犯穀貴人之妾爲嫡臣專政守之旱火災熒惑犯之有兵留二十日水災留三月客兵聚入之人相食又云宮內亂填星犯之色黃后妃喜入爲兵饑盜賊逆行妾爲女主守之而有芒角更姓易政太白犯入大臣起兵久留爲水災出入舍守糴貴兵起後宮憂失行軍破城亡辰星犯守爲水災民疾後宮有罪者兵起入則萬物不成民疫客星犯入宮人惡之守之賤女暴貴出則爲風爲水後宮惡之兵罷民饑多死彗星犯后感主宮人出兵起宮門多土功出入貴臣誅有水災孛犯多土功大臣誅守之宮人出出爲大水民饑流星入犯色青舊臣歸在春夏後宮有口舌秋冬賢良用事

出則後宮喜有子孫色白後宮妾死出入風雨時穀熟入后族進祿青黑則后妃喪雲氣入色青外國來降出則臣有亂赤氣入有使來言兵黑氣入有諸侯

客來

按漢永元銅儀尾宿十八度唐開元游儀同舊去極百二十度一云百四十二度今百二十四度景祐測驗亦十八度距西行從西第二星去極百二十八度在赤道外二十二度乾象新書二十七度

神宮一星在尾宿第三星旁解衣之內室也

天江四星在尾宿北主太陰明動爲水兵起星不具則津梁不通參差馬貴月犯爲兵爲臣彊河津不通熒惑犯大旱守之有立主太白犯暴水彗星犯爲大兵客星入河津不通流星犯爲水爲饑赤雲氣犯車騎出青爲多水黃白天子用事兵起入則兵罷

傳說一星在尾後河中主章祝官也一曰後宮女巫也司天王之內祭祀以祈子孫明大則吉王者多子孫輔佐出不明則天下多禱祠亡則社稷無主入尾

下多祝詛左氏傳天策焯焯卽此星也彗星客星守之天子不享宗廟赤雲氣入巫祝官有誅者

魚一星在尾後河中主陰事知雲雨之期明大則河海水出不明則陰陽和多魚亡則魚少動搖則大水暴出出則河大魚多死月暈或犯之則旱魚死熒惑犯其陽爲旱陰爲水填星守之爲旱赤雲氣犯出兵起將憂入兵罷黃白氣出兵起

龜五星在尾南主卜以占吉凶星明君臣和不明則上下乖熒惑犯爲旱守爲火客星入爲水憂流星出色赤黃爲兵青黑爲水各以其國言之赤雲氣出卜祝官憂

按神宮傳說魚各一星天江四星龜五星步天歌與他書皆屬尾而晉志列天江於天市垣以傳說魚龜在二十八宿之外其說不同

箕宿四星爲後宮妃后之府亦曰天雞主八風又主口舌主蠻夷星明大穀熟不正爲兵離徙天下不安中星衆亦然糴貴凡日月宿在箕壁翼軫

者皆爲風起舌動三日有大風日犯或食其宿將疾佞臣害忠良皇后憂大風沙日暈國有妖言月食爲風爲水旱爲饑后惡之月暈爲風穀貴大將易又王者納后月犯多風糴貴爲旱女主憂君將死后宮干政歲星入宮內口舌歲熟在箕南爲旱在北爲有年守之多惡風穀貴民饑死熒惑犯地動入爲旱出則有赦久守爲水逆行諸侯相謀人主惡之填星犯女主憂久留有赦守之后喜有土功色黃光潤則太后喜又占守有水守九十日人流兵起蝗太白犯女主喜入則有赦出爲土功糴貴守之爲旱爲風民疾出入留箕五穀不登多蝗辰星犯有赦守則爲旱動搖色青臣自戮又占爲水溢旱火災穀不成客星入犯有土功宮女不安民流守之爲饑色赤爲兵守其北小熟東大熟南小饑西大饑出其分民饑大臣有棄者一云守之秋冬水災彗星犯守東夷自滅出則爲旱爲兵北方亂守犯爲外夷亂糴貴守之外夷災出爲穀貴民死流亡春夏犯之金玉貴秋冬土功興入則多風兩色黃外夷來貢雲氣出色蒼白國災除入則蠻夷來見出而色黃有使者出箕口斂爲雨開爲多風少雨

按漢永元銅儀箕宿十度唐開元游儀十一度舊去極百八十度今百二十度景祐測驗箕四星十度距西北第一星去極百二十三度  
糠一星在箕舌前杵西北明則豐熟暗則民饑流亡

杵三星在箕南主給庖春動則人失釜甑縱則豐橫則大饑亡則歲荒移徙則人失業熒惑守民流客星犯守歲饑彗孛犯天下有急兵

按晉志糠一星杵三星在二十八宿之外乾象新書與步天歌皆屬箕宿

北方南斗六星天之賞祿府主天子壽算爲宰相爵祿之位傳曰天廟也丞相太宰之位褒賢進士稟受爵祿又主兵一曰天機南二星魁天梁也中央二星天相也北二星天府廷也又謂南星者魁星也北星杓也第一星曰北亭一曰天開一曰鐵鑽石申曰魁第一主吳二會稽三丹陽四豫章五廬江六九江星明盛則王道和平帝王長齡將相同心不明則大小失次芒角動搖國失忠臣兵起民愁日食在斗將相憂兵起皇后災吳分有兵日暈宰相憂宗廟不安月食其分國饑小兵后夫人憂月暈大將死五穀不生月犯將臣黜風雨不時大



臣誅一歲三入大赦又占入爲女主憂趙魏有兵色惡相死歲星犯有赦久守水災穀貴守及百日兵用大臣死熒惑犯有赦破軍殺將火災入二十日糴貴四十日有德令守之爲兵盜久守災甚出斗上行天下憂不行臣憂入內外有謀守七日太子疾填星犯爲亂入則失地逆行地動出入留二十日有大喪守之大臣叛又占逆行先水後旱守之國多義士太白犯之有兵臣叛留守之破軍殺將與火俱入白爍臣子爲逆久則禍大辰星犯水穀不成有兵守之兵喪客星犯兵起國亂入則諸侯相攻多盜大旱宮廟火穀貴七日不去有赦彗星犯國主憂出則其分有謀又爲水災宮中火下謀上有亂兵入則爲火大臣叛孛犯入下謀上有亂兵出則爲兵爲疾國憂流星入蠻夷來貢犯之宰相憂在春天子壽夏爲水秋則相黜冬大臣逆色赤而出斗者大臣死雲氣入蒼白多風赤旱出有兵起宮廟火入有雨赤氣兵黑主病

按漢永元銅儀斗二十四度四分度之一唐開元游儀二十六度去極百十六度今百十九度景祐測驗亦二十六度距魁第四星去極百二十二度

鼈十四星在南斗南主水族不居漢中川有易者熒惑守之爲旱辰星守爲火  
客星守爲水流星出色青黑爲水黃爲旱雲氣占同一曰有星守之白衣會主  
有水

天淵十星一曰天池一曰天泉一曰天海在鼈星東南九坎間又名太陰主灌  
漑溝渠五星守之大水河決熒惑入爲旱客星入海魚出彗星守之川溢傷人  
狗二星在南斗魁前主吠守以不居常處爲災熒惑犯之爲旱客星入多土功  
北邊饑守之守禦之臣作亂

建六星在南斗魁東北臨黃道一曰天旗天之都關爲謀事爲天鼓爲天馬南  
二星天庫也中二星市也鐵鑽也上二星爲旗跗斗建之間三光道也主司七  
曜行度得失十一月甲子天正冬至大曆所起宿也星動人勞役月犯之臣更  
天子法掩之有降兵月食其分皇后娣姪當黜月暈大將死五穀不成蛟龍見  
牛馬疫月與五星犯之大臣相譖有謀亦爲關梁不通大水歲星守爲旱糴貴  
死者衆諸侯有謀入則有兵熒惑守之臣有黜者諸侯有謀糴貴入則關梁不

通馬貴守旗附三十日有兵填星守之王者有謀太白守外國使來辰星守爲水災米貴多病彗孛客星犯之王失道忠臣黜客星守之道路不通多盜流星入下有謀色赤昌

天弁九星

弁一作辨

在建星北市官之長主列肆闐闐市籍之事以知市珍也明感

則萬物昌不明及彗客犯之糴貴久守之囚徒起兵

天鷄二星在牛西一在狗國北主異鳥一曰主候時熒惑舍之爲旱鷄多夜鳴太白熒惑犯之爲兵填星犯之民流亡客星犯水旱失時入爲大水

狗國四星在建星東南主三韓鮮卑烏桓獫狁沃且之屬星不具天下有盜不明則安明則邊寇起月犯之烏桓鮮卑國亂熒惑守之外夷兵起太白守之鮮卑受攻客星守其王來中國

天籥八星在南斗杓第二星西主開閉門戶明則吉不備則關籥無禁客星彗星守之關梁閉塞

農丈人一星在南斗西南老農主稼穡者又主先農農正官星明歲豐暗則民

失業移徙歲饑客星彗星守之民失耕歲荒

按步天歌已上諸星皆屬南斗晉志以狗國天鷄天弁天籥建星皆屬天市垣餘在二十八宿之外乾象新書以天籥農丈人屬箕武密又以天籥屬尾互有不同

牛宿六星天之關梁主犧牲事其北二星一曰卽路一曰聚火又曰土一星主道路次二星主關梁次三星主南越明大則王道昌關梁通牛貴怒則馬貴動則牛災多死始出而色黃大豆賤赤則豆有蟲青則大豆貴星直糴賤曲則貴日食其分兵起暈爲陰國憂兵起月食有兵暈爲水災女子貴五穀不成牛多暴死小兒多疾月暈在冬三月百四十日外有赦暈中央大星大將被戮月犯之有水牛多死其國有憂歲星入犯則諸侯失期留守則牛多疫五穀傷在牛東不利小兒西主風雪北爲民流逆行宮中有火居三十日至九十日天下和平道德明正熒惑犯之諸侯多疾臣謀主守則穀不成兵起入或出守斗南赦填星犯之有土功守之雨雪民人牛馬病太白犯之諸侯不通守則國有兵起

入則爲兵謀人多死辰星犯敗軍移將臣謀主客星犯守之牛馬貴越地起兵  
出牛多死地動馬貴彗星犯之吳分兵起出爲糴貴牛死孛犯改元易號糴貴  
牛多死吳越兵起下當有自立者流星犯之王欲改事春夏穀熟秋冬穀貴色  
黑牛馬昌關梁入貢雲氣蒼白橫貫有兵喪赤亦爲兵黃白氣入牛蕃息黑則  
牛死

按漢永元銅儀以牽牛爲七度唐開元游儀八度舊去極百六度今百四度  
景祐測驗牛六星八度距中央大星去極百十度半

天田九星在斗南一曰在牛東南天子畿內之田其占與角北天田同客星犯  
之天下憂彗孛犯守之農夫失業

河鼓三星在牽牛西北主天鼓蓋天子及將軍鼓也一曰三鼓主天子三軍中  
央大星爲大將軍左星爲左將軍右星爲右將軍左星南星也所以備關梁而  
拒難也設守險阻知謀徵也鼓欲正直而明色黃光澤將吉不正爲兵憂星怒  
則馬貴動則兵起曲則將失計奪勢有芒角將軍凶猛象也動搖差度亂兵起

月犯之軍敗亡五星犯之兵起彗星客星犯將軍被戮流星犯諸侯作亂黃白雲氣入之天子喜赤爲兵起出則戰勝黑爲將死青氣入之將憂出則禍除左旗九星在河鼓左旁右旗九星在牽牛北河鼓西南天之鼓旗旌表也主聲音設險知敵謀旗星明大將吉五星犯守兵起

織女三星在天市垣東北一曰在天紀東天女也主果蓏絲帛珍寶王者至孝神祇咸喜則星俱明天下和平星怒而角布帛貴陶隱居曰常以十月朔至六七日晨見東方色赤精明者女工善星亡兵起女子爲候織女足常向扶筐則吉不向則絲綿大貴月暈其分兵起熒惑守之公主憂絲帛貴兵起彗星犯后族憂星孛則有女喪客星入色青爲饑赤爲兵黃爲旱白爲喪黑爲水流星入有水盜女主憂雲氣入蒼白女子憂赤則爲女子兵死色黃女有進者

漸臺四星在織女東南臨水之臺也主晷漏律呂事明則陰陽調而律呂和不明則常漏不定客星彗星犯之陰陽反戾

輦道五星在織女西主王者游嬉之道漢輦道通南北宮其象也太白熒惑守

之御路兵起

九坎九星在牽牛南主溝渠導引泉源疏瀉盈溢又主水旱星明爲水災微小吉月暈爲水五星犯之水溢客星入天下憂雲氣入青爲旱黑爲水溢

羅堰三星在牽牛東拒馬也主隄塘壅蓄水源以灌溉也星明大則水泛溢

天桴四星在牽牛東北橫列一曰在左旗端鼓桴也主漏刻暗則刻漏失時武密曰主桴鼓之用動搖則軍鼓用前近河鼓若桴鼓相直皆爲桴鼓用太白熒惑守之兵鼓起客星犯之主刻漏失時

按步天歌已上諸星俱屬牛宿晉志以織女漸臺輦道皆屬太微垣以河鼓左旗右旗天桴屬天市垣餘在二十八宿之外武密以左旗屬箕屬斗右旗亦屬斗漸臺屬斗又屬牛餘與步天歌同乾象新書則又以左旗織女漸臺輦道九坎皆屬於斗

須女四星天之少府賤妾之稱婦職之卑者也主布帛裁製嫁娶星明天下豐女巧國富小而不明反是日食在女戒在巫祝后妃禱祠又占越分饑后妃疾

日暈後宮及女主憂月食爲兵旱國有憂月暈有兵謀不成兩重三重女主死  
月犯之有女惑有兵不戰而降又曰將軍死歲星犯之后妃喜外國進女守之  
多水國饑喪糴貴民大災熒惑犯之大臣皇后憂布帛貴民大災守之土人不  
安五穀不熟民疾有女喪又爲兵入則糴貴逆行犯守大臣憂居陽喜陰爲憂  
填星犯守有苛政山水出壞民舍女謁行后專政多妖女留五十日民流亡太  
白犯之布帛貴兵起天下多寡女留守有女喪軍發辰星犯國饑民疾守之天  
下水有赦南地火北地水又兵起布帛貴客星犯兵起女人爲亂守之宮人憂  
諸侯有兵江淮不通糴貴彗星犯兵起女爲亂出爲兵亂有水災米鹽貴星孛  
其分兵起女爲亂有奇女來進出入國有憂王者惡之流星犯天子納美女又  
曰有貴女下獄抵須女女主死乙巳占出入而色黃潤立妃后白爲後宮妾死  
雲氣入黃白有嫁女事白爲女多病黑爲女多死赤則婦人多兵死者

按漢永元銅儀以須女爲十一度景祐測驗十二度距西南星去極百五度  
在赤道外十四度



十二國十六星在牛女南近九坎各分土居列國之象九坎之東一星曰齊齊北二星曰趙趙北一星曰鄭鄭北一星曰越越東二星曰周周東南北列二星曰秦秦南二星曰代代西一星曰晉晉北一星曰韓韓北一星曰魏魏西一星曰楚楚南一星曰燕有變動各以其國占之陶隱居曰越星在婺女南鄭一星在越北趙二星在鄭南周二星在越東楚一星在魏西南燕一星在楚南韓一星在晉北晉一星在代北代二星在秦南齊一星在燕東  
離珠五星在須女北須女之藏府女子之星也又曰主天子旒珠后夫人環珮去陽旱去陰潦客星犯之後宮有憂

奚仲四星在天津北主帝車之官凡太白熒惑守之爲兵祥

天津九星在虛宿北橫河中一曰天漢一曰天江主四瀆津梁所以度神通四方也一星不備津梁不通明則兵起參差馬貴大則水災移則水溢彗孛犯之津敗道路有賊客星犯橋梁不修守之水道不通船貴流星出必有使出隨分野占之赤雲氣入爲旱黃白天子有德令黑爲大水色蒼爲水爲憂出則禍除

敗瓜五星在匏瓜星南主修瓜果之職與匏瓜同占

匏瓜五星一作瓠瓜在離珠北天子果園也其西觜星主後宮不明則后失勢不具或動搖爲盜光明則歲豐暗則果實不登彗孛犯之近臣僭有戮死者客星守之魚鹽貴山谷多水犯之有游兵不戰蒼白雲氣入之果不可食青爲天子攻城邑黃則天子賜諸侯果黑爲天子食果而致疾扶筐七星爲感桑之器主勸蠶也一曰供奉后與夫人之親蠶明吉暗凶移徙則女工失業彗星犯將叛流星犯絲綿大貴

按步天歌已上諸星俱屬須女而十二國及奚仲匏瓜敗瓜等星晉志不載隋志有之晉志又以離珠天津屬天市垣扶筐屬太微垣乾象新書以周越齊趙屬牛秦代韓魏燕晉楚鄭屬女武密以離珠匏瓜屬牛又屬女以奚仲屬危乾象新書以離珠匏瓜屬牛敗瓜屬斗又屬牛以天津西一星屬斗中屬牛東五星屬女

虛宿二星爲虛堂冢宰之官也主死喪哭泣又主北方邑居廟堂祭祀祝禱事

宋均曰危上一星高旁兩星下似蓋屋也蓋屋之下中無人但空虛似乎殯宮主哭泣也明則天下安不明爲旱欹斜上下不正享祀不恭動將有喪日食其分其邦有喪日暈民饑后妃多喪月食主刀劍官有憂國有喪月暈有兵謀風起則不成又爲民饑月犯之宗廟兵動又國憂將死歲星犯民饑守之失色天王改服與填星同守水旱不時熒惑犯之流血滿野守之爲旱民饑軍敗入爲火災功成見逐或勾已大人戰不利填星犯之有急令行疾有客兵入則有赦穀不成人不安守之風雨不時爲旱米貴大人欲危宗廟有客兵太白犯下多孤寡兵喪出則政急守之臣叛君入則大臣下獄辰星犯春秋有水守之亦爲水災在東爲春水南爲夏水西爲秋水北冬有雷雨水客星犯糴貴守之兵起近期一年遠則二年有哭泣事出爲兵喪彗星犯之國凶有叛臣出爲野戰流血出入有兵起芒砀所指國必亡星孛其宿有哭泣事出則爲野戰流血國有叛臣流星犯光潤出入則冢宰受賞有赦令色黑大臣死入而色青有哭泣事黃白有受賜者出則貴人求醫藥雲氣黃入爲喜蒼爲哭赤火黑水白有幣客

來天不為大星亦各廣百日月時三十一日東漢張璠早發用燕人為吳晉

按漢永元銅儀以虛為十度唐開元游儀同舊去極百四度今百一度景祐

測驗距南星去極百三度在赤道外十二度

司命二星在虛北主舉過行罰滅不祥又主死亡逢星出司命王者憂疾一曰

宜防祲惑

司祿二星在司命北主增年延德又主掌功賞食料官爵

司危二星在司祿北主矯失正下又主樓閣臺榭死喪流亡

司非二星在司危北主司候內外察愆尤主過失乾象新書命祿危非八星主

天子已下壽命爵祿安危是非之事明大為災居常為吉

哭二星在虛南主哭泣死喪月五星彗孛犯之為喪

泣二星在哭星東與哭同占

天壘城一十三星在泣南圍如大錢形若貫索主鬼方北邊丁零類所以候興

敗存亡熒惑入守夷人犯塞客星入北方侵赤雲氣掩之北方驚滅有疾疫

離瑜三星在十二國東乾象新書在天壘城南離圭衣也瑜玉飾皆婦人見舅姑衣服也微則後宮儉約明則婦人奢縱客星彗星入之後宮無禁

敗曰四星在虛危南兩兩相對主敗亡災害石申曰一星不具民賣甌釜不見民去其鄉五星入除舊布新客星彗星犯之民饑流亡黑氣入主憂

按步天歌已上諸星俱屬虛宿司命司祿司危司非離瑜敗曰晉志不載隋志有之乾象新書以司命司祿司危司非屬須女泣星敗曰屬危武密書與步天歌合

危宿三星在天津東南爲天子宗廟祭祀又爲天子土功又主天府天市架屋受藏之事不明客有誅土功興動或暗營宮室有兵事日食陵廟摧有大喪有叛臣日暈有喪月食大臣憂有喪宮殿圯月暈有兵喪先用兵者敗月犯之宮殿陷臣叛主來歲糴貴有大喪歲星犯守爲兵役徭多土功有哭泣事又多盜熒惑犯之有赦守之人多疾兵動諸侯謀叛宮中火災守上星人民死中星諸侯死下星大臣死各期百日十日守三十日東兵起歲旱近臣叛入爲兵有變

更之令填星守之爲旱民疾土功興國大戰犯之皇后憂兵喪出入留舍國土地有流血入則大亂賊臣起太白犯之爲兵一曰無兵兵起有兵兵罷五穀不成多火災守之有憂又爲旱爲火舍之有急事辰星犯之大臣誅法官憂國多災守之臣下叛一云皇后疾兵喪起客星犯有哭泣一曰多雨水穀不收入之有土功或三日有赦出則多雨水五穀不登守之國敗民饑彗星犯之下有叛臣兵起出則將軍出國易政大水民饑彗犯國有叛者兵起流星犯之春夏爲水災秋冬爲口舌入則下謀上抵危北地交兵乙巳占流星出入色黃潤人民安穀熟土功興色黑爲水大臣災雲氣入蒼白爲土功青爲國憂黑爲水爲喪赤爲火白爲憂爲兵黃出入爲喜

按漢永元銅儀以危爲十六度唐開元游儀十七度舊去極九十七度距南星去極九十八度在赤道外七度

虛梁四星在危宿南主園陵寢廟禱祝非人所處故曰虛梁一曰宮宅屋幃帳寢太白熒惑犯之爲兵彗孛犯兵起宗廟改易

天錢十星在北落師門西北主錢帛所聚為軍府藏明則庫盈暗為虛太白熒惑守之盜起彗孛犯之庫藏有賊

墳墓四星在危南主山陵悲慘死喪哭泣大曰墳小曰墓五星守犯為人主哭泣之事

杵三星在人星東一云在白星北主春軍糧不具則民賣甑釜

白四星在杵星下一云在危東杵白不明則民饑星眾則歲樂疏為饑動搖亦

為饑杵直下對白則吉不相當則軍糧絕縱則吉橫則荒又白星覆歲饑仰則

歲熟彗星犯之民饑兵起天下急客星守之天下聚會米粟

蓋屋二星在危宿南九度主治宮室五星犯之兵起彗孛犯守兵災尤甚

造父五星在傳舍南一曰在騰蛇北御官也一曰司馬或曰伯樂主御營馬廐

馬乘轡勒移處兵起馬貴星亡馬大貴彗客入之僕御謀主有斬死者一曰兵

起守之兵動廐馬出

人五星在虛北車府東如人形一曰主萬民柔遠能邇又曰臥星主夜行以防

淫人星亡則有詐作詔者又爲婦人之亂星不具王子有憂客彗守犯人多疾疫

車府七星在天津東近河東西列主車府之官又主賓客之館星光明潤澤必有外賓車駕華潔熒惑守之兵動彗客犯之兵車出

鈞九星在造父西河中如鈞狀星直則地動他星守占同一曰主輦輿服飾明則服飾正

按步天歌已上諸星俱屬危宿晉志不載人星車府隋志有之杵臼星晉隋志皆無造父鈞星晉志屬紫薇垣蓋屋虛梁天錢在二十八宿外乾象新書以車府西四星屬虛東三星屬危武密書以造父屬危又屬室餘皆與步天歌合按乾象新書又有天綱一星在危宿南入危八度去極百三十二度在赤道外四十一度晉隋志及諸家星書皆不載止載危室二宿間與北落師門相近者近世天文乃載此一星在鬼柳間與外廚天紀相近然新書兩天綱雖同在危度其說不同今姑附于此



營室二星天子之宮一曰玄宮一曰清廟又爲軍糧之府主土功事一曰室一星爲天子宮一星爲太廟爲王者三軍之廩故置羽林以衛又爲離宮閣道故有離宮六星在其側一曰定室詩曰定之方中也星明國昌不明而小祠祀鬼神不享動則有土功事不具憂子孫無芒不動天下安日食在室國君憂王者將兵一曰軍絕糧士卒亡日暈國憂女主憂黜月食其分有土功歲饑月暈爲水爲火爲風月犯之爲土功有哭泣事歲星犯之有急而爲兵入天子有赦爵祿及下舍室東民多死舍北民憂又曰守之宮中多火災主不安民疫熒惑犯歲不登守之有小災爲旱爲火糴貴逆行守之臣謀叛入則創改宮室成勾己者主失宮填星犯爲兵守之天下不安人主徙宮后夫人憂關梁不通貴人多死久守大人惡之以赦解吉逆行女主出入恣留六十日土功與太白犯五寸許天子政令不行守則兵大忌之以赦令解一曰太子后妃有謀若乘守勾己逆行往來主廢后妃有大喪宮人恣去室一尺威令不行留六十日將死入則有暴兵辰星犯之爲水入則后有憂諸侯發動於西北客星犯入天子有兵事

軍饑將離外兵來出於室兵先起者敗彗星出占同或犯之則弱不能戰出入犯之則先起兵者勝一曰出室爲大水孛犯或出入先起兵者勝出有小災後宮亂武密曰孛出其分有兵喪道藏所載室專主兵流星犯軍乏糧在春夏將軍貶秋冬水溢乙巳占曰流星出入色黃潤軍糧豐五穀成國安民樂雲氣入黃爲土功蒼白大人惡之赤爲兵民疫黑則大人憂

按漢永元銅儀營室十八度唐開元游儀十六度舊去極入十五度景祐測驗室十六度距南星去極入十五度在赤道外六度

雷電六星在室南明動則雷電作

離宮六星兩兩相對爲一坐夾附室宿上星天子之別宮也主隱藏止息之所動搖爲土功不具天子憂太白熒惑入兵起犯或勾已環繞爲后犯咎彗星犯之有修除之事

壘壁陣十二星

壁一作壘

在羽林北羽林之垣壘主天軍營星明國安移動兵起不見兵盡出將死五星入犯皆主兵太白辰星尤甚客星入兵大起將吏憂流星

入南色青后憂入北諸侯憂色赤黑入東后有謀入西太子憂黃白為吉

騰蛇二十二星在室宿北主水蟲居河濱明而微國安移向南則旱向北大水

彗星犯之水道不通客星犯水物不成

土功吏二星在壁宿南一曰在危東北主營造宮室起土之官動搖則版築事

起

北落師門一星在羽林軍南北宿在北方落者天軍之藩落也師門猶軍門長

安城北門曰北落門象此也主非常以候兵星明大安微小芒角有大兵起歲

星犯之吉營惑入兵弱不可用客星犯之光芒相及為兵大將死守之邊人入

塞流星出而色黃天子使出入則天子喜出而色赤或犯之皆為兵起雲氣入

蒼白為疾疫赤為兵黃白喜黑雲氣入邊將死

入魁九星在北落東南主捕張禽獸之官也客彗入多盜賊兵起太白熒惑入

守占同

天綱一星在北落西南一曰在危南主武帳宮舍天子游獵所會客彗入為兵

起一云義兵

羽林軍四十五星三三而聚散出壘壁之南一曰在營室之南東西布列北第一行主天軍軍騎翼衛之象星衆則國安稀則兵動羽林中無星則兵盡出天下亂月犯之兵起歲星入諸侯悉發兵臣下謀叛必敗伏誅太白入兵起填星入大水五星入爲兵熒惑太白經過天子以兵自守熒惑入而芒赤興兵者亡客星入色黃白爲喜赤爲臣叛流星入南色青后有疾入北諸侯憂入東而赤黑后有謀入西太子憂雲氣蒼白入南后有憂北諸侯憂黑太子諸侯忌之出則禍除黃白吉

斧鉞三星在北落師門東芟刈之具也主斬芻藁以飼牛馬明則牛馬肥腴動搖而暗或不見牛馬死隋志通志皆在八魁西北主行誅拒難斬伐姦謀明大用兵將憂暗則不用移動兵起月入大臣誅歲星犯相誅熒惑犯大臣戮填星入大臣憂太白入將誅客彗犯斧鉞用又占客犯外兵被擒士卒死傷外國降色青憂赤兵黃白吉

按步天歌已上諸星皆屬營室雷電土功吏斧鉞晉志皆不載隋志有之壘  
壁陣北落師門天綱羽林軍晉志在二十八宿外騰蛇屬天市垣武密書以  
騰蛇屬營室又屬壁宿乾象新書以西十六星屬尾屬危東六星屬室羽林  
軍西六星屬危東三十九星屬室以天綱屬危斧鉞屬奎通占錄又以斧鉞  
屬壁屬奎說皆不同

壁宿二星主文章天下圖書之祕府明大則王者興道術行國多君子星失色  
大小不同王者好武經術不用圖書廢星動則有土功日食于壁陽消陰壞男  
女多傷國不用賢日暈名士憂月食其分大臣憂文章士廢民多疫月暈爲風  
水其分有憂月犯之國有憂爲饑衛地有兵歲星犯之水傷五穀久守或凌犯  
勾己有兵起熒惑犯之衛地憂守之國旱民饑賢不用一占王有大災填星犯  
守圖書與國王壽天下豐國用賢一占物不成民多病逆行成勾己者有土功  
六十日天下立王太白犯之一二寸許則諸侯用命守之文武並用一曰有軍  
不戰一曰有兵喪一曰水災多風雨一曰犯之多火災辰星犯國有蓋藏保守

之事王者刑法急守之近臣憂一曰其分有喪有兵姦臣有謀逆行守之橋梁不通客星犯之文章士死一曰有喪入爲土功有水守之歲多風雨舍則牛馬多死彗星犯之爲兵爲火一曰大水民流孛犯爲兵有火水災流星犯文章廢乙巳占曰若色黃白天下文章士用赤雲氣入之爲兵黑其下國破黃則外國貢獻一曰天下有烈士立

按漢永元銅儀東壁二星九度舊去極八十六度景祐測驗壁二星九度距南星去極八十五度

天廡十星在東壁之北主馬之官若今驛亭也主傳令置驛逐漏馳騫謂其急疾與晷漏競馳也月犯之兵馬歸彗星入馬廡火客星入馬出行流星入天下有驚

霹靂五星在雲雨北一曰在雷電南一曰在土功西主陽氣大盛擊碎萬物與五星合有霹靂之應

雲雨四星在雷電東一云在霹靂南主雨澤成萬物星明則多雨水辰星守之

有大水一占主陰謀殺事孳生萬物

鐵鑽五星在天倉西南刈具也主斬芻飼牛馬明則牛馬肥微暗則牛馬饑餓

按步天歌壁宿下有鐵鑽五星晉隋志皆不載隋志入魁西北三星曰鐵鑽

又曰鐵鉞其占與步天歌室宿內斧鉞略同恐卽是此誤重出之霹靂五星

雲雨四星晉志無之隋志有之武密書以雲雨屬室宿天廐十星晉志屬天

市垣其說皆不同

宋史卷五十

不詳然士立

心曰曰書由黃白天不文章士甲未曉康人志流與異其丁國知黃城水

終漢星洲文論吳爲火一曰大水與雨年州在吳齊火火災無星

不詳考是師文文章士於一曰有與公與士與林水子文與是

文事王書林或書字之故祖與一曰其於書與有是書五言詩與

宋史卷五十考證

天文志三平道二星在角宿間○角下空一格按此無闕文也

以周衰奏無道鼎淪泗水○按奏字當作秦

由星明則王者明彗星大則兵起○臣召南按晉隋二志房星明則王者明此

文由星係房星之誤

南二星魁天梁也○臣召南按此文直用晉志也隋志云北二星杓天府廷也

南二星魁天梁也相對更爲明整此下文又云南星者魁星也北星杓也此

句魁字宜節去史文未檢處也

中二星市也鐵鎖也○臣召南按晉志作鈇鎖是也因鈇訛鉄又因鉄訛鐵耳

後文凡鈇鎖並訛又參宿一曰鈇鉞亦訛鐵鉞

又曰土一星主道路○土字係上字之訛

一曰三鼓主天子三軍○三鼓晉志作三武

天軍之番落也○晉志作藩落是



